

# 就大埔宏福苑火災成立的獨立委員會

## 聽證會

高等法院原訟法庭陸啟康法官  
陳健波議員  
歐陽伯權博士

日期：

第十一天  
2026年4月13日

杜淦堃資深大律師, 俞匡庭大律師, 李澍桓大律師, 馮天榮大律師,  
張天風大律師及李俊軒大律師代表獨立委員會

孫靖乾資深大律師, 陸栩然大律師, 卓元暢大律師及劉逸冲大律師代表政府

譚俊傑大律師代表宏福苑居民

何卓衡大律師及楊志聰大律師代表置邦興業有限公司

律政司代表

競爭事務委員會代表

合安管理有限公司代表

呂世杰資深大律師及阮文躍大律師代表市區重建局

以下內容乃聆訊數碼錄音謄本

10 時 00 分聆訊恢復

陸啟康法官：係，李大律師。

李澍桓大律師：早晨，主席，今日會有四位證人佢哋都係嚟自消防處嘅。咁或者喺呢度未叫證人之前呢，想好快做個介紹嘅呢四位元證人嗰個參與情況，第一位會係許健安先生，佢係高級消防隊長。第二位係張樂恒，佢係助理消防區長，亦都係當時大埔消防局嘅局長嚟嘅。第三位就會係林浩俊，係新界東嘅分區副指揮官。而最後一位就係黃景文，副消防總長，咁雖然黃先生而家其實就係正在退休休假，但係佢都會嚟作供。呢四位消防處嘅同事其實佢哋都係嚟大火當日喺唔同時間做過現場嘅指揮官，所以我哋希望透過呢四位消防嘅同事可以話到畀大家知，究竟當日喺災場佢哋要應付嘅救災工作同埋可能會面對嘅究竟係一啲乜嘢嘅難題，咁希望可以透過佢哋分別咁向委員會講解。喺問問題嘅過程入面，主席，我都好大機會會睇番一啲可能當日火災嘅片段同埋可能災前或者災後嘅一啲現場嘅相片，所以可能對在場有睇緊呢個聽證會人士可能唔多唔少都會有啲可能不安嘅情緒引致，我亦都希望可以提醒番在場嘅人士，如果有需要，我哋喺有現場就算中央圖書館同埋呢度，都有一啲心理輔導嘅支援。

陸啟康法官：唔該，李大律師。

李澍桓大律師：咁如果係咁嘅話，我哋而家叫許先生，許健安。係，許先生，麻煩你嚟作供之前，請你先企起身，喺你面前有個聲明詞嘅，請你先企起身讀出嗰個聲明。

10 時 02 分消防處大埔消防局高級消防隊長證人許健安文先生開始作供

許健安先生：本人許健安聲明，本人所作的證供，盡本人所知、所悉及所信，均屬真實。

李澍桓大律師：係，請坐，許先生。許生，我哋知道你係 2013 年加入消防處，係咪？

許健安先生：係，正確。

李澍桓大律師：然之後喺 2018 年左右你就晉升到去高級消防隊長嘅呢一個職位？

許健安先生：正確。

李澍桓大律師：喺火災，即係 2025 年 11 月 26 號當日呢，你其實係駐守緊大埔消防局，個職位就係 B 隊嘅分隊主管，係咪？

許健安先生：正確。

李澍桓大律師：就喺當日，我哋知道你係--都算係第一批到現場嘅消防員，係咪？

許健安先生：係，正確。

1 李澍桓大律師：我亦都知道你就住今次呢一個調查分別向警方提供咗一份證人口供，亦都之  
2 後向委員會提供咗一份證人口供嘅，係咪？

3 許健安先生：係。

4 李澍桓大律師：我相信你兩份口供入面所講嘅都係據你所知、所信，真實嘅嘢講出嚟，係  
5 咪？

6 許健安先生：係。

7 李澍桓大律師：好勒，我嚟緊嘅呢啲時間，我會同你探討一下當日你當值，尤其是到場之後  
8 面對嘅情況，其中一個主要我哋想探討嘅話題當然就係我哋知道當日嚟救火救人嘅  
9 時候其實係面對好多困難嘅。可能有啲問題嚟緊我會問到係可能令你覺得好似有點  
10 尖銳或者聽落去似一啲批評，但係其實我絕對冇呢個意思，相反我哋係希望探討成  
11 個制度上面，尤其是你哋前線嘅消防員究竟嚟救災嘅時候一啲面對嘅一啲困難，從  
12 而等委員可以去了解係咪有啲地方整體上，無論係一啲指引或者救災嘅一啲儀器、  
13 工具係咪可以做一啲提升、改善，希望你明白我嗰個目的同埋個來意，好唔好呀？

14 許健安先生：明白。

15 李澍桓大律師：我哋先睇番有一份分文，我都會比較依靠得多就係喺 B10 入面 5087 頁有一  
16 個叫做 (English Spoken) 嘅一個記錄，因為呢個都比較容易我哋去跟番嗰個  
17 事件嘅發展嘅。呢一份文件我知道就係消防處事後製備，如果我哋睇得到呢，喺嗰  
18 個頁碼下面，右手邊我哋見到個日子就係 11 月 26 號，即係火災當日喇，跟住我哋  
19 見到第一個，有個 (English Spoken) 其實就係應該係報畀消防處求助嘅第一  
20 個嘅時間嚟嘅，咁我哋見到就係 14:51，即係 2 點 51 分。

21 許健安先生：係。

22 李澍桓大律師：如果我哋睇入去嗰個列表嗰個內容，你見到就係似乎出現咗有一個信息，咁  
23 就係話宏昌閣宏福苑，咁就係打電話嗰個人士畀嘅資料就係話有一個火災，就牽涉  
24 到有一個外牆嘅棚架，並且似乎有一個爆炸發生嘅，有呢啲咁嘅情況，你睇到呢一  
25 個信息喇，係咪？而家。

26 許健安先生：睇到。

27 李澍桓大律師：我哋亦都知道你隨後係喺 14:52，如果我哋睇落去下面少少呢，14:52:  
28 42 秒嘅嗰個信息，就應該就係你 (English Spoken)，即係接報咗呢一個咁樣  
29 嘅求助嘅要求，我哋見到 2336(6) 應該係你嘅消防員編號，係咪呀？

30 許健安先生：呢個係消防車嘅車牌。

31 李澍桓大律師：消防車嘅車牌，跟住我哋見到就係應該係 (English Spoken) 就係許先  
32 生你，係咪？

33 許健安先生：正確。

34 李澍桓大律師：我哋見到你接報，即係應機喇，就係其實喺第一個 call 1 分 25 秒嘅時  
35 候，你就已經接報咗呢一個咁樣嘅求助嘅要求，係咪？

36 許健安先生：正確。

- 1 李澍桓大律師：咁我相信就係隨後就係應該係你同你嘅隊員就係去出車，去火災嘅現場宏福  
2 苑，係咪？
- 3 許健安先生：係。
- 4 李澍桓大律師：我哋知道你當時負責嘅就係一架叫做油--係咪一個叫做「油壓升降台」嘅車  
5 輛？
- 6 許健安先生：正確。
- 7 李澍桓大律師：喺嗰個車上面就應該係你同另外有五位同事就出車嘅？
- 8 許健安先生：正確。
- 9 李澍桓大律師：我想你留意番喺 14:51，即係你接報對上嗰個 call，呢個就係由馬鞍山消  
10 防局接嘅一個回應嚟嘅，我想你留意就係，喺括弧嗰度佢有一句，就話  
11 “(English Spoken)”，跟住就有一個消防車嘅編號，我相信，係咪？。
- 12 許健安先生：係。
- 13 李澍桓大律師：我想問喺你當初接報，即係由控制中心發出要求去宏福苑做支援，做救火嘅  
14 時候，其實你哋係會有啲乜嘢資料，即係除咗我哋一早睇到嘅嗰句話有棚架火燭之  
15 外，其實仲有啲乜嘢資料係畀過你哋嘅？
- 16 許健安先生：其實車上面，喺嗰個車輛主管個位置度，我哋都有一個流動終端機嘅。
- 17 李澍桓大律師：係。
- 18 許健安先生：咁嗰個流動終端機其實上面都有一啲資訊，譬如關於大廈嗰個樓高，同埋佢個  
19 個大約個大細，我哋可以知道嘅。咁另外呢，佢嗰個現場如果係有一啲嘅消防裝置  
20 本身係失效嘅，咁我哋嘅消防通訊中心亦都會喺事前亦都記錄咗，亦都會喺嗰個流  
21 動終端機上面我哋可以睇到知道，哦，原來呢個，我哋去緊嘅呢個事故現場係有一  
22 啲嘅消防裝置係失效嘅咁樣樣。咁另外，我哋都有一個大約現場嗰個地圖，我哋可  
23 以知道嗰個大約屋苑，即係事故現場嗰個位置咁樣樣，等等呢啲資訊我哋都可以透  
24 過個終端機見到。
- 25 李澍桓大律師：針對番消防裝置，尤其是佢有個信息，即係話你會知道有消防裝置係失效  
26 嘅？
- 27 許健安先生：係。
- 28 李澍桓大律師：但係呢個信息會唔會話畀你知係乜嘢嘅消防裝置，因為我哋知道照明系統係  
29 一個消防裝置，滅火筒係一個消防裝置，咁呢度有冇--即係喺你個終端機上面，你  
30 出車嘅時候會唔會話到畀你知邊係一類型嘅消防裝置失效？
- 31 許健安先生：我當時記得係我知道就係現場有消防裝置失效，但係具體邊一個消防裝置，我  
32 而家唔記得，有冇呢個信息，係。
- 33 李澍桓大律師：Okay，假設如果當時係有話埋畀你知，譬如究竟係加壓泵壞咗，定係可能係  
34 天面嘅水缸冇水，如果呢啲信息可以預早話畀你知，假設有話畀你知，雖然話短短  
35 可能幾分鐘，因為我哋知道你大概五分鐘嘍就已經去到現場，喺呢幾分鐘入面會唔  
36 會幫助到你可能喺車上面已經可能要制訂一定到場嘅一啲措施點樣去救火？

- 1 許健安先生：可以。
- 2 李澍桓大律師：即係你覺得係直情話畀你知邊樣裝置係會幫到，定還是其實無所謂嘅，我知  
3 道有問題，你唔話畀我知邊樣嘢，我都係嗰套應對方案，會唔會有分別？
- 4 許健安先生：如果我預先知道係邊一類消防裝置係失效嘅，咁亦都可以幫助到我喺車上面去  
5 制訂嗰個現場部署。
- 6 陸啟康法官：我想問下許生，即係其實佢有冇話到畀你聽？係有話畀你聽，你唔記得咗係乜  
7 嘢，抑或其實個終端機係冇呢一個嘅信息顯示㗎？
- 8 許健安先生：我而家唔記得當時個終端機上面有冇呢個信息喺度，但係佢一定係有話到畀我  
9 知現場有消防裝置係失效。
- 10 陸啟康法官：明白。
- 11 李澍桓大律師：我相信你因為你都唔係年資淺嘅消防，你之前都應該有即係出過第二啲嘅任  
12 務，係咪？
- 13 許健安先生：係。
- 14 李澍桓大律師：喺你之前嘅任務有冇經驗，譬如都係有呢一啲咁樣嘅信息出嚟，然後以你  
15 所記得嗰啲信息係咪會講埋邊啲消防裝置失效？
- 16 許健安先生：有，我記得有。
- 17 李澍桓大律師：即係會有講埋邊一樣嘢失效嘅？
- 18 許健安先生：係。
- 19 李澍桓大律師：但係今次宏福苑嗰個情況你唔記得究竟有冇定有？
- 20 許健安先生：係，係。
- 21 李澍桓大律師：唔。另外，我哋亦都知道因應住宏福苑嗰個維修嘅情況，因為你屬於都係大  
22 埔分局喇。
- 23 許健安先生：係。
- 24 李澍桓大律師：所以其實你應該知道就其實係有一個所謂叫做應變方案係因應住佢哋有維修  
25 工程進行而消防局制訂咗，係咪？
- 26 許健安先生：知道。
- 27 李澍桓大律師：喺車上係咪都有一個咁樣嘅--即係成個方案畀到你哋，喺個終端機度，定還  
28 是有個副本，你講唔講得到？
- 29 許健安先生：車上並冇呢個行動預案嘅副本喺度。
- 30 李澍桓大律師：係。
- 31 許健安先生：係。
- 32 李澍桓大律師：但係你去今次出勤呢個任務之前，有冇機會或者你知唔知入面呢個應變方案  
33 嘅嗰個內容？
- 34 許健安先生：我本身知道。
- 35 李澍桓大律師：你有冇份制訂呢一個方案㗎？
- 36 許健安先生：我當初係--我有參與嘅，有參與，係。

- 1 李澍桓大律師：係，okay。或者我哋喺呢度睇一睇嗰個應變方案，然後你可以再進一步話  
2 畀我哋知你嗰個參與嘅情況，同埋一啲政策點樣制訂。
- 3 許健安先生：好。
- 4 李澍桓大律師：嗰個有關嘅文件係 B2，2642 嗰個文件冊度嘅。我哋見到呢個就係因應有重  
5 大維修宏福苑制訂嘅一個應對方案。咁我睇到呢，喺 2644 頁，即係簡介嗰度，其  
6 實 1.2 段，嗰度已經有畀到一個資料你，就係其實每一座有幾多層，大概有幾多  
7 戶，你係當時已經係知道有呢一個信息嘅，係咪？
- 8 許健安先生：知道。
- 9 李澍桓大律師：我相信你制訂個方案之前，其實應該你同你嘅同事都有到過現場去視察過，  
10 係咪？
- 11 許健安先生：我哋喺製作呢個行動預案嘅時候，我哋並冇就住呢個預案去現場視察。但係因  
12 為本身其實呢個屋苑即係對於我哋嚟講係一個老牌屋苑嚟。
- 13 李澍桓大律師：係。
- 14 許健安先生：而我哋即係大埔消防局嘅人員對於呢個屋苑本身都有充分嘅認知。
- 15 李澍桓大律師：係。
- 16 許健安先生：包括透過我哋日常有機會去現場做另外一啲嘅個案嘅時候，又或者我哋另一啲  
17 嘅巡--信息巡視嘅時候，我哋都機會去過現場，所以我哋都了解個屋苑，所以我哋  
18 喺製作呢個行動預案嘅時候，我哋係將一啲基本嘅資料放咗落去，另外，亦都就住  
19 呢個屋苑進行大維修，我哋都增加咗一啲人手去...
- 20 李澍桓大律師：係。
- 21 許健安先生：呢個係一個預案嘅目的，係。
- 22 李澍桓大律師：我諗就係因應住嗰個有維修嘅情況，我哋喺第五段，2645 頁我哋就見到有  
23 一個叫做“(English Spoken)”，就話即係當接到如果有求助，火警嘅求助  
24 嘅時候就一啲需要採取嘅一啲情況，係咪？
- 25 許健安先生：係。
- 26 李澍桓大律師：我哋見到譬如舉個例，就一個升降台，作為現場主管就要去--5.1 段嗰度就  
27 講就係負責去評定當時嗰個情況，同埋去畀意見就係決定究竟需要嘅一啲滅火嘅一  
28 啲程序或者方法，係咪？
- 29 許健安先生：係。
- 30 李澍桓大律師：咁 5.4、5.5、5.6 我哋都見到係有一啲相應嘅一啲措施，就派唔同嘅所謂  
31 我哋譬如見到 LRU，就係輕型嘅救援車，係咪呀？
- 32 許健安先生：係。
- 33 李澍桓大律師：我想問，呢一個制訂方案就係一接到話有火災求助，咁就會用第 5 段入面所  
34 講嘅呢啲方案去應對，係咪？
- 35 許健安先生：係。
- 36 李澍桓大律師：當然去到現場就要因應個情況，我哋知道譬如好以宏福苑咁，最褻庇我哋係

1 牽涉咗好多車輛、好多救援人員，去到五級火，係咪？

2 許健安先生：係。

3 李澍桓大律師：且係我想問嘅，喺制訂呢個方案嘅時候，有冇考慮個時間，即係火警發生個  
4 個時間嘅因素？我再講得詳細少少，我哋知道可能好彩嘅呢，就係因為今次宏福苑  
5 大火喺平日兩點零發生，所以相對地可能有好多人都已經外出咗就返工、返學。但  
6 係如果譬如你話喺夜晚發生呢個火警嘅，可能返到去嘅居民就會比較多嘞，其實制  
7 訂呢個方案嘅時候，有冇諗過話其實可能就住個時間性或者佢係咪假期，可能都應  
8 該會有相應一啲改變而唔係話即係日頭又係咁多車、夜晚又咁多車？

9 許健安先生：製作呢個行動預案嘅時候，其實佢係提供咗即係一般我哋去處理火警，喺呢個  
10 屋苑處理火警時候一個預案嚟嘅，其實喺呢個預案裏面亦都提供咗一啲額外嘅人手  
11 資源去應對。畀現場--初期行動指揮喺現場嘅時候能夠有大啲嘅彈性去作部署。當  
12 現場有需要去作何嘅增援或者任需要任何嘅支援嘅時候，現場嘅總指揮亦都係可以  
13 隨時向我哋消防通訊中心去要求增援，所以呢個行動預案係提供咗一個一般性畀我  
14 哋嘅行動指揮，同埋我哋嘅消防人員去了解呢個屋苑同埋熟悉呢個屋苑咁樣樣。

15 李澍桓大律師：係，即係話呢個就--如果根據你所講，呢個就係最低嘅要求，咁但係如果因  
16 應到時你知道嘅情況係有所變化，現場指揮就可以要求更多人手或者車輛去增換，  
17 你係咪咁嘅意思？

18 許健安先生：係，正確。

19 李澍桓大律師：我哋知道你跟住呢就係--如果我哋睇番 B10 嗰個文件，我哋知道你就應該係  
20 喺 14:56 嘅時間就到達現場嘅，咁如果我哋睇 14:56:222 嗰個欄目，我哋會見  
21 到 ARR，就應該係你到達並且 (English Spoken) 咗嗰個 (English  
22 Spoken) 嘅職位，係咪？

23 許健安先生：正確。

24 李澍桓大律師：我哋見後面 5 分 5 秒，呢個就係話由第一個 call，即係 14:51 嗰個  
25 call，你喺 5 分 5 秒之後就已經到達咗現場，係咪？

26 許健安先生：正確。

27 李澍桓大律師：下一個就 14:57 嗰個欄目，就應該係你做嘅第一個匯報嚟嘅，係咪？

28 許健安先生：係。

29 李澍桓大律師：因為呢個既然係你做嘅匯報，似乎你就喺到達咗現場大概三十秒嘅，咁你就  
30 已經做一個匯報，不如你講一講畀我哋知，你呢個信息嘅內容係想匯報啲乜？

31 許健安先生：好。我當時大約 14:56:22 喇，咁我係去到現場喇，咁我口供裏面都有提到，  
32 就係我架車輛泊咗喺個迴旋處嗰個位置，當我落車嘅時候呢，咁我就即係有個途人  
33 帶到我去後即面，即係宏昌閣背面，即係對住元洲仔里嗰個方向喇。

34 李澍桓大律師：或者你既然講到你泊咗喺迴旋處，或者我畀一條片段你睇番，睇下你可唔可  
35 以幫到我哋，認唔認到現場嗰架係咪你到場嗰架車，呢個就係你講元洲仔個迴旋  
36 處，係咪呀？

- 1 許健安先生：係，冇錯。
- 2 李澍桓大律師：咁我哋其實喺遠處，應該就見到即係近左手邊嗰度，上面呢，就應該見到有
- 3 一架就係你嘅升降台到咗，係咪？
- 4 許健安先生：係，冇錯。
- 5 李澍桓大律師：或者睇一睇嗰條片。
- 6 (播放短片)
- 7 [(消防車警號聲)
- 8 男聲：阿 Sir，宏昌--阿 Sir，宏昌閣火燭呀，宏昌閣火燭，好大鑊呀，我都--我都--我
- 9 屋企成... (聽不清) 煙呀，全部係煙，我屋企全部都係煙呀，屋企火燭呀。]
- 10 李澍桓大律師：跟住我哋就見到應該你嘅同事都到咗。
- 11 許健安先生：係，正確。
- 12 [女聲：阿李太，你睇下。
- 13 男聲：全部都係煙呀，10 樓燒著咗呀，我返工呀。(消防車警號聲)]
- 14 (短片播放完畢)
- 15 李澍桓大律師：頭先我哋喺片段入面見到有座大廈上面冒緊煙嘅，嗰個就應該就係宏昌閣
- 16 嘅，係咪？
- 17 許健安先生：係，正確。
- 18 李澍桓大律師：你就話去到，你剛才講到--我截停咗你嘅，你就話去到嘅時候呢，你就有居
- 19 民話畀你知，帶你去睇究竟邊度著火，係咪？
- 20 許健安先生：係。
- 21 李澍桓大律師：我想問其實你收到信息，其實或者之後呢，控制中心同你仲有冇聯絡譬如
- 22 話畀你知其實實際上係咩嘢位置或者幾多樓著火，有冇呢啲資訊畀你？
- 23 許健安先生：冇，我收到嘅信息係外牆囉，宏昌閣外牆棚架有火。
- 24 李澍桓大律師：唔。喺片段入面，我哋亦都知道你--有消防車到嘅時候當然就你同你同事個
- 25 個車輛個個警號都係響住嘅，係咪去到某一段時間其實你架車個個即係警號就已經
- 26 係閃咗--熄咗？
- 27 許健安先生：係。
- 28 李澍桓大律師：我哋亦都有見過消防處提供嘅一啲文件，其實佢係有講就話除非係必要，如
- 29 果唔係咁就應該只係著燈就唔好響號嘅，你可唔可以解釋畀我哋知以你嘅認知，
- 30 點解會有一個咁樣嘅要求？
- 31 許健安先生：我相信，因為我哋消防車去進入宏福苑嘅時候呢，我哋都係有即係響住個個警
- 32 號，...
- 33 李澍桓大律師：係。
- 34 許健安先生：...同埋個個燈號去進入宏福苑嘅，直至我哋車輛停定之後，我哋都會閃咗個
- 35 警號去嘅咁樣，以我理解，一方面就係其實個個警號個個分貝，即係如果譬如有幾
- 36 架消防車響住，其實都可能即係--有機會即係影響現場我哋個個嘅無線--即係我

1 咁通訊，因為可能會佢掩蓋咗我哋現場嗰個--我哋現場人員之間嘅溝通、通訊咁  
2 樣。同理有時喺事故裏面，我哋都會避免喺一啲唔受影響局嘅居民度，避免引起佢  
3 咁即係可能有更加多嘅恐慌咁樣樣。所以其實我哋有時一般我哋去到現場，我哋停  
4 定咗架車，當我哋落車去工作或者去部署嘅時候，我哋都--一般我哋都可能熄咗個  
5 警號呀咁樣樣。

6 李澍桓大律師：唔。講番你頭先話因為驚干擾到嗰個通訊嘅系統，我想問你同你嘅隊員喺出  
7 勤嘅時候，其實你哋主要--即係除咗近距離面對面當然會直接溝通，如果當大家喺  
8 唔嘅同位置需要聯絡嘅時候，你哋用嘅嗰套通訊系統，你可唔可以好約略講畀我哋  
9 知，其實係一個乜嘢嘅通訊系統嚟？

10 許健安先生：我哋每人都有一部無線電喺身度，我哋都會用無線電去通訊？

11 李澍桓大律師：係。我相信應該都係一個數碼化嘅，係咪呀？

12 許健安先生：係，冇錯。

13 李澍桓大律師：有冇試過喺呢啲無線電嘅通訊系統入面，尤其是去到火場一啲好惡劣嘅環境  
14 嘅時候，你有冇經驗話呢啲通訊系統可能係用唔到、接收唔到、收得唔清楚，有冇  
15 呢啲情況？

16 許健安先生：我好少--或者我有遇過呢啲問題，一般都係冇問題，正常操作。

17 李澍桓大律師：我哋知道你到咗現場，咁我想你睇一睇另外一個片段，就係一個途人應該係  
18 拍到宏昌閣外面單車徑嘅嗰個情況嘅，我相信第一就應該係有途人帶咗你嚟後面嘅  
19 呢個位置，係咪？

20 許健安先生：係，冇錯。

21 李澍桓大律師：咁我哋或者好快睇一睇呢個片段。

22 (播放短片)

23 [男聲一：喂，... (聽不清) 返上去 4 樓呀。

24 男聲二：... (聽不清)

25 男聲一：我都有... (聽不清) 呢樣嘢，唔好玩喇，點識啫？

26 男聲二：快啲走呀，火燭呀喂。

27 男聲一：喂，走喇，喂，嚟呀，嚟呀，嚟呀，消防到喇，消防到喇，見到喇，見到喇，見到  
28 喇，有消防，有消防。]

29 (短片播放完畢)

30 李澍桓大律師：我哋停一停，呢度應該其中一個就係你同埋你帶你嘅隊員，係咪？

31 許健安先生：係，正確。

32 李澍桓大律師：我哋繼續睇埋個片段，我先再問你其他問題。

33 (播放短片)

34 [男聲一：喂，燒到 8 樓喇。

35 男聲二：... (聽不清) 好高呀。喂，大鑊，喂，我哋都走喇，喂。我哋都要走喇，喂。褪  
36 後啲，褪後啲，我哋都搞唔掂喇，要走喇，褪後啲呀。嘩，大鑊。喂，大鑊樂。

1 喂，喂，大家小心呀，嘩，大家褪後啲呀。喂，仆街呀，中間著到咁樣。嘩，喂，  
2 快啲走呀，快啲走呀，走嘞，走嘞，喂，走嘞阿叔，冧緊嘞。）

3 李澍桓大律師：我相信我哋頭先先前睇你 14:57 向控制中心匯報嘅嗰個信息，應該就係睇  
4 完呢一個環境之後做嘅一個報告嚟，係咪？

5 許健安先生：係，冇錯。

6 李澍桓大律師：咁我相信好似片段咁講，其實大家都睇到當時個情況似乎都已經幾惡劣，因  
7 為有幾多雜物、竹枝其實已經開始跌落嚟，係咪？

8 許健安先生：係。

9 李澍桓大律師：我想問問一問你，因為呢度我哋知道就係宏昌閣後，即係唔係主要入口，係  
10 另一邊後門嗰度，後樓梯嗰度，當其時你有冇留意到嗰個出入口嗰個情況？

11 許健安先生：當時我大約落車一分鐘，我大約去到呢個位置，咁我見到咁樣嘅情況，咁我知  
12 道嗰度都係一個--其實係佢呢個起火點個位，即係呢個火柱呢個位置其實下面就係  
13 一個後門嚟，咁我見到就係當時已經係好大火，同埋不斷有啲嘢跌落嚟，其實嗰個  
14 後門已經係好難去進出。

15 李澍桓大律師：一陣間較後時間我會同你睇番一啲之前同之後嘅相片，不過我而家想盡量集  
16 中喺你講過畀我哋知嘅信息。我知道因為你係到場嘅最高職級嘅一個前線嘅消防  
17 員，所以就當時你就自然成為咗現場嘅指揮官，係咪？

18 許健安先生：正確。

19 李澍桓大律師：咁你見到呢個咁嘅情況嘅時候，我想了解下，即係由你講畀我哋知，你對你  
20 嘅隊員見到咁嘅情況之後，你作出咗一啲乜嘢嘅指示去做一個救援嘅工作？

21 許健安先生：當時喺面對住呢個情況，其實好快我都叫咗隊員儘快開一條嘅即係我哋叫做掩  
22 護喉，咁個掩護喉咁就過嚟希望可以控制個火勢--壓制個火勢，咁另外我亦都叫  
23 我...

24 李澍桓大律師：呢度停一停，呢個掩護喉係壓制個火勢係喺邊度射水去邊度？

25 許健安先生：希望儘快開一條喉，可以由宏昌閣嗰個嘅--即係呢個背面，其實開過嚟就係由  
26 我大埔升降台嗰邊開過嚟，希望可以儘快可以去射水去控制呢個火勢咁樣樣。

27 李澍桓大律師：係，即係嗰條喉要由你迴旋處嗰度就拉一條喉，去後面呢度？

28 許健安先生：係，冇錯，係，大錯。

29 李澍桓大律師：就希望可以控制個火勢？

30 許健安先生：係，冇錯。

31 李澍桓大律師：咁當其時其實你喺嗰一刻你畀呢啲指示嘅時候，以你所知，你係有幾多個同  
32 事到達咗現場，同埋幾多架車輛，你有冇呢啲信息？

33 許健安先生：我知道當時我一級火警個出動規模，就知道--同埋再加上我知道有搜救隊嘅嚟  
34 緊嘅當中。

35 李澍桓大律師：係。

36 許健安先生：同埋再加上有一啲嘅--因應個消防裝置有問題，所以另外有一啲額外嘅車輛，

1 大約個車輛當時我係知道--我事後就知道大約有十二架嘅消防車輛。

2 李澍桓大律師：十二架消防車輛，你所知大概去到邊一個時間？係 14--你就 14:56 到達，  
3 14:57 就做咗個匯報，咁當你嗰一刻做完個匯報嘅時候，你就住嗰一刻，我相信就  
4 要立即要向隊員作出一啲指示，去做救援嘅工作。

5 許健安先生：係。

6 李澍桓大律師：我想知道嘅就係，首先第一，你有冇一個好清晰嘅信息話到畀你知，其實而  
7 家已經在地面嘅、即係在場嘅有幾多同事，有啲乜嘢嘅工具車嚟到可以幫到你？有  
8 冇呢啲資訊不斷咁樣畀你，其實？

9 許健安先生：有嘅，即係譬如有啲車輛嚟到現場嘅時候，佢哋嘅車輛主管都會同我匯報話佢  
10 哋到場嘅。

11 李澍桓大律師：係。

12 許健安先生：咁當然，我 14:56 我到現場嘅時候，係我第一架到，咁我稍候我去番宏昌閣  
13 嘅前面正門去部署指揮，我就陸續見到其他消防車到場，咁同埋啲消防車輛嘅主管  
14 都會向我匯報話佢到場咁樣樣，同埋會進行啲乜嘢工作，包括我會話畀佢知我有啲  
15 咩嘢指令，話畀佢哋知咁樣樣。

16 李澍桓大律師：係。當然，我哋知道消防員到呢個火災嘅現場，唔多唔少應該都會有一個即  
17 係所謂先後嘅次序嘅一啲目標嘅，我嘅理解應該當其時消防員永遠第一個目標希望  
18 可以做到嘅就係去救人，可唔可以咁講？

19 許健安先生：我哋希望係滅火同埋救援。

20 李澍桓大律師：但係即係如果喺撲熄個火同喺救援，即係救人嘅工作上面，我相信個先後次  
21 序一定係擺喺救人嗰個層次上面，係咪？

22 許健安先生：同意。

23 李澍桓大律師：呢度我想你睇一睇嗰個--有一個你哋叫做 (English Spoken)，喺  
24 B2/2186 頁嘅，呢個我相信你都有機會睇過嘅一個文件嚟嘅，係咪？你熟唔熟悉  
25 呢個文件？

26 許健安先生：正確，我睇過。

27 李澍桓大律師：呢個應該可能係叫一啲常務指示咁樣嘅文件。我想首先第一樣嘢睇嘅就係喺  
28 3.1.2，咁呢度簡單啲嚟講，呢一個段落嘅意思就係話「如果當發現一個需要救援  
29 嘅地方，其實如果係佢嗰個消防設備裝置係有一個用嘅字眼叫做 (English  
30 Spoken) 嘅時候，咁我哋如果睇埋下面尤其是 (a) 細段嗰度，就其實似乎就第  
31 一，喺嗰個控制中心嗰個系統上面，就要有一個所謂叫做 (English  
32 Spoken)，係要喺你哋嗰個--應該就係你講嗰個流動嘅通訊系統嗰度要睇到嘅，  
33 係咪？

34 許健安先生：係。

35 李澍桓大律師：所以點解我哋喺頭先之前睇嘅嗰個文件上面，我哋其實見到有個信息，就話  
36 有一個 (English Spoken)。

1 許健安先生：係。

2 李澍桓大律師：但係呢個 (English Spoken) 似乎仲有一個都幾緊要嘅意思，因為如果  
3 一界定咗嗰樣嘢係一個 (English Spoken) 嘅話，其實相應就要出多一架升降  
4 台嘅車輛去現場嘅，係咪？

5 許健安先生：會多一輛泵水嘅車輛。

6 李澍桓大律師：泵 -- 即係 (English Spoken) 係主要泵車，係咪？ (English  
7 Spoken)，係咪？

8 許健安先生：我哋 -- 泵車，我哋叫。

9 李澍桓大律師：嘎，泵車，係。即係其實係 -- 所以如果當你知，或者如果控制中心有知道  
10 有一個 (English Spoken) 主要損毀嗰呢一個消防裝置系統度，就自自然然佢  
11 要安排多一架泵車到現場嘅？

12 許健安先生：正確。

13 李澍桓大律師：但係呢個就唔係由你作為現場指揮官去決定嘅，因為應有控制中心係要知  
14 道，同埋嗰好似我哋見到佢要唔同嘅分局去做出勤，去車嘅時候，就應該佢要安排  
15 埋呢個額外嘅泵車嘅，係咪？

16 許健安先生：正確。

17 李澍桓大律師：好，頭先又係打斷咗你嘅，咁你有同事到咗，你亦都觀察咗個情況，咁我想  
18 問除咗去做一個儘量控制個火勢唔好畀佢蔓延或者加劇之外，對於你其他嘅隊員，  
19 你仲畀咗啲乜嘢指示佢哋？

20 許健安先生：當時我喺元洲仔里嗰度見到咁嘅情況，跟住我就即刻叫我升降台嘅同事咁就即  
21 刻開喉，咁我最耐係叫咗佢開兩條喉嘅，即係希望喺元洲仔里嗰度可以壓制個火  
22 勢。跟住我自己就親身返番去宏昌閣嘅前面正門個位置，當我抬頭向上望嘅時候，  
23 我發現啲 -- 有好多濃煙，同埋已經去到喺個宏昌閣嘅頂部嗰度冒出嚟。咁而喺好短  
24 嘅時間之內，我都開始見到有煙，同埋有火開始沿住宏昌閣嘅背面亦都係蔓延到去  
25 宏昌閣嘅前面位置，咁亦都喺嗰 -- 都有好多燃燒緊嘅一啲雜物、竹枝、棚架，喺  
26 上面度四處飄散咁樣落嚟，咁有啲墮落嘅速度亦都好快，咁而喺突然之間，佢個  
27 宏昌閣嘅正門嗰個位置都突然之間係好大火。

28 李澍桓大律師：喺呢度我想你停一停，你到咗現場，有居民帶咗你去後面，搵到似乎我哋而  
29 家都相信係火頭嘅一個地方，喺嗰一刻其實 -- 當然你亦都講，其實去到現場嘅時  
30 候，你哋啲消防車都係著住警號，可能之後先至到咗。你哋到場嘅時候有冇物管嘅  
31 公司嘅職員出嚟同你哋即係接洽，或者去將現場嘅情況講解畀你哋知，有冇發生  
32 到？

33 許健安先生：當刻我冇接觸到有物管嘅人員。

34 李澍桓大律師：即係冇物管嘅人員主動出嚟搵你哋「阿 Sir，我哋係邊座大廈，或者我哋係  
35 管理公司嘅人」，就有呢樣嘢發生過？

36 許健安先生：冇。

1 李澍桓大律師：咁我哋有客觀嘅證據亦都似乎知道，其實當其時個消防裝置，其中一個被門  
2 咗嘅，即係熄咗嘅，就係個火警警報系統，即係個警鐘。咁我想同你確認，當你到  
3 咗現場嘅時候，即使喺宏昌閣嗰度，你有冇聽到警鐘聲？

4 許健安先生：冇。

5 李澍桓大律師：至少站住宏昌閣嗰個情況，你當時有冇即刻譬如同時間去嘗試叫你嘅隊員做  
6 一啲疏散，或者去了解究竟嗰個大廈入面嘅情況？

7 許健安先生：當我落到去，即係落咗車之後，見到咁嘅情況，其實我都係部署完後面嗰個兩  
8 條滅火喉射水。咁之後其實我係由我落車嗰刻，我聽唔到火警鐘，咁我亦都曾經嘗  
9 試想話派人入去宏昌閣，睇下會唔會係未啟動到火警鐘定係--因為好多時有時都係  
10 我哋去--因為--我哋去啟動佢個火警鐘，而當刻突--即係嗰個宏昌閣嘅後門位  
11 置，我哋好--一去到已經係根本入唔到去，咁而我返番去前面正門嘅位置都開始有  
12 好多嘅一啲燃燒緊嘅雜物跌咗落嚟，咁而嗰個情況亦都好快變得好惡劣，我哋亦都  
13 唔能夠正門入去。所以我哋係冇辦法入去宏昌閣，嘗試去啟動呢個火警鐘。

14 李澍桓大律師：唔。你講啟動，係咪即係就係你哋都係嘗試去打爛嗰個所謂叫（English  
15 Spoken）嗰塊玻璃，然後啟動嗰個系統？

16 許健安先生：係，冇錯。

17 李澍桓大律師：就住你都認為--即係你都知道，應該話有辦法去啟動呢一個火警警報系統嘅  
18 時候，你當時有冇--以你所知，即係譬如喺救火嘅一啲即係常規政策，或者一啲策  
19 略上面，有冇一啲指示畀你哋，如果喺咁嘅情況之下應該要點做？

20 許健安先生：當刻我哋同--其實去到現場，我哋同警察都有個默契，就係大家--佢會協助我  
21 哋去做疏散嘅，協助我哋做疏散，咁其實我哋當刻，我亦都有啲現場有啲警察嘅同  
22 事幫我哋喺即係地面度疏散一啲由四方八面逃出嚟嘅一啲嘅市民，去帶到去安全地  
23 方，其實呢個動作我哋消防員都有做，我哋都有協助喺四方八面走出嚟嘅一啲居民  
24 去疏散，喺地面疏散到一啲安全地方咁樣樣。

25 李澍桓大律師：你講四方八面都有居民走出嚟，個意思係即係除咗宏昌閣之外，當時喺其他  
26 嘅座數都已經有居民？

27 許健安先生：係，當時我企喺嗰個位置，我見到。

28 李澍桓大律師：係。唔好介意，我始終--因為我哋知道喺今次呢個事件上面，似乎火警警報  
29 系統係都有一個幾重要嘅角色喺度，因為佢一失效，似乎的而且確令好多居民係唔  
30 知道，或者有一個逃生嘅意識嘅，所以我純粹都仍然係想了解一啲，就係喺消防處  
31 製備嘅一啲救火嘅一啲應對嘅方案或者策略上面，就住可能--因為我相信都會有啲  
32 時間係你去到一個現場，但係其實個火警鐘嗰個系統可能係失效，冇辦法啟動嘅，  
33 係咪？

34 許健安先生：係。

35 李澍桓大律師：喺呢啲咁嘅情況，其實純粹講一般嘅情況，你所知即係一啲指引要你哋去處  
36 理，通知一啲居民去逃生嘅時候，有冇一啲既定嘅方案係教你哋應該要點做？

- 1 許健安先生：冇好明確特別去寫出嚟。
- 2 李澍桓大律師：唔。即係其實都係好靠你哋現場嘅指揮官或者同事去諗，睇下有乜嘢方法可  
3 以做到，可唔可以咁講？
- 4 許健安先生：我哋都--根據我哋現場嗰個嘅即係具體嘅實際現場環境，我哋去做部署或者去  
5 做一啲嘅行動咁樣樣。
- 6 李澍桓大律師：唔。當然，睇下你可唔可以同意，即係我相信如果喺嗰個策略或者政策上面  
7 能夠再畀多啲指引你哋，我相信對於你哋做前線嘅工作嘅同事應該會多好多幫助，  
8 係咪？
- 9 許健安先生：同意。
- 10 李澍桓大律師：我哋知道每一個消防車上面亦都應該有一個即係所謂大聲公嗰啲廣播系統  
11 嘅。當其時，當然呢個正如我剛才所講，呢個唔係一個批評，但我哋希望可以了解  
12 下係咪一個可行嘅方法，有冇可能係當時用你哋車輛上面嘅所謂大聲公去做一啲廣  
13 播，叫啲居民疏散？
- 14 許健安先生：呢個當日我哋正如你咁講，即係都係一個工具，咁但係當刻嗰個--當日嗰個實  
15 際現場環境，當見到嗰個火勢係咁大嘅時候，其實我已經立即部署消防喉。
- 16 李澍桓大律師：係。
- 17 許健安先生：同埋當時我現場到咗場嘅車輛同埋人手資源，我都主要係用於去鋪喉，同埋去  
18 開街井攞水，同埋去進行滅火，而火勢都好短時間之內蔓延得好快，咁我自己亦都  
19 係--我以前都未遇過。
- 20 李澍桓大律師：係。
- 21 許健安先生：咁而佢不斷--佢燃燒緊嗰啲嘅--當時現場環境都好嘈其實，佢燃燒緊嗰啲嘅竹  
22 枝、棚架發出嚟嘅聲音，咁同埋佢不斷上面都有嘢跌落嚟，即係嗰個大聲公都已經  
23 發揮到我哋--即係影響到嗰個效果，咁最主要就係當時我哋好大量嘅人手資源都部  
24 署咗喺滅火嗰度咁樣樣。
- 25 李澍桓大律師：同埋我相信你之前都有講過，另外一樣嘢你都要確保你同你嘅隊員喺通訊上  
26 面即係始終又係唔好影響到，因為嗰個我相信都係重要嘅考慮，係咪？
- 27 許健安先生：喺--係，但係喺大聲公呢個作用就...
- 28 李澍桓大律師：另外，我就知道喺 15:02 嘅時候，就即係大概喺事發六分鐘，其實就已經  
29 將個--如果我哋睇 5090 頁，B10，咁我哋知道喺大概十分鐘之後，我哋就知道你  
30 將嗰個火警就升為三級，係咪？
- 31 許健安先生：係。
- 32 李澍桓大律師：當然，我一陣間會再同你睇消防處嘅一啲指引嘅，但係當其時你有冇一啲特  
33 別因應現場嘅考慮，而決定要將呢個火勢升為三級？
- 34 許健安先生：有嘅。咁我當時我--當時個環境去到大約 15:02 嘅時候，其實我見到宏昌閣  
35 其實喺唔同嘅樓宇嗰個嘅面都已經有火蔓延，咁其實成個大廈都好似畀啲濃煙或者  
36 火去包圍住咁樣，咁亦都有蔓延嘅趨勢。同埋就係我留意到就係即係宏昌閣嗰個前

1 門同埋正門--後--嘅門口位置都畀一啲嘅跌落嚟嘅雜物去令人冇辦法去進出，咁我  
2 預期裏面會有大量嘅居民去待救。咁以我當時嗰個嘅資源同埋人手，係冇辦法應  
3 付，所以我當刻就決定將火警升為三級火警。

4 李澍桓大律師：而家呢度我哋睇 B2 嗰個文件冊 2088 頁，其實我哋可以等大家都了解一下  
5 大概乜嘢情況之下，似乎都有啲指引係講幾時應該係將個火警升級嘅。我哋知道你  
6 出勤嘅時候，當其時就係宏福苑就係處於所謂叫做一級火嘅情況，係咪？

7 許健安先生：正確。

8 李澍桓大律師：所以我哋見到 2088 頁最頂嗰度就係 (English Spoken)，我反為留意  
9 到，雖然呢次宏福苑嘅事件其實從來冇去過二級火嘅，因為一跳就跳咗上三級。但  
10 係其實我睇番二級火，嚟點樣界定即係控制中心去出第一個 call 嘅時候，係咪一  
11 級定係二級嘅話，我見到入面有啲因素，其中就係 (c) 細段嗰度，佢就話如果嗰個  
12 供水嗰度係受到限制嘅時候，咁似乎其實就應該要一出嘅時候就應該係用二級火嚟  
13 出嘅。以你所知呢個就住所謂供水有限制，其實係講緊一啲乜嘢嘅情況？

14 許健安先生：我哋呢個文件裏面嗰個二級火警嘅 (c) 分類嗰個供水受限制嗰個嘅，一般我  
15 哋係講緊係一啲可能係偏遠地區，即係一啲嘅比較村郊嘅地方，咁佢嗰個嘅供水地  
16 方可能係離嗰個街井比較相當上附近嗰個供水有機會係冇咁有受限嘅時候，我哋就  
17 會將呢一類嘅位置就定為二級火警嘅裏面嘅 c 分類咁樣樣。

18 李澍桓大律師：係，咁喺嗰個情況，即係當日你見到嘅時候就係似乎一級火，然後你去到  
19 嘅時候就覺得個火勢已經開始係變大，所以你就將佢升為做三級。但係如果我哋睇  
20 番 2088 頁呢個文件，就似乎其實佢個要求就純粹就係話，如果你喺現場發覺初步  
21 到場嘅人員冇辦法處理到嘅話，就應該要升格做三級，係咪咁樣嘅理解？

22 許健安先生：當嗰個一級火警嗰個出動嘅資源同埋人手唔能夠有效控制嘅時候，就應該儘快  
23 將火警升級，所以我同意你講法。

24 李澍桓大律師：即係換句話說可唔可以咁理解，就係你當其時作為現場嘅指揮官，喺你所知  
25 現場有嘅資源，包括車輛，包括救援人員，即係消防員同事，你都認為當其時嗰個  
26 調配其實係唔足以應付嗰個火警，係咪？

27 許健安先生：係。

28 李澍桓大律師：所以你就將佢升咗做三級。喺我哋其實見到，好快其實我哋見到有跟住第四  
29 級、第五級，亦都喺如果 2089 頁，我哋見到有一個其實第 (ix) 段嗰度，其實就  
30 係一個--應該係咪仲有一個叫災難級嘅一個火警警報？

31 許健安先生：係。

32 李澍桓大律師：當然，我嘅理解應該今次宏福苑呢個火災就有去到呢一個級別，係咪？

33 許健安先生：冇。

34 李澍桓大律師：係。另一份文件我想你睇嘅就係 B9 嗰個文件冊嘅，咁就如果我哋睇 4853  
35 頁，咁呢個似乎就係講緊即係一啲救火嘅一啲指引，應該點樣去--乜嘢情況嘅時候  
36 去將個火警係升級嘅，係咪？

- 1 許健安先生：係。
- 2 李澍桓大律師：我相信你都熟悉呢一個咁樣嘅文件嘅，係咪？
- 3 許健安先生：係。
- 4 李澍桓大律師：喺呢個文件上面，其中 4858 頁，我哋就似乎都見到有啲睇法，就係話
- 5 3.1.1 呢一段，佢就話“(English Spoken)”，所以點解我頭先問你，即係
- 6 我話似乎消防嘅首要任務當然就盡量去救人，係咪？
- 7 許健安先生：係。
- 8 李澍桓大律師：如果你睇呢一段後面仲有一部分，佢就話“IC”，我知道就係即係
- 9 (English Spoken)，即係當其時你嘅職責，係咪？
- 10 許健安先生：係。
- 11 李澍桓大律師：現場指揮。咁佢呢度就有講，如果我哋讀尾嗰部分就係“(English
- 12 Spoken)”，咁即係話其實呢度都畀到一啲指引你，係喺乜嘢情況之下你應該要
- 13 將個火警升級嘅，係咪？
- 14 許健安先生：係。
- 15 李澍桓大律師：喺呢一個宏福苑，我知道你係大概即係做咗呢一個(English Spoken)
- 16 嘅 post 應該就係半個小時嘅，係咪？
- 17 許健安先生：大約，係。
- 18 李澍桓大律師：因為我哋知道有跟住你哋嘅局長就到場，喺 15:04 嘅時候就應該係佢代替
- 19 咗你做現場嘅指揮，係咪？
- 20 許健安先生：佢正式接管咗指揮應該係...
- 21 李澍桓大律師：15:19。
- 22 許健安先生：係，冇錯。
- 23 李澍桓大律師：即係 15:04 佢到場了解咗個情況--15:04 佢接到要求要佢到場，15:19
- 24 嘅時候佢就到場，然後去從你手上做咗現場指揮官嘅呢個工作，係咪？
- 25 許健安先生：係。
- 26 李澍桓大律師：喺呢一度我想再了解多少少關於當時嗰個情況，因為喺 14:57 你觀察完，
- 27 亦都安排咗一啲同事去做一啲嘗試控制，亦都去了解個情況。你嘅證人口供其實你
- 28 有講到大概去到 15:00 嘅時間，其實你就係留意到個火除咗喺宏昌閣之外，同埋
- 29 宏昌閣對出嘅空地，其實就似乎宏泰閣嘅底層位置都已經著火，係咪？
- 30 許健安先生：係，當時我留意到宏泰閣有一片棚網大約有零星嘅幾點火光咁樣樣。
- 31 李澍桓大律師：喺呢一刻當其時宏泰閣嗰個火勢係你自己親眼睇到定還是係有現場嘅同事向
- 32 你報告？
- 33 許健安先生：我自己睇到。
- 34 李澍桓大律師：喺呢度我哋了解到當然宏福苑其實係一個都幾大範圍嘅屋苑，亦都有八座
- 35 嘅大廈，喺你作為現場指揮官，我相信其中一個你一定需要知道嘅就係現場整個環
- 36 境一啲即時嘅情況，係咪？

1 許健安先生：係。

2 李澍桓大律師：同樣地我想了解下救火上面制定嘅一啲政策或者策略。喺你去到現場嘅時  
3 候，人手上面能唔能夠令到你可以話派幾個同事可能喺附近嘅環境，未必係直接進  
4 行救援嘅工作，但係要佢哋做一啲觀察，尤其是當你見到宏泰閣都似乎開始著火，  
5 有一個蔓延嘅跡象嘅時候，人手上面可唔可以容許到你可能俗話講，即係搵一啲觀  
6 察員淨係留意住嗰個火勢嘅發展，可唔可以做到呢一點？

7 許健安先生：喺一般嘅一級火警裏面嗰個嘅事故入面呢，嗰個規模其實我哋都有空間可以做  
8 呢樣嘢喺入面。

9 李澍桓大律師：係。

10 許健安先生：但係當日 26 號宏福苑嗰個情況係個火勢好大，之前我自己亦都有遇過--即係  
11 未曾處理呢一類火警，現場當時嗰個受火警影響嘅範圍好大，而當時我手上面嘅資  
12 源或者人手佢哋都有各自嘅任務去做咁樣樣。

13 李澍桓大律師：即係所以就冇辦法話可以搵到有其他同事去觀察住四周圍嘅情況向你匯報？

14 許健安先生：當刻我有。

15 李澍桓大律師：即係我哋都係嘗試睇番即係從事件上面做一啲反省、檢討，然之後睇下會唔  
16 會做得好啲。如果係呢啲大型嘅屋苑發生一啲火災，去到某一個位置嘅時候、某一  
17 個時間你覺得，你作為現場指揮官如果有呢一啲咁樣嘅觀察員，甚至乎可能用一啲  
18 科技，無人機拍攝到情況嘅情況即時畀到你睇嘅，其實你覺得對於調配人手上面，  
19 安排工作上面會唔會有幫助？

20 許健安先生：同意。

21 李澍桓大律師：當然呢個就可能要更高層嘅人士去考慮點樣改善呢個情況。喺當其時我哋知  
22 道另一個可能唔係咁開心嘅話題，就係關於你嘅同事何偉豪先生嘅。我哋純粹將個  
23 背景交代番先，因為應該就係去到現場嘅時候，就係控制中心嗰方面應該已經收到  
24 兩個求助嘅--或者三個添，因為一個就係宏昌閣 2701，應該另外仲有就係起碼宏  
25 昌 2703 同埋 802 都似乎有一啲求助嘅需要。喺當其時呢啲求助嘅要求，控制中心  
26 係透過乜嘢方式去話畀你知？

27 許健安先生：當時我係透過無線電知道。

28 李澍桓大律師：即係會有一個打入去控制中心，譬如話 999 居民要求助，佢哋就係用無線  
29 電，即係由控制中心直接將呢啲資訊話畀你知？

30 許健安先生：係，冇錯。

31 李澍桓大律師：當然我知道呢個可能係當時資源上面好奢侈嘅一個做法。其實對於你作為一  
32 個現場指揮官，變咗你要應付嘅嘢都幾多，因為你除咗要調配現場嘅同事去做啲乜  
33 嘢外之外，其實冇即係另外一個同事專責去接收呢啲訊息，然後再向你匯報，係  
34 咪？

35 許健安先生：其實當時亦都有一隊搜救隊，咁佢搜救隊其實佢就係喺一啲火警事故入面就係  
36 專責去處理求助個案一啲隊伍嚟嘅，但係當時我了解到就係喺大約 15:03 嘅時

1 候，嗰個搜救隊佢仲係（English Spoken）嚟緊，又或者可能只係啱啱到場咁  
2 樣樣，所以當刻我除咗兼顧滅火之外，我亦都要兼顧埋呢啲求助個案。

3 李澍桓大律師：因為你係現場嘅指揮官，我相信就算搜救隊嚟咗，基本上佢哋去做啲乜或者  
4 去邊度做搜救，係唔係都應該由你去畀指示等佢哋去做？

5 許健安先生：一般嚟講，搜救隊嘅組成佢本身都已經有一位主任級人員去擔任搜救隊嘅隊  
6 長，所以搜救隊隊長佢本身都已經可以有權力去分派佢手上面一啲嘅呼吸器隊去做  
7 呢啲求助個案，但係當然佢亦都會向現場嘅總指揮去保持溝通。

8 李澍桓大律師：因為究竟佢哋係唔係譬如安全進入或者你哋當時會唔會採取緊另外一啲滅火  
9 嘅行動，咁呢個都可能冇啲時間會係需要配合，所以佢點都一定要同你溝通，係  
10 咪？

11 許健安先生：同意。

12 李澍桓大律師：但係就住消防員何偉豪先生嗰個工作指令，我哋知道就當其時係唔係應該係  
13 你畀呢個指示出去，派一個搜救隊去宏昌嗰度嘗試做救援，係唔係你畀嘅指示嚟  
14 㗎？

15 許健安先生：係。

16 李澍桓大律師：同樣地你畀嘅指示係唔係都係純粹靠即係無線電就去發放一個訊息出去，咁  
17 就等人哋接應你嗰個指示，係唔係咁樣嘅情況？

18 許健安先生：一般嚟講係，但係因為當時我指派嗰個隊長佢喺我隔離，所以我即係面對面同  
19 佢講。

20 李澍桓大律師：正如你剛才所講，即係我亦都講過，宏福苑都係一個幾大嘅屋苑，亦都牽涉  
21 八座大樓，亦都由於因為佢進行緊維修，我哋事實上有啲片段都睇到其實要認邊一  
22 座係邊一座其實都似乎有啲困難嘅，你當其時有冇呢一個咁樣嘅困難？

23 許健安先生：當時本身我知道係邊一個樓宇係乜嘢嘅，但係我承認--我同意就係喺大維修階  
24 段佢鋪咗好多嘅棚網，所以係有機會，但係我係知道佢啲座。

25 李澍桓大律師：尤其是即係你自己本身就因為係屬於大埔分局，你都講即係相對地對呢個老  
26 牌屋苑你都可能叫做熟悉啲，但係如果可能因為亦都有好多時間其實係需要由第二  
27 個環頭嘅消防局調派啲同事過嚟幫手，好似喺今次呢個情況入面，我哋知道有馬鞍  
28 山、有沙田，甚至乎港島區嘅消防車都應該係有派員喺唔同時間到宏福苑嘅，係  
29 咪？

30 許健安先生：係。

31 李澍桓大律師：同樣地即係又係事後做一個檢討。如果當日現場能夠有一啲指引或者話甚至  
32 乎有資源可以畀到你哋，消防處或者警方喺一啲適當位置樹立番一啲指示牌，即係  
33 起碼你哋自己同事會分得到邊一座打邊一座嘅，呢個對於你調派或者同事喺實地工  
34 作嘅時候，你覺得會唔會有幫助？

35 許健安先生：你意思係指喺現場度立即樹立一啲嘅...

36 李澍桓大律師：可能路標或者一啲指示牌。

1 許健安先生：喺現場立即做？因為其實據我所知後期嘅時候，我哋有一啲流動指揮車到場，  
2 其實我哋有更高層次嘅一啲指揮官，佢哋喺指揮車上面都有一啲嘅部署，我相信呢  
3 啲地理位置，座數呢啲佢哋都會係知道同埋會有標示出嚟。

4 李澍桓大律師：但係我講緊嘅就係在地，即係前線真係你嘅同事要可能進入某一座大廈進行  
5 拯救、進行救火嘅時候，即係好老實講我自己有去過兩次現場做視察，其實我當時  
6 邊一座打邊座，如果你淨係畀個地圖我，其實我自己都有辦法分得到。咁你覺得即  
7 係如果能夠當時有一啲方案制備得到，起碼令尤其是其他分局未必去過宏福苑嘅同  
8 事，即係你叫佢去 A 座嘅，起碼佢都自己有個有地標話到畀佢知呢座係 A 座定 B  
9 座，你覺得其實呢一個都係唔係一個可以考慮喺將來大型屋苑入面一個可行嘅方  
10 案？

11 陸啟康法官：我諗你可唔可以講實在啲？唔可以救緊火嗰陣時我哋再擺路標，擺易拉架唔可  
12 能。其實應該--但係今次當然即係我哋都知道其實何消防員唔好彩，即係佢其實諗  
13 住去宏昌，就去咗宏泰。但係其實喺咁嘅情況之下，我哋調好多區嘅人嚟到，其實  
14 呢個錯誤有陣時好難避免，或者你諗唔諗到有咩嘢方法可以避免得到？

15 許健安先生：其實就住呢個屋苑今次發生呢個火警，其實正如我哋一開始喺我哋當區嘅消防  
16 局有製作緊急預案，咁呢個預案裏面其實我哋都有即係一啲（English  
17 Spoken）話到畀大家知就係佢每一座數嘅位置、名稱，我哋呢個預案其實喺當初  
18 製作完成，我哋都有將佢傳達畀我哋總區裏面每一個消防局都知道，所以透過佢哋  
19 日常嘅訓練講堂，亦都係有機會去接觸到。再配合我哋車輛上面有車輛終端機，畀  
20 個主管去了解，亦都會將呢個訊息可能車輛裏面其他隊員都會發放畀佢哋。咁當  
21 然譬如好似頭先主席或者律師講到，就係話如果有更加多一啲嘅工具或者一啲嘅資  
22 源喺現場度，對於每一個大廈去做標示，當然多啲資源或者多啲嘢係更加理想、更  
23 加好嘅，呢個我絕對同意。

24 李澍桓大律師：另外，我哋知道首先何偉豪先生，就係因為我哋有證據睇到其實佢之所以入  
25 錯咗個大廈其中一個原因，其實就係佢中間嘅時候停低咗去幫助一個似乎坐輪椅嘅  
26 居民，所以令到佢同同行隊員就走失咗，入錯咗一座大樓。但係我知道--想講番個  
27 個程序上面，就係當佢入去進行搜救嘅時候，其實係唔係應該每一座大廈入面，即  
28 係進入個火場嘅時候，其實應該有個叫做入口嘅指揮主任（English  
29 Spoken），係唔係有呢樣嘢？

30 許健安先生：係。

31 李澍桓大律師：個目的就係佢要記錄邊一個消防員入咗去，呢個係第一個作用，係咪？

32 許健安先生：係。

33 李澍桓大律師：第二樣嘢亦都係最重要嘅，就係因為佢哋戴個呼吸系統，即係你哋所謂叫  
34 個餹BA 其實係有個時間嘅限制，係咪？

35 許健安先生：係。

36 李澍桓大律師：所以其實出面嘅呢一位入口指揮主任，其實佢就係負責去監察住當某一個同

1 事個 BA 可能就嚟簡單啲講就係有氧氣嘅話，咁就要叫番佢出嚟離開個火場，係  
2 咪咁嘅意思？

3 許健安先生：係。

4 李澍桓大律師：喺呢一個事件入面睇下你幫唔幫我哋。首先，就似乎何偉豪入去嘅時候，  
5 佢應該係有一個紀錄去睇到佢曾經入過火場，你知唔知點解會咁樣發生？

6 許健安先生：當刻喺火警初期嘅時候，呢個入口指揮其實係未設立，咁係因為我當初處理呢  
7 個求助個案 2701 嘅時候，其實我哋都有指引，就係除非現場總指揮係有另外嘅或  
8 者呼吸器總指揮有一啲其他嘅指示，如果唔係一般嗰個搶救車嘅主管佢就會係要設  
9 立呢個入口指揮。咁知道就係佢呢一個車間，佢最耐其實係因為宏昌閣一啲雜物阻  
10 擋啲入口，佢哋係未能夠成功進入大廈入面，佢哋當時仍然係喺嗰個外圍嘅位置，  
11 即係宏福苑外圍嘅位置，佢哋當時係做滅火，希望儘快打開一個缺口可以入去大廈  
12 裏面處理呢個大廈求助個案，所以當刻佢哋係未進入呢個大廈裏面，所以當時呢個  
13 入口指揮係未設立。

14 李澍桓大律師：但係當然我哋知道其實就算原本都係諗住如果佢跟個指示，你畀嘅指示就係  
15 去宏昌閣 2701 度做一個拯救，係咪？

16 許健安先生：係。

17 李澍桓大律師：所以係唔係宏昌嗰陣時當時都未有呢個入口指揮主任即係駐守喺嗰個大廈度  
18 做呢啲咁樣嘅監測或者記錄嘅工作？

19 許健安先生：當刻喺呢個搜救隊進入去現場嘅時候，處理呢個求助個案，佢哋係未設立個入  
20 口指揮，因為佢哋根本都未能夠進入呢個宏昌閣裏面去到做工作。

21 陸啟康法官：所以宏泰就更加冇，因為宏泰嗰陣時都未去做嗰個拯救工作，係咪？

22 許健安先生：係，冇錯。

23 李澍桓大律師：首先如果咁樣，我想了解下，係唔係即係話--因為我哋知道何偉豪先生其實  
24 去到最後入咗宏泰，亦都上咗大概 30 樓嘅。喺嗰刻如果係咁嘅話，即係其實唯一  
25 一個有人到火場或者入到大廈去做拯救嘅，其實就係得何偉豪先生，因為如果咁樣  
26 根據你嘅講法，宏昌其實係未有消防員可以進入到嗰個大廈入面，係咪？

27 許健安先生：同意，我理解係。

28 李澍桓大律師：喺剛才我哋所講 15:19 嘅時候，就係你大埔消防局嘅局長就到場，你做咗  
29 一個匯報，就你主要匯報咗有幾樣嘢嘅，其中樣嘢就係關於何偉豪先生，因為應該  
30 喺嗰陣時你就已經收到有一個所謂佢求救 (English Spoken) 嗰個資訊，係  
31 咪？

32 許健安先生：係。

33 李澍桓大律師：所以我個理解，就係雖然就由張局長取代咗你去做現場指揮，但係你就應該  
34 係繼續負責做嘗試拯救呢位同事嘅嗰個救援工作，係咪？

35 許健安先生：正確。

36 李澍桓大律師：係唔係你負責做主導嗰個拯救嘅行動？

1 許健安先生：係。

2 李澍桓大律師：就住當其時嗰個拯救嘅情況，我想你講畀我哋知你大概做咗啲乜嘢或者畀吃  
3 啲咩嘢指示出嚟？

4 許健安先生：當刻我喺無線電度聽到有一個咁嘅求助個案，其實我當時我唔了解佢個身分，  
5 我淨係聽到佢即係喺 30 樓被困，我亦都唔知佢喺邊一個大廈其實。當時宏昌閣嘅  
6 火勢係最大，其實當時宏昌閣就即係濃煙包圍住，亦都好大火，所以佢大機會會喺  
7 宏昌閣度，所以當刻我成立咗四隊嘅一個緊急應變隊，其後其實都有第五隊，佢哋  
8 都係準備進入個大廈裏面去處理呢個（English Spoken）嘅一個工作，當刻宏  
9 昌閣係礙於火勢，同埋不斷跌落嚟嘅竹枝、棚架係阻擋咗嗰個出入口，我哋都唔能  
10 夠成功進入，所以佢哋當刻有啲會係救火，希望可以係儘快打開一個缺口可以進入  
11 到去。

12 李澍桓大律師：喺呢度停一停你，如果係咁樣，當你收到何偉豪發出嘅求救訊息話喺某一座  
13 大廈嘅 30 樓入面，你當其時覺唔覺得驚訝，就係因為如果照你喺地面作為指揮  
14 官，或者當時嗰個訊息應該係有消防員--宏昌就入唔到去，其他嘅大廈就應該唔會  
15 有消防員進入到去，即係你會唔會嗰一刻都覺得驚訝，點解佢會去咗一個大廈入  
16 面？

17 許健安先生：當刻我係有啲意外點解即係喺一個火勢咁嚴重、惡劣嘅一個大廈入面，佢可以  
18 咁短時間咁快去一個咁高嘅位置。

19 李澍桓大律師：喺嗰個拯救行動入面除咗你之外，其實仲有幾多同事係參與嘗試去拯救何偉  
20 豪嗰個行動？

21 許健安先生：當時大約有五至六隊車，佢就係都一齊去處理呢個求助個案，但係其實當刻大  
22 家現場都知道呢個消息，其實大家都--有啲畀我指派咗去做緊急應變隊，其實其他  
23 消防員有啲佢哋都已經係儘快去射水，喺個宏昌閣入口度儘快想撲滅嗰個火勢，可  
24 以成功入到去。

25 李澍桓大律師：如果用數目，人數嚟講，即係同事嘅人數嚟講，有幾多人係參與去做呢個拯  
26 救？即係唔好理佢乜嘢隊伍或崗位。

27 許健安先生：當時我諗十幾個--二十個，係，大約，因為我唔係好...（聽不清）

28 李澍桓大律師：喺小休前我想問埋你嗰個問題先。就係由於當其時佢自己都講唔到身處喺邊  
29 度，你亦都唔預計其實有人會入到個大廈入面，就住嘗試第起碼第一件事去搵番佢  
30 喺邊度，呢一個工作上面你有冇當其時畀咩嘢指示去處理，即係採取啲咩嘢行動去  
31 嘗試（English Spoken）番佢？

32 許健安先生：當時其實我都有去回應佢，即係睇下去了解，你究竟你係邊一個同事去發出呢  
33 個訊息，但係佢冇回應，所以之後我就做咗我頭先所講嘅一啲工作，去嘗試做一個  
34 拯救咁樣樣。

35 李澍桓大律師：即係唔好介意我咁講，即係話其實當時去邊度搵番佢，你哋都有頭緒，唔知  
36 去邊度搵佢？因為都仲有七座大廈。

1 許健安先生：同意。

2 李澍桓大律師：主席，我會照落去下一個議題，可能而家係適合嘅時間。

3 陸啟康法官：十分鐘夠唔夠休息？

4 李澍桓大律師：夠。

5 陸啟康法官：咁我哋休息十分鐘。

6

7 11 時 19 分聆訊押後

8 11 時 29 分聆訊恢復

9

10 陸啟康法官：係，請繼續。

11 李澍桓大律師：許先生，我哋知道你 15:02 就將個火警升級，升做為三級，我亦都聽過你-  
12 -即係我哋都聽過你講，其實你之前當然都未有經驗處理宏福苑咁樣咁大型嘅火災，  
13 我相信你好多嘅上司比你冇經驗嘅人亦都可能冇處理過嘅。所以我嘗試而家跟住落  
14 嚟問你嘅一啲問題呢，就係希望可以睇下--檢討，睇番當時做嘅一啲決定會唔會可  
15 能有改善嘅空間。所以第一樣嘢，就係去到現場當你睇到--14:57 見到喺宏昌個  
16 個火勢你都形容燒得好猛烈，已經燒咗 8、9 樓咁高嘅時候，喺嗰一刻你有冇諗過  
17 或者而家睇番轉頭，你覺得係咪應該當其時就立即將個火警升格做三級呢？

18 許健安先生：我當時 14:56 到場，其實去到後面大約我諗一分鐘嘅，我做咗一個評估，跟  
19 住然後之後再做一啲部署，跟住大約喺我到場之後六分鐘我就將火警升級，15:02，  
20 其實如果而家事後睇番，當然如果我知道個結果係咁樣嘅話，當然我落車我就會  
21 即刻去做呢個火警升級嘅動作咁樣嘅，當然越快會越好。

22 李澍桓大律師：就住我哋頭先睇個指引，即係有啲文件，就純粹就話如果去到現場你有辦  
23 法處理到就升級咁，你覺得就住呢一個咁樣嘅指引，對於你作為前線，尤其是要做  
24 指揮官呢個角色嘅時候，幫唔幫到你，定還是你覺得多啲較為實際嘅一啲嘢畀你，  
25 會令你更加易去做呢個決定？

26 許健安先生：其實我覺得個指引都畀咗--即係提供咗好多一啲指引或者一啲一個判斷，喺現  
27 場嘅指揮去做一個--根據個實際環境去做判斷，其實佢裏面都有講到就係話如果唔  
28 能夠有效控制個火勢，其實佢係可以選擇升級。我覺得佢都畀到指引畀現場總指揮  
29 去做一個--有一個彈性去根據現場實際情況去做一個判斷。

30 李澍桓大律師：除咗我哋睇到嗰句，「你處理唔到嘅就升級」嘅呢一句咁樣咁簡單嘅說話之  
31 外，喺你個訓練或者你日常工作，有冇另外一啲指引係畀過你，譬如你要考慮嘅乜  
32 嘢情況先至去做唔做升級嘅呢個決定㗎？定還是就係得嗰一句「初步到場處理唔到  
33 就升級」咁？

34 許健安先生：其實都會除咗喺一個即係入職訓練，其實都會睇番啲佢教啲指引，再配合之後  
35 嘅一啲經驗，或者都會知道就係其實都要睇番就係當時實際個情況，其實嗰個車輛  
36 嘅人手同埋個現場資源能唔能夠真係可以控制到現場嗰個具體情況。

- 1 陸啟康法官：同埋我諗你都要少少時間去觀察咗個環境你先可以作出呢個判斷，你唔可以一  
2 落車就升級㗎，係咪？
- 3 許健安先生：同意。
- 4 李澍桓大律師：當然，我哋知道就其實都有一個重要嘅指引畀到你哋，就係如果你有疑問、  
5 有懷疑嘅時候，就應該寧願做咗個升級嘅決定就好過唔升級，係咪咁樣嘅做法？
- 6 許健安先生：同意。
- 7 李澍桓大律師：你亦都講，其實去到好早嘅時間，你已經察覺到其他嘅座數都已經開始似乎  
8 有蔓延跡象嘞。而家睇番轉頭你覺得應唔應該早啲做去疏散嘅呢一個決定呢？
- 9 許健安先生：如果根據即係今時今日咁樣去睇嘅話，當然儘早做疏散會係越理想。
- 10 李澍桓大律師：就住你話最先留意到除咗宏昌，跟住就係宏泰都開始即係燒著咗嘞有啲地  
11 方，喺當一刻可唔可以解釋一下點解冇做到一個起碼疏散宏泰嘅個決定？
- 12 許健安先生：因為其實由我 15:00 發現到佢有幾點火光嘅時候，嗰下望到，咁當時我大部  
13 分手上面嘅資源就係佢去集中處理宏昌閣當時個火勢係好大喇，同埋佢嗰個入口位  
14 置係好大火。咁其實當時我大量資源去做咗呢個滅火嘅工作，而我亦都見到其他樓  
15 宇亦都有我哋有消防人員同埋警察喺現場，大家都--喺附近大廈走出嚟嘅居民都疏  
16 散去--帶去一個安全嘅地方，因為畢竟有一啲嘅...
- 17 李澍桓大律師：但係個問題就係，即係當然有啲居民可能就落嚟睇熱鬧又好，乜都好喇，就  
18 走出嚟，但係我哋知道宏泰都係有嗰個火警警報系統嘅，首先第一樣嘢，你有冇派  
19 人，譬如嘗試入去當其時叫佢著咗警報系統，通知啲居民去做疏散，起碼就住宏  
20 泰？
- 21 許健安先生：當時其實我有叫隊員喺--即係當我見到火勢開始蔓延，咁有叫啲隊員去附近，  
22 去啲大廈度嘗試啟動警鐘去做一個--啟動火警鐘，我事後知道我當時係有一啲隊員  
23 係進入宏建、宏新同埋宏道嘗試去打爛火警鐘，即係打爛個拎手，希望啟動火警  
24 鐘，但係唔能夠成功，所以嗰刻開始我就知道，似乎宏福苑嗰個火警鐘好似有問題  
25 嗰咁樣樣。
- 26 李澍桓大律師：係大概乜嘢時間你係知道個火警警報系統...
- 27 許健安先生：大約三點--可能三點七、三點八嘅咁樣樣，即係大約呢啲時間。
- 28 李澍桓大律師：三點八，即係你意思係已經由張局長做咗嗰個現場指揮官之後，係咪呀？
- 29 許健安先生：係。
- 30 李澍桓大律師：以你所知呢件事有冇報告到畀張局長知話其實個警報系統似乎好多座大廈都  
31 失效？
- 32 許健安先生：我唔記得，但係佢都應該係有留意到，佢應該知道。
- 33 李澍桓大律師：唔。另一個問題就係我想問一問關於個水壓嘅問題。因為似乎就係有證據顯  
34 示到你哋去到現場嘅時候，係咪嗰個消防喉嗰個水壓其實係唔足夠？
- 35 許健安先生：我有聽過呢個講法。
- 36 李澍桓大律師：首先我想問你喺嗰個消防系統上面，如果即係我哋知道每一座嘅天台都有一

1 個所謂叫做消防缸，嗰度如果有水或者冇水，對於你哋救援，即係救火嘅工作有冇  
2 影響㗎？

3 許健安先生：當刻救火有冇影響？

4 李澍桓大律師：嘅。

5 許健安先生：我哋如果有使用到大廈裏面嗰個嘅消防栓／喉轆系統，咁就唔會有影響，因為  
6 我哋最主要都係喺外面靠我哋消防車個泵去將啲來水去加壓，去做滅火。

7 李澍桓大律師：係，但係如果要進入火場入面，你哋嘅用話，我諗就叫做「打火」，要入去  
8 打火嘅時候就應該好多時要用到消防栓嗰個供水系統，係咪？

9 許健安先生：係。

10 李澍桓大律師：我哋知道供水嘅來源有兩個，一個就喺街喉入去個大廈就加壓上去個消防  
11 栓，另外一個供水系統就似乎就喺天面嗰個水缸嗰度嘅。先講個天面嘅水缸，即係  
12 如果嗰度係冇水嘅話，對你哋入去火場打火嗰陣時有冇一個影響㗎？

13 許健安先生：一般如果我哋要進去火場裏面--大廈裏面做救火，我哋都會使用佢個消防栓／  
14 喉轆系統，如果你話個水缸冇水嘅話，係絕對有影響。

15 李澍桓大律師：係。咁第二樣嘢就係街喉供水入去個加壓泵，然後泵上去啲消防栓嗰個系  
16 統度，係咪？

17 許健安先生：係。

18 李澍桓大律師：即係同樣地，如果個加壓泵係唔運作嘅話，我相信就會有一定嘅影響，喺初  
19 期起碼，係咪？

20 許健安先生：如果我哋當刻入到去大廈裏面做一個使用消防栓／喉轆系統去做救火嘅話，絕  
21 對係有影響。

22 李澍桓大律師：係，但係如果真係個加壓泵係壞咗或者熄咗嘅話，消防係咪可以有另外一啲  
23 額外嘅工具令到個水壓都加大番㗎？

24 許健安先生：我哋係可以靠我哋嘅消防泵車或者供水車輛嘅本身嗰個泵去做加壓，但效果一  
25 入定係冇本身嗰個大廈裏面嗰個--如果有嗰個消防泵操作正常個效果咁理想。

26 李澍桓大律師：唔，即係其實唔多唔少對救火都係有一定嘅影響嘅，即係如果個供水系統，  
27 大廈本身個消防供水系統係出咗問題？

28 許健安先生：同意。

29 李澍桓大律師：第三個部分，關於救火嘅就係我哋知道喺個大廈入面就有一啲叫做緊急車輛  
30 通道 EVA，同時間我哋都知道喺個現場入面，其實係有一啲限制啲車輛係有辦法駛  
31 近著火嘅大廈嘅，呢個你有冇--首先有冇咁樣嘅經驗，即係當日？

32 許健安先生：當日我哋都係遇到我--譬如我自己嗰架車輛為例，我哋都要向後褪番少少，嚟  
33 避免上面跌落嚟嘅燃燒嘅竹枝、棚架嚟到去即係燒著我哋啲消防車輛。咁所以係當  
34 刻喺大廈上面不斷有好多竹枝、棚架燃燒嘅雜物跌落嚟，對我哋嚟講係一個好大嘅  
35 挑戰。

36 李澍桓大律師：唔。我到過現場，即係我見到大廈同嗰個緊急車輛通道中間，你哋都有同事

1 當時解釋過畀我哋知，就似乎由於佢又有欄杆，又可能做咗個公園、種樹，所以其  
2 實就算佢哋想駛架車埋去呢，即時要移除呢啲障礙物都係有困難嘅，以你當日救火  
3 嘅親身經驗，呢個係咪都係令到其中救援出現困難嘅一個地方？

4 許健安先生：呢啲設施無疑都會為我哋滅火救援有一啲挑戰。

5 李澍桓大律師：唔。我比較關注就係尤其是喺個大廈出入口即係前後，你頭先都講到有啲竹  
6 枝，有好多著咗火嘅障礙物跌咗落嚟嘅嗰個情況，喺現時消防處有嘅一啲技術或者  
7 一啲工具上面，同埋配合番當時嗰個情況喇，其實係有冇辦法去移除嗰陣時嗰啲障  
8 礙物㗎？

9 許健安先生：你意思是係佢跌落嚟，然後 pile up 咗嗰啲嘅雜物？

10 李澍桓大律師：嘎，因為我哋知道有好多係著緊火，仲喺地下度燒緊。

11 許健安先生：固然我哋都會有一啲大型啲嘅工具，或者一啲專門嘅一啲隊伍去做呢啲比較重  
12 型嘅一啲災難事故嘅環境嘅，咁但係當刻個情況就係佢有好多嘢不斷跌咁樣跌落  
13 嚟，即係我哋可能拎開一啲，佢又不斷又有嘢跌落嚟咁樣樣，咁所以係好有挑戰。

14 李澍桓大律師：應該係咪好似好初期就算想嘗試去進入個大廈，即係宏昌嘅時候，都已經好  
15 似有同事係受傷，係咪？

16 許健安先生：我事後理解，係。

17 李澍桓大律師：喺去到邊一個階段，首先第一以你所了解，無論做指揮官或者之後，係消防  
18 員真係可以進入譬如宏昌去做內部救火嗰個情況，你知唔知去到咩嘢時間先至做得  
19 到？

20 許健安先生：我事後知道就大約可能係四點幾嗰啲時候，係我哋可以入到去，即係底層開始  
21 一路上去做滅火。

22 李澍桓大律師：係，都等我哋大家了解一下，其實一般嚟講，如果進入火場你哋本身有啲乜  
23 嘢配備係令你哋可以進入火場，同埋我想再了解一下著咗火入面嗰個環境，先講個  
24 配備。

25 許健安先生：我哋消防員進入，我哋本身個配備都會有一個抗火衣。咁另外都會有...

26 李澍桓大律師：即係我哋成日見到講嘅「黃金戰衣」，係咪呀？

27 許健安先生：係，正確。另外，都會有一個頭盔喇，另外會有個人手電筒，咁另外都會有一  
28 個抗火手套、同埋都會有一對靴咁樣，另外，我哋都會佩戴呢個呼吸輔助器，如果  
29 進入一啲有濃煙波及嘅地方嘅話，亦都會有面罩等等。

30 李澍桓大律師：喺當日宏昌閣或者宏福苑著咗火嘅大廈為例，火我哋知道主要喺開頭嘅初期  
31 就係由外部燒，跟住就燒入去某一啲單位，我想講個溫度，當其時喺個大廈入面嘅  
32 溫度，以你所理解係去到幾多度？

33 許健安先生：呢個我唔知道。

34 李澍桓大律師：即係我哋聽過有啲講緊話去到攝氏四五百度，以你嘅訓練或者你嘅經驗，係  
35 咪會有咁嘅情況？

36 許健安先生：係會有可能。

1 李澍桓大律師：「黃金戰衣」，即係你哋個保護衣抗火衣，可以頂到幾多度嘅溫度㗎，你知  
2 唔知呀？

3 許健安先生：一般嚟講，可能即係頭先你所講，四五百度呢啲溫度係可以抵禦到。

4 李澍桓大律師：另外一樣嘢就係如果喺個電梯嗰個升降機唔運作嘅情況之下，我哋知道宏福  
5 苑就總共三十一層樓，你哋嘅裝備如果假設由地面進入去，地下進入去嘅時候，係  
6 咪都可以即係一般你哋消防員可以應付到起碼上到 31 樓，即係行樓梯上到 31 樓？

7 許健安先生：我諗可能要視乎當時嗰個樓梯個環境同埋嗰個情況係點樣樣，火勢、濃煙咁樣  
8 樣。

9 李澍桓大律師：係，如果係滿布濃煙、火勢，咁當然想行都未必行到，係咪？

10 許健安先生：同意，會係一個好大挑戰。

11 李澍桓大律師：嚟到最後，我想畀你睇一睇少部分嘅相片，因為等你確認番當時個情況。首  
12 先，我想畀你睇番宏福苑未火災之前嘅一啲資料嘅圖片。你見到譬如舉個例呢個宏  
13 泰閣，我哋見到就出面嗰度未有棚架，亦都似乎呢個就係嗰個正門嘅位置，係咪？

14 許健安先生：我唔肯定佢係正門。

15 李澍桓大律師：我或者跟住--即係我哋留意住呢個就係冇障礙、冇竹枝，火燭之前嘅一個資  
16 料圖片嚟嘅，我想畀你睇番火災之後嘅相片你睇下。我哋可以睇其中，搵一張我哋  
17 係睇到譬如嗰個棚架入面，如果我哋睇下方嗰張呢，似乎就係見到好多竹枝倒塌咗  
18 嘅一啲棚架，你講唔講得到話憑呢張相，我哋望入去張相嘅遠嗰度，係咪就係一個  
19 入口嘅地方㗎？定還是你知唔知？

20 許健安先生：頭先...

21 李澍桓大律師：頭先--我哋知道你有個同事企喺度。

22 許健安先生：佢前面，我相信係嗰個係一個入口。

23 李澍桓大律師：前面有個入口，喺當其時呢一個所謂下塌嘅棚架、竹枝燃燒嘅地方，到最後  
24 你哋係點樣解決去移除？因為我哋知道到最後都有入到宏昌閣、入到宏泰，係用乜  
25 嘢方法去樣移除呢一啲障礙物入去㗎？

26 許健安先生：據我理解，我哋當時嗰個--其實因為不斷都有好多燃燒嘅雜物跌落㗎，其實我  
27 哋都喺滅火嘅過程一路將一啲跌落㗎 pile up 咗嘅一啲竹枝... (聽不清)，我  
28 哋搬開佢。咁然後製造咗...

29 李澍桓大律師：搬開係用機器定係用人手？

30 許健安先生：當刻我哋用人手，即係徒手搬開佢，咁製造咗個缺口，咁我哋就能夠入到去，  
31 我地都盡量入去去做滅火救援，即係我哋目標唔係去將全個阻塞物去移除佢咁樣  
32 樣，我地製造到一個缺口能夠順利進入，我哋都會進入咁樣樣。但係不斷好快後期  
33 可能又有一啲嘅竹枝、棚架跌落㗎嘅時候，佢可能又重新再堵塞咗，我哋又要不斷  
34 再做呢個動作咁樣樣。

35 李澍桓大律師：正如我剛才所講，我哋希望可以吸取教訓改善，首先，就住作為一個當時你  
36 做咗一個所謂現場嘅指揮官都有大概半個鐘咁樣嘅時間，而家你睇番轉頭，你覺得

1 有冇嘢會令到你首先第一，對於評估嗰個當時嘅情況，尤其是作為調配上面，安排  
2 拯救嘅工作上面，你曾經喺個前線，你認為有冇嘢係令到如果做一啲改善、多一啲  
3 訓練，會係令到今次嘅救援可能更加順利？

4 許健安先生：我諗即係呢一場火警其實都係好大型，同埋亦都係前所未見嘅，我會咁樣講。  
5 而當刻我哋每一個同事其實都想儘快去做--入去去做一個--因應個現場環境嘅情況  
6 嚟到入去做滅火救援。而呢個就係當時我其實喺嗰個階段嘅時候，我自己都--無論  
7 我或者我嘅同事，我哋都盡力想去做一個滅火救援。即係但係當然日後如果調查報  
8 告有任何一啲要改善嘅地方嘅話，我哋落實咗一啲政策，我哋一定會全力配合。

9 李澍桓大律師：放心，我而家想問你嘅就係因為你始終係前線，亦都有一定嘅救火嘅經驗，  
10 所以我哋希望即係聽你，睇下你經歷過今次之後，你認為有冇一啲嘢我哋應該要考  
11 慮、參考？另一樣嘢，就係從你嘅經驗，你覺得喺疏散上面，尤其是我哋知道個警  
12 報系統似乎係失效，我哋亦都明白，尤其是喺初期到場嘅人手就一定有可能咁奢侈  
13 做到好多逐家逐戶拍門，你覺得經歷過今次呢個事件之後，有冇乜嘢嘢你認為可以  
14 畀到意見去令到啲人疏散，或者更加意識到其實係有火警，記住呀，個火警警報系  
15 統係失效嘅，失靈嘅，你認為有冇嘢可以做得呢？

16 許健安先生：我諗可能現場我哋--即係前線喺現場度嘅時候，可能會由--會唔會有一啲合適  
17 嘅--即係事後睇番，即係會唔會有一啲合適嘅一啲嘅廣播系統去做一個--即係畀啲  
18 市民去--大廈裏面嘅居民知道有火警發生。即係例如果頭先我哋討論過嘅，會唔會  
19 即係就算我哋都要--如果事後知道已經係無可避免會有一個咁樣嘅擴散同埋蔓延嘅  
20 情況，會唔會都會去安排啲人手去譬如使用大聲公或者咁樣。咁但係呢個係我哋即  
21 係事後，如果真係而家呢一個角度知道無可避免會咁樣蔓延我哋會做嘅嘢，不過...

22 李澍桓大律師：可能你都留意到即係市民又好、傳媒又好，都有一個講法，就係我哋其實政  
23 府有一套系統係可以發放一啲信息，提醒人可能有災難或者有重大事件，咁喺個手  
24 機就會發放一啲信息，你覺得呢一個系統如果當時啟用嘅，會唔會幫到你去疏散啲  
25 居民？

26 陸啟康法官：佢係咪適合嘅人回答呢個問題呢？

27 李澍桓大律師：我諗睇下佢前線，佢認為會唔會慳到一啲資源，起碼你可以處理去救火，個  
28 系統就用嚟通知人？

29 許健安先生：我評論唔到。

30 李澍桓大律師：主席，我有其他問題問。

31 陸啟康法官：有冇邊個涉事方想--我諗政府最後，好唔好呀？有冇邊個其他涉事方想問先？

32 歐陽伯權博士：唔該主席，許生，我想有一個問題係問一問你，許生，喺呢邊，唔該。我想  
33 問你頭先提一提嗰個「黃金戰衣」同埋個裝備方面，喺你嘅認知，我哋而家嘅所謂  
34 「黃金戰衣」或者裝備係咪係世界上叫做最好嘅呢？喺你哋嘅認知，你覺得我哋可  
35 唔可以喺呢方面要優化一啲呢？唔該。

36 許健安先生：你好，我自己理解，就係我哋而家嘅裝備，我哋嘅抗火衣個功能其實都已經係

1 好優--即係喺世界上面已經係好先進，同埋亦都係嗰個能力--抗火能力已經係好好  
2 嘅。至於有冇一啲再好啲嘅一啲嘅抗火衣，其實我哋如果有理想嘅，我哋不時會檢  
3 討囉，我相信處方。

4 歐陽伯權博士：唔該。

5 許健安先生：唔該。

6 陳健波議員：我都想跟進，即係就係氧氣嗰個系統好重要㗎嘛，因為你哋有時仲會不但止自  
7 己用，仲要畀埋嗰啲你救到人用㗎嘛。

8 許健安先生：係。

9 陳健波議員：咁但係好似我理解呢，我唔知真正假，就係話咁多年嚟其實都有乜變化，都係  
10 可能半個鐘，最多咪半個鐘，但係其實世界上或者你有冇研究一啲咁重要嘅器具，  
11 對你救火咁重要嘅，有冇不斷去研究？譬如話國內點呀？世界上個標準係點呀？即  
12 係當然有啲人就話，因為個重量個問題，要兩個樽喇或者點樣，但係其實係咪可以  
13 合併一個樽，一個咁嘅裝晒佢可以容量多啲，或者唔好咁重，因為好重㗎嘛嗰個  
14 嘢，即係好多嘢係可以諗，你哋呢方面有冇--即係係消防處，當然我遲啲都會問消  
15 防處長嗰啲喇。

16 陸啟康法官：你答到就答，答唔到就唔答。

17 陳健波議員：你自己作為一個用家，即係你覺得邊啲係緊要啲呀，係咪需要長啲時間呀咁  
18 樣？

19 許健安先生：我了解你嗰個問題，就係嗰個呼吸--如果嗰個長度時間越長會對我哋越好，呢  
20 個係當然嘅。但係我唔了解就係佢係咪我哋有冇--即係世界上面其他嘅標準，但係  
21 我相信我哋部門有相關單位或者同事係有機會答到呢個問題，但係我答唔到呢個問  
22 題。

23 陳健波議員：我想問多一個，你前線你有冇提出呢個要求話「喂，我哋好需要呢樣嘢嗎，點  
24 解冇人去睇，或者係咪需要睇呢樣嘢，你有冇大家討論或者都有提出呢個問題？

25 許健安先生：我哋都有適當嘅渠道不時同處方去--即係管理層去反映，即係各種嘅嗰個工具  
26 上面嘅意見咁樣樣。

27 陳健波議員：但係有冇特別提呢一個問題？

28 許健安先生：我相信我哋同事都有就住呼吸器嗰樣嘢，有適當嘅渠道同管理層去反映呢個問  
29 題。

30 陸啟康法官：另外我想跟進一樣嘢，即係你喺嗰個聽證會嘅較早時間，有一個居民就話見到  
31 佢哋--尤其是開頭嗰時個消防喉個水壓係唔夠，咁你--即係頭先--你對於呢個觀  
32 察，你會覺得係唔正確，抑或應該其實--你哋嗰陣時喺個水井個井喉嗰度擺水㗎  
33 嘛？

34 許健安先生：我哋係利用現場宏福苑佢裏面嗰個街井去擺水，咁我自己見到由我同事擺水到  
35 開水，然後到之後射水，即係我就睇唔到話一個--因為如果水壓唔夠，我知道咩  
36 嘢情況，但係當時我有睇到--睇唔到呢個問題。

1 陸啟康法官：咁或者孫大律師有冇？

2 孫靖乾資深大律師：唔該主席，我淨係有一個問題想跟進下。頭先主席問到嗰個擺水嘅情  
3 況，咁我淨係想再問一問，就係話頭先李大律師都有問你，就係話如果嗰個天台  
4 個消防水缸冇水嘅情況，咁會唔會有影響？我淨係想--我唔知道你會唔會可以即係  
5 答到，或者如果唔係，我再問其他消防嘅同事，就係其實如果譬如當時嗰個消防喉  
6 或者係喉輓，或者消防栓嘅系統，就算嗰個天台嗰個水缸冇水，我想問其實當時你  
7 哋同事係會點樣去處理？係咪會有一--係會--會唔會用到街井嗰啲水係會駁落去個  
8 大廈裏面嗰個消防系統，可唔可以解釋下係點樣做？

9 許健安先生：如果我哋一般遇到大廈裏面嗰個消防泵係失靈嘅話，我哋都會直接將我哋消防  
10 喉駁入去我哋消防車--經街井駁落去消防車，再由消防車開喉入去大廈嗰個消防入  
11 水口，然後咁變咗我哋消防車嘅泵就係最重要加壓，將啲水--擺水加壓，嚟到昇  
12 大廈裏面嗰個--裏面我哋去做內部滅火，喺個消防栓喉輓嗰個出水口去擺水嘅時  
13 候，就變咗倚賴我哋消防車個泵去做個加壓咁樣樣。

14 孫靖乾資深大律師：明白，即係換言之即係話，如果嗰個大廈個天台個消防水缸冇水嘅時  
15 候，嗰個做法就會係即係通過嗰個街井，再通過嗰個消防車或者嗰個--你哋個泵，  
16 咁就再駁落去嗰個嘅消防栓或者消防喉輓個系統，就令到嗰個系統本身都會有水？

17 許健安先生：係，冇錯。

18 孫靖乾資深大律師：好，咁唔該晒你，thank you。

19 陸啟康法官：有冇覆問？

20 李澍桓大律師：沒有。

21 陸啟康法官：冇，咁我諗今朝我哋都比較沉重，雖然我哋其實今次嘅研訊，我哋對好多消防  
22 局嘅--消防處嘅一啲嘅政策，或者我哋都會有啲檢討或者批評，但係我相信我哋廣  
23 大市民對於呢一樣嘅批評或者呢個檢討，同當日前線呢個消防人員嘅努力係會分開  
24 嘅。而喺今次我哋嗰個嘅聽證會入面，我哋都聽到好多居民對於消防員，特別係前  
25 線消防員嘅努力係相當之贊許，亦都係好感謝。咁我都相信前線嘅消防員喺今次處  
26 理呢個嘅火災亦都係一個前--即係都係未見過嘅一個，我哋相信好多嘅前線嘅--我  
27 亦都喺度大膽講，無論我哋嘅檢討結果係點，我哋對--我喺度我亦都可以代表我哋  
28 同埋一啲宏福苑嘅居民或者一啲嘅大眾市民，對於嗰日前線消防人員嘅努力係表示  
29 感謝。亦都係喺度想同大家講--即係同你哋講一聲「辛苦晒」，我相信你哋當日已  
30 經係喺咁嘅環境入面已經盡咗力。咁你作供完畢，辛苦晒。

31 許健安先生：多謝。

32

33 12 時 01 分消防處大埔消防局高級消防隊長證人許健安先生作供完畢

34

35 12 時 02 分消防處大埔消防局局長證人張樂恒先生開始作供

36

- 1 李澍桓大律師：主席，跟住下一位作供嘅係張樂恒先生，佢係大埔消防局嘅局長，個職位係  
2 助理消防區長。
- 3 張先生，請你先企起身，喺你面前有一個聲明詞嘅，咁麻煩你先企起身，然之  
4 後讀出嗰個聲明詞。
- 5 張樂恒先生：本人張樂恒聲明，本人所作的證供，盡本人所知、所悉及所信，均屬真實。
- 6 李澍桓大律師：係，請坐。張 Sir，我哋知道你係喺 2010 年加入消防處，係咪？
- 7 張樂恒先生：正確。
- 8 李澍桓大律師：然之後喺 2023 年嘅時候就晉升去到個職級就係助理區長？
- 9 張樂恒先生：正確。
- 10 李澍桓大律師：而個工作崗位就係大埔消防局嘅局長，係咪？
- 11 張樂恒先生：我調任大埔消防局作為局長係 25 年 2 月嘅事。
- 12 李澍桓大律師：係。咁而家係咪都仲喺大埔消防局定調咗去第二度？
- 13 張樂恒先生：正確，仍然係大埔消防局嘅局長。
- 14 李澍桓大律師：係。咁就住今次宏福苑大火嘅呢個事件，我知道你向我哋委員會就提供咗一  
15 份嘅證人口供嘅，係咪？
- 16 張樂恒先生：正確。
- 17 李澍桓大律師：咁我相信你都係將你所見、所知、所信係真嘅嘢喺呢一個口供入面講出嚟  
18 嘅，係咪？
- 19 張樂恒先生：正確。
- 20 李澍桓大律師：好快咁睇番一啲關於你參與嗰個救援工作嘅一啲紀錄，如果我哋睇番 B10，  
21 我哋 5091 頁就係一個紀錄，就喺大概 15:04:11 秒嗰個紀錄，我哋就應該見到  
22 就係當時張先生你就係收到控制中心要求到場去做救援，係咪？
- 23 張樂恒先生：正確。
- 24 李澍桓大律師：如果我哋再睇下一頁 5099，15:19:58 嘅嗰個 (English Spoken) 嗰  
25 個紀錄，咁我哋就見到你喺當時 15:19 就到達咗現場，並且取代咗你嘅同事許先  
26 生就作為現場嘅指揮官？
- 27 張樂恒先生：正確。
- 28 李澍桓大律師：咁未講細節之前，我亦都想你睇埋 5109，就係喺 15:34 嘅時候，就似乎就  
29 跟住就係應該有另一位同事就係你嘅上司，係咪應該係林先生就到場，並且將嗰個  
30 火警升格做咗四級火？
- 31 張樂恒先生：正確。
- 32 李澍桓大律師：所以由三級火升到四級火嘅呢一個決定，就唔係張先生你做嘅？
- 33 張樂恒先生：我會咁講，我會--我有將一啲意見或者我觀察到嘅嘢交界林先生，可能有助佢  
34 去做呢個決定。
- 35 李澍桓大律師：明白。咁我先講番就係你去到達現場嘅一啲情況先，即係 15:19 到達咗現  
36 場。我哋知道一般嘅情況，就係話如果--係咪應該如果嗰個係消防處係收多過一個

1 或者收到多個求助嘅通報嘅時候，其實就應該以你嗰個職級就應該要到達現場，係  
2 咪？

3 張樂恒先生：正確，即係消防控制中心會通知我哋會出動。

4 李澍桓大律師：係。我哋就知道應該第二個求助，應該係大概 14:53 呢個時間就控制中心  
5 或者 999 嗰度就收到嘅。咁而我哋知道 15:04 先至向你發出個指示叫你到場嘅，  
6 你知唔知道點解當中即係都睜咗有幾分鐘叫你去現場？

7 張樂恒先生：呢個唔清楚。

8 李澍桓大律師：當其時你係喺——我相信係當值喺大埔消防局嘅，係咪？

9 張樂恒先生：當刻係。

10 李澍桓大律師：咁由於你都講，2025 年 2 月嘅時候，你就調任咗去大埔消防局，我想問一  
11 問你就係關於嗰個你去出車嗰陣時嗰個——去車嗰陣時嗰個情況。我哋頭先都有聽  
12 過，其實就有啲事前嘅資訊係會畀到你啲前線嘅同事嘅，咁我睇下你係咪同樣都會  
13 知道，當你被要求去現場嘅時候，你係咪知道其實喺就住大埔宏福苑呢個屋苑入  
14 面，有一啲所謂制訂咗因為大維修而做嘅一啲應變方案？

15 張樂恒先生：呢個事前已經知道。

16 李澍桓大律師：事前已經知道。咁同時間，你知唔知道其實係消防處其實係收到有一個所謂  
17 叫做 (English Spoken)，就住某一啲消防嘅裝置係關閉咗，因為要做維修  
18 㗎？

19 張樂恒先生：我印象中喺呢一個通話嘅時候，當我詢問有啲咩嘢車出咗，即係去咗車嘅時  
20 候，控制中心有向我提及過。

21 李澍桓大律師：係。但係知唔知實際個內容，譬如係乜嘢嘅裝置出現咗問題，你有冇呢個信  
22 息？

23 張樂恒先生：冇。

24 李澍桓大律師：即係你淨係知道有嘢壞咗，但係唔知壞乜？

25 張樂恒先生：正確。

26 李澍桓大律師：咁你去到 15:19 去達咗現場嘅時候，其實以你而家記得，當時喺在地嘅同  
27 時其實有幾多人數上面，講唔講到有幾多個？

28 張樂恒先生：喺我去車嘅時候，我知道有大概十二架左右，印象中係，咁當我到場嘅時候，  
29 就再多啲。

30 李澍桓大律師：如果用人數嚟講個數目，即係消防員有幾多個？

31 張樂恒先生：大概一百個。

32 李澍桓大律師：大概一百個。喺 15:34 升做所謂四級火之前，我哋知道就係你到咗現場，  
33 然後你都好似做咗一個匯報嘅，因為如果我哋睇番 15:25 嘅時候，我哋見到  
34 15:25，即係三十三分鐘之後接報，咁你做咗一個信息就匯報畀畀控制中心，係  
35 咪？

36 張樂恒先生：正確。

- 1 李澍桓大律師：而家你睇番呢個控制中心嘅呢一個紀錄，你可唔可以講講大概你呢一個信息  
2 上面係想交代啲乜嘢嘅情況？
- 3 張樂恒先生：可以。咁我喺 15:25 嘅時候，咁我就--當然我之前有做過一啲嘢咁，咁去到  
4 呢個時候，其實我係已經掌握到個資訊包括啲咩嘢，第一，就係有兩座大廈已經係  
5 著咗火，咁就包括係宏昌同埋宏泰閣，咁第三座就係宏盛閣都有一啲嘅火光係已經  
6 係見到嚟嘞。
- 7 李澍桓大律師：我諗其實如果根據你嘅紀錄，就係應該話其中兩座就你用嘅字眼就  
8 “(English Spoken)”。
- 9 張樂恒先生：係，正確。
- 10 李澍桓大律師：即係我可唔可以理解就係已經燒得好嚴重？
- 11 張樂恒先生：係。
- 12 李澍桓大律師：嘎。另外三座，你所講宏盛、宏建同埋宏新，根據你當時嘅觀察，就你就有  
13 咗個 (English Spoken)，但係都見到就係你話已經 (English  
14 Spoken)，即係已經著咗火？
- 15 張樂恒先生：正確。
- 16 李澍桓大律師：即係當其時就成個宏福苑你嘅觀察到就係已經八座入面有五座係燒著咗？
- 17 張樂恒先生：正確。
- 18 李澍桓大律師：而我想你直接跳去最髒嘅嗰段，就係你話有好多竹枝、雜物啲啲由天上面跌  
19 落嚟，呢個係咪就係以你嘅觀察，係咪就係燒著啲棚架而引致嘅情況嚟？
- 20 張樂恒先生：棚架以及雜物。
- 21 李澍桓大律師：如果係咁樣嘅話，你去到現場，你做咗現場嘅指揮，亦都見到呢個情況匯報  
22 咗，首先喺呢一刻，當然你當時知道係三級火嚟嘛，係咪？
- 23 張樂恒先生：正確。
- 24 李澍桓大律師：有冇喺 15:25 嘅時候，考慮將個火警升級？
- 25 張樂恒先生：有，不過我仍然係進行緊嗰個評估，究竟係需唔需要。
- 26 李澍桓大律師：咁就住你到咗現場，做咗指揮官，在地嘅指揮官之後，你就住首先尤其是疏  
27 散嘅呢個問題，你有冇考慮過？
- 28 張樂恒先生：有。
- 29 李澍桓大律師：你當時諗緊嘅係疏散、著咗火嗰五座大廈，定還是係整個屋苑？
- 30 張樂恒先生：我喺當刻見到就係嗰個蔓延速度其實非常之快，咁我見到嘅就係有市民就不斷  
31 咁樣喺個大廈裏面逃走出嚟，咁其實我喺當刻其實未知道嗰個警報系統係同時失  
32 靈。咁我就至到...
- 33 李澍桓大律師：停一停，你就住個警報系統，你幾時先知道其實個警報系統係失靈？
- 34 張樂恒先生：大概係 15:35 至 15:40 左右呢啲時間。
- 35 李澍桓大律師：喺你到達現場嘅時候，有冇物管公司，即係物業管理公司嘅人員同你接觸  
36 過，或者你有冇要求過接觸佢哋？

- 1 張樂恒先生：冇見過佢啲。
- 2 李澍桓大律師：冇見過佢啲，唔。係，請你繼續講，即係你去到較後期，你先知道個警報系
- 3 統失靈？
- 4 張樂恒先生：冇錯，係。
- 5 李澍桓大律師：當你知道個警報系統失靈之後，你有冇採取啲乜嘢嘅步驟或者指示去畀你嘅
- 6 前線同事？
- 7 張樂恒先生：當刻我見到嘅情況就係有好多市民逃走緊出嚟，第二，但係我面對嘅困難就係
- 8 嗰個火警嗰個蔓延速度實在太快，所以我當下我就即係感覺就係，市民係有一啲途
- 9 徑，譬如可能經過我哋啲警笛聲，即係車嘅警笛聲，又或者其他途徑得悉到其實火
- 10 警係發生咗，咁我盡我所能，嗰下我嘅決定就係我點都要用--搵我哋啲兄弟或者同
- 11 事去撤住個火，等佢個蔓延速度唔可以咁快，令到市民有更加多嘅時間去逃生。如
- 12 果我用咗一啲人力去做其他嘅嘢嘅話，可能會影響到我控制火勢嘅嗰個效率，所以
- 13 當刻我決定我係要全力去控制住個火勢，增加市民逃生嘅時間。
- 14 李澍桓大律師：我哋知道你喺 15:27，去--你如果睇 5104 頁，15:27:54 應該就係--係
- 15 咪應該當其時你係要求咗定係有其他嘅同事要求咗派一個叫做（English
- 16 Spoken）嘅呢一隊到場？你有冇呢個認知？
- 17 張樂恒先生：之後有。
- 18 李澍桓大律師：之後有？
- 19 張樂恒先生：係。
- 20 李澍桓大律師：即係唔係你要求？
- 21 張樂恒先生：唔係我要求。
- 22 李澍桓大律師：首先，你認唔認識呢個所謂叫（English Spoken）嘅呢一個隊伍或者部
- 23 門？
- 24 張樂恒先生：認識。
- 25 李澍桓大律師：可唔可以講一講畀我哋知，其實佢哋係做的乜嘢？同你哋一般前線救火有咩
- 26 嘢唔同？
- 27 張樂恒先生：其實（English Spoken）呢個煙火特遣隊，其實佢係一般駐守喺我哋消防
- 28 及救護學院嘅，咁佢係做一啲教--佢係一啲教官嚟嘅其實，實地咁去--即係我哋有
- 29 好多唔同設施，做一啲實火訓練，提供畀我哋唔同嘅屬員，所以佢哋喺嗰個滅火嘅
- 30 經驗上面係非常非常之充足，非常非常之豐富。佢哋--所以點解叫做一個
- 31 （English Spoken）嘅（English Spoken），即係我哋叫做呢個構築物滅
- 32 火嘅嗰個專家，室內滅火專家就係咁嘅意思。咁而呢一個以我所理解，一般三號火
- 33 警，咁佢哋都--或者四號火警，佢哋都會係到現場--會出動佢哋到現場幫手，唔需
- 34 要現場總指揮叫嘅。
- 35 李澍桓大律師：頭先我哋聽你嘅同事作供都有講過，宏昌係似乎其中一個最早，亦都係燒得
- 36 最嚴重嘅大廈，咁亦都係令到甚至乎想你嘅同事入去救人或者救火都有辦法入到去

1 嘅，當你去到現場，做咗指揮官呢個工作嘅時候，以你記得，當時宏昌閣可以入到  
2 去未？

3 張樂恒先生：唔得。

4 李澍桓大律師：咁你當其時有冇另外界啲咩嘢指示去進行嘗試清除啲堵塞咗兩個前後出入  
5 口啲個障礙物，有冇啲乜嘢指示你畀咗？

6 張樂恒先生：我指示就係叫現場嘅同事繼續盡力去移除啲個阻塞咗嘅通道啲度，移除啲  
7 雜物，殺出一條血路去令到我哋嘅救援人員可以進入去大廈裏面去疏散市民。

8 李澍桓大律師：係。講番頭先就係話，我哋知道宏福苑啲個消防設備係有一啲所謂叫做  
9 (English Spoken)，咁我哋亦都上個禮拜有聽過證供，就其實大埔消防局係  
10 咪應該有派過人去做一啲實地嘅觀察，然後先至第一，制訂呢一個應變嘅方案，  
11 第二就係就住啲啲門咗嘅消防裝置，你哋係做咗一個視察嘅，係咪？

12 張樂恒先生：正確。

13 李澍桓大律師：就住視察啲部分，我想了解多少少，其實你哋收到呢啲 (English  
14 Spoken)，我知道就應該第一至到二十四小時之內到場，係咪？

15 張樂恒先生：正確。

16 李澍桓大律師：喺宏福苑嘅個案入面，你自己本人有冇去過現場做呢啲視察？

17 張樂恒先生：我有嘅。

18 李澍桓大律師：係，咁通常係你派你嘅部下去做嘅，係咪？

19 張樂恒先生：正確。

20 李澍桓大律師：呢個視察嘅目的其實係乜嘢？

21 張樂恒先生：呢個視察嘅目的最主要就係睇下現場有冇一啲特別嘅風險，譬如就係佢現場究  
22 竟有冇一啲其他嘅用途，譬如係一啲幼稚園、老人院呢一啲咁比較--或者係一啲危  
23 險品倉附近，令到啲度啲個危機係會提升嘅。第二就係佢哋啲水源是否充足，車可  
24 唔可以入到去，係一個行動上面嘅部署。所以當我哋睇完之後，咁我哋就會做一個  
25 嘅安排咁樣，去減低啲個風險。

26 李澍桓大律師：簡單啲嚟講，即係做一個風險評估，就係因為某一啲裝置會失效，你哋就要  
27 去評估下如果有火警發生嘅時候，要做一啲咩嘢額外嘅措施，係咪？

28 張樂恒先生：行動上面。

29 李澍桓大律師：你哋做呢啲視察啲個範圍，即係要做啲乜嘢嘅範圍，我相信就唔係張先生你  
30 自己決定話做乜，...

31 張樂恒先生：正確。

32 李澍桓大律師：...唔係你去決定，係咪？

33 張樂恒先生：正確。

34 李澍桓大律師：係咪消防處上面有一啲指引，即係譬如你哋當區嘅消防局就淨係做視察、風  
35 險評估，係咪咁樣？

36 張樂恒先生：正確。

1 李澍桓大律師：如果真真正正要去睇究竟嗰啲裝備係咪真係有問題，係咪需要關閉，又或者  
2 要做一啲跟進，係咪由當區消防局去做？

3 張樂恒先生：我哋會同佢哋有一啲嘅聯絡，睇下佢哋啲嘢整好未。但係嗰個檢查，或者去  
4 核實佢是否真係嗰個損壞情況係咁，就唔係由呢一個消防局去做。即係核實化係--  
5 我講緊嘅係會電話同佢核實「呢個係咪你真係咁樣 (English Spoken) 或者關  
6 閉咗個系統」咁樣，咁佢純粹係核實下佢寫嘅嘢係咪真確咁樣。

7 李澍桓大律師：譬如以宏福苑為例，我哋知道佢就係大概其中一個大廈最早就係 2025 年 4  
8 月 7 號就已經第一次入紙畀消防處，就話要關閉咗嗰個喉轆同埋消防栓嗰個系統  
9 嘅，咁我哋亦都知道跟住會出現嘅就係個水缸嗰度似乎都會受影響嘅，呢個你係咪  
10 當時你係知悉？

11 張樂恒先生：知悉。

12 李澍桓大律師：係直至到大火，即係中間呢八、九個月入面，大埔消防局有冇派過人去實地  
13 同物管又好、承辦商又好，去了解究竟其實佢哋要做啲乜嘢嘅維修工程，有冇做  
14 過？

15 張樂恒先生：冇好詳細咁去了解佢哋做啲乜嘢，因為我哋收到嘅係佢一個關閉通知書，係  
16 嘞，(English Spoken)，咁佢有呢個 (English Spoken)，佢嗰個原因  
17 好多，背後個原因，總之我哋行動方面，我哋淨係知道佢--只係需要知道佢呢套系  
18 統係不能有效運作，然後我哋做一啲嘅替代方案，做一個風險評估，行動上嘅風  
19 險評估咁樣。

20 李澍桓大律師：咁以你所知，即係真真正正要跟進，尤其是因為我哋都講緊，即係基本上係  
21 最耐嘅時間，差唔多去到八、九個月嘅，要跟進嘅話，以你所知係邊一個部門去跟  
22 進㗎？

23 張樂恒先生：其實消防局都有一定嘅跟進行動嘅，即係會去了解究竟佢嗰個維修嘅情況係--  
24 即係究竟佢可以開得番未咁樣，但係過咗六十日之後，即係我哋指引都寫咗，六十  
25 日之後就會由我哋牌照審批總區嗰邊就去繼續跟進咁。

26 李澍桓大律師：當總區即係超過六十日，然後總區所謂接咗呢個個案，由佢哋去跟進嘅時  
27 候，大埔消防局，即係當局嘅消防局嗰呢一個維修嘅事件上面，除咗話風險評估之  
28 外，仲有冇其他嘅參與？

29 張樂恒先生：沒有。

30 李澍桓大律師：我哋頭先都有聽過你嘅同事講，其實係救火或者救人嘅時候，係宏福苑入面  
31 都遇到好多唔同嘅困難嘅，咁首先就住面對有跌落嚟嘅一啲雜物、竹枝以至到進入  
32 火場入面嘅嗰啲困難，首先係你而家睇番轉頭，你覺得有冇一啲你作為其中都係  
33 一個前線嘅工作人員，有冇一啲地方你認為係可以做改善？譬如係裝備上面又好，  
34 所謂打火或者救火嘅策略又好。

35 張樂恒先生：我首先回應咗你裝備嗰樣嘢先，裝備嗰樣嘢，咁大家都好了解就係，其實香港  
36 消防處嘅裝備上面，咁亦都已經係各項嘅裝備上面係係世界係屬於一啲頂尖嘅層數

1 嘅嗰個級數嘍。咁就至於嗰個行動方面，咁我都會講番就係，其實今次嘅事件  
2 佢係一個史無前例嘅大火。嗰個史無前例，即係嗰正常我哋處理一個火警，嗰個火  
3 勢係冇可能垂直，即係縱向同埋橫向都好，個蔓延嘅速度係有可能咁快嘅。只要--  
4 即係一個正常嘅火警，嗰我哋嘅救援策略咁樣，係實際上係應該有一啲嘅--譬如一  
5 啲耐火間隔、一啲被動嘅消防裝置係有效地可以令到個火勢係減慢佢嗰個蔓延速  
6 度，可能係一個單位，可能蔓延多一個單位，或者上面一層一個單位。但係嗰呢個  
7 情況嚟講，佢嘅速度係極快咁樣縱向上升，以及橫向向其他樓宇係一次過蔓延開  
8 去，所以變咗嗰我哋一啲既定嘅嗰個行動嘅策略，譬如一啲搜救嘅策略上面，都唔  
9 可以--已經超出咗我哋應付嘅範圍。所以嘅事後檢討，咁當然有好多嘢可以檢討，  
10 但係我哋亦都要睇下究竟點解即係會有一個咁大嘅火警發生，我諗大家--各位主席  
11 你哋，我都好多謝你哋去幫手睇下呢件事。係，所以--係嘍，我嘅回應係咁。

12 李澍桓大律師：呢個就係裝備上面嘅你嘅一啲即係睇法？

13 張樂恒先生：或者指引，頭先所講指引。

14 李澍桓大律師：其中我想問你，即係因為我哋知道其中有一個工具車就當然就係嗰個雲梯  
15 車，係咪？

16 張樂恒先生：正確。

17 李澍桓大律師：即係我哋都留意到有一啲--可能有啲批評，就話究竟係咪出動得唔夠多，或  
18 者嗰個雲梯係咪去得唔夠高，點解唔啱出面甚至乎射水再猛烈啲，用投擲水彈呢啲  
19 咁樣嘅方案，就住呢一方面，你可唔可以首先解釋，譬如以投擲水彈為例，以你當  
20 時睇到嘅情況，呢個係咪一個會幫助到嘅救火、救援嘅方法？

21 張樂恒先生：絕對唔會。

22 李澍桓大律師：點解你有咁嘅睇法？

23 張樂恒先生：我哋首先要了解你投擲水彈嘅話，係會引致啲乜嘢，嘅危險嘅情況。根據我哋  
24 過往嘅經驗，其實就係如果你係用直升機去到現場，咁佢會產生一個氣壓，而呢啲  
25 氣壓會引致好多不確定嘅因素，包括火警嘅蔓延速度，因為佢嗰個氣流會影響到，  
26 你唔知道個氣流會沖咗去邊度，會唔會甚至乎--而家睇番轉頭，如果用咗會唔會蔓  
27 延到去宏志閣，呢啲我哋都答唔到。第二，就係佢嗰個功效，因為嗰呢個個案裏  
28 面，其實我哋遇到一個好大嘅困難，就係嗰個縱向同埋橫向嘅啱啱講過嗰個蔓延嘅  
29 速度，而呢個蔓延嘅速度講緊係蔓延，唔係淨係外牆，甚至乎係單位裏面嘅嗰個情  
30 況，單位裏面都係被燒著。如果我哋用呢啲投擲水彈嘅方式，其實唔可以直接咁樣  
31 撲滅到單位裏面嘅一啲火警，唔可以話一定係可以撲滅到火警，反而引致到嗰個危  
32 機可能會更加大。

33 李澍桓大律師：另外我就係想了解，即係頭先我講到所謂話雲梯或者鋼梯車呢樣嘢，其實佢  
34 嗰呢個救援工作入面，佢係擔當啲乜嘢嘅任務或者有啲咩嘢作用？

35 張樂恒先生：我哋叫做旋轉台鋼梯車，或者一般大家叫做雲梯。其實佢係擔任一個外圍嘅控  
36 制火勢，以及一個拯救嘅行動。

1 李澍桓大律師：我有聽過你嘅同事介紹，就係似乎即係呢個就係嘗試喺外面射水，就等啲火  
2 勢唔好繼續蔓延，呢個係唔係即係最主要佢嘅工作？

3 張樂恒先生：正確。

4 李澍桓大律師：當然我哋知道每一個火警嘅級別，其中一個最大嘅影響就係級別越高所派出  
5 嘅資源就會要越多，因為好明顯地個火勢係越高級就係越猛烈，係咪？

6 張樂恒先生：正確。

7 李澍桓大律師：如果你而家睇番，尤其是我都了解到將佢升格做四級火嗰個決定唔係你到場  
8 做嘅，當然我哋嘗試只係去做一個檢討，去睇下有冇改善嘅空間。如果早啲將個三  
9 級火升做四級火，而得使可以有更多嘅資源調派到現場，你覺得對於起碼控制個火  
10 勢會唔會有啲幫助呢？

11 張樂恒先生：就住呢次嘅事件，喺個資源調派上面，其實喺我哋升格做三級火之前，其實即  
12 係淨係一級火嘅時候，嗰個規模已經達至到接近三級火嘅規模，因為因應住我哋唔  
13 同嘅因素，因為一啲救助個案以及譬如關閉咗嘅嗰個消防設備等等，都加派咗唔同  
14 嘅車輛到現場，所以喺個車輛調派上面，其實個資源相對係好大量已經，喺一個火  
15 嚟講，接近三級火嘅規模。其實去到--即係以我之後所知，就係大概係 3 點 20 分  
16 嘅時候，其實因應住個情況，消防處處長已經指派咗--就係處長指揮室係一口氣派  
17 咗十隊嘅搜索隊，即係講緊係二十架主要嘅消防車，接近另外一百人。

18 李澍桓大律師：但係我想針對住，即係因為點解我講個鋼梯或者雲梯，我咁關心，就係因為  
19 似乎正如你所講，佢喺外面控制嗰個火勢蔓延，其實佢係有一定嘅作用嘅。但係我  
20 哋似乎睇到喺初期嘅時候，即使去到三級火嘅時候，係唔係應該都只係得兩架旋轉  
21 鋼梯車，一架 37 米、一架 55 米喺現場，呢個你有冇現場其實個情況？

22 張樂恒先生：呢個資料係正確嘅，但係現場指揮係有權去再要求額外嘅資源，所以稍後嘅時  
23 間，喺 15:39 嘅時間，我哋一口氣都調派咗另外三把嘅鋼梯車去到現場。

24 李澍桓大律師：呢個就當然係嘗試喺外圍控制嗰個火勢蔓延？

25 張樂恒先生：正確。

26 李澍桓大律師：主席。

27 陸啟康法官：我想問一問，即係其實我哋睇到以數量嚟講係多嘅，即係比一級火已經係所調  
28 派嘅車係多咗好多。我哋開初蔓延速度未咁快嘅時候，我想問其實喺咁多車，但係  
29 得一個迴旋處嘅位，其實好多車嚟都有用嘅，係咪？其實即係如果你好多車嚟，你  
30 未必係可以對於宏昌有作用，因為其實嗰個迴旋處個位係得咁大，呢個觀察你有冇  
31 特別意見？

32 張樂恒先生：有，其實亦都解釋咗點解我哋需要係即係有行動去了解現場嗰個地勢，其實就  
33 喺現場除咗喺內圍個迴旋裏面呢個叫做緊急車輛通道，其實喺宏昌後面嗰度亦都一  
34 條叫做元洲仔里嘅，而事實上有好多車輛都係泊喺後面嗰度，直接喺後面嗰度做咗  
35 滅火救援嘅工作，而我哋亦都成功咁樣有幾個市民係宏昌嗰度後門走咗出嚟，而我  
36 哋成功拯救到。所以喺嗰個路固然之消防車輛係多嘅，一方面我哋了解過個地勢，

- 1 唔同嘅車輛擺位，亦都擺咗啲適當嘅位置。第二，我哋亦都有住唔同嘅車輛，其實  
2 佢哋都了解自己嘅角色，譬如當時有啲好似係重型泵車咁樣，咁佢哋因應自己嘅職  
3 務，都知道自己係會搵到泊位泊喺邊，譬如佢泊咗喺廣宏街出面，佢有一個街井...
- 4 李澍桓大律師：喺呢度或者我哋協助你，我哋畀一張平面圖你睇一睇。
- 5 張樂恒先生：好。
- 6 李澍桓大律師：等我哋大家都可以跟得到你講嗰個。呢個應該就係大致上當時一啲主要救援  
7 車輛嗰個擺放，係咪？
- 8 張樂恒先生：呢個係擺緊鋼梯車，係鋼梯嘅位置，其他主要車輛...（聽不清）出去。
- 9 李澍桓大律師：你頭先有講到即係唔同嘅位置，就係譬如我哋喺圖中間見到有架類似藍色車  
10 輛嗰度，應該就係講緊嗰個迴旋處？
- 11 張樂恒先生：迴旋處，正確。
- 12 陸啟康法官：請問呢個圖係喺邊度搵得到？
- 13 李澍桓大律師：B5/4433 頁。如果我哋純粹就咁睇個即係圖，當然我有計過實際個距  
14 離，譬如你右手邊嗰度似乎都相隔咗有幾遠嘅位置，對於呢啲雲梯車--鋼梯車  
15 嘅操作其實有冇影響，尤其是水力方面？
- 16 張樂恒先生：我咁理解，佢哋擺喺嗰度都係一啲策略嘅位置，因為有好多唔同嘅因素，包  
17 括佢有啲竹枝跌落嚟，佢擺水源嘅位置咁樣。咁佢哋擺得喺嗰度一定有啲原因  
18 嘅。
- 19 李澍桓大律師：但係應該就唔會影響到嗰個所謂效用嘅？
- 20 張樂恒先生：唔會。
- 21 陸啟康法官：呢個係咩嘢時段嘅擺位？
- 22 李澍桓大律師：應該係最後期五級火之後嘅嗰個分布位置。
- 23 陸啟康法官：係咪？
- 24 張樂恒先生：係。
- 25 歐陽伯權博士：我有一條問題，唔該張生。張生，你可唔可以幫一幫我哋講一講疏散嘅指引  
26 嘅程序，身為指揮官，你點樣去定位幾時要疏散嘅呢？
- 27 張樂恒先生：就住疏散嚟講，我哋都有一啲既定嘅程序嘅。如果我哋收到求助個案嘅話，我  
28 哋就會出動我哋嘅（English Spoken）喇，即係搜索隊伍。我哋有既定嘅指  
29 引，就係有幾樣嘢要做。第一，就係我哋要派一隊去到嗰層樓嘅最頂位置嗰度，開  
30 咗嗰個天台嗰道門，個目的係疏散咗--如果有濃煙係聚集咗喺嗰個樓梯嘅話，因為  
31 樓梯係市民逃生嘅最主要途徑嚟嘅。我哋避免--如果真係有濃煙嘅話，就要開咗嗰  
32 道門疏散啲濃煙，然後就係最頂嗰兩層就做一個快速搜救疏散嘅行動，去睇一睇  
33 究竟有冇人喺最頂兩層嗰度暈低咗咁樣，同時問我哋亦都有唔同隊伍佢因為收到一  
34 啲嘅求助個案，去到嗰啲求助個案單位嗰度協助啲市民。但係正如頭先咁講，面對  
35 一個困難，就係呢啲通常都講緊係一個單位或者兩個單位著咗火，我哋先至可以有  
36 效咁樣去進行呢一個咁樣嘅搜救策略。而一般嚟講，如果我哋係有一啲嘅耐火間隔

1 盛，有效咁樣去阻礙到個火勢蔓延嘅話，係唔會引致到一個好似宏福苑咁大嘅火  
2 災。所以亦都因為呢個咁嘅大火程度，令我哋呢一個搜救嘅策略唔可以有效咁樣  
3 去，已經超出我哋應付嘅範圍。

4 歐陽伯權博士：今次嗰個疏散嘅程序，你哋係咁多座大廈一齊做定係逐一座做嘅呢？

5 張樂恒先生：我哋一齊做嘅，係由我哋嘅搜索隊係統籌晒一次去做。

6 歐陽伯權博士：今次因為你哋派咗咁多消防員去，因為啲消防員我哋知道係已經超越咗你哋  
7 平時五級火嘅人數多好多倍，咁會唔會因為呢個人數方面，可以疏散嘅程序會快好  
8 多呢？

9 張樂恒先生：我哋喺初頭面對嘅時候，就係嗰個火警嘅蔓延速度太快，我哋根本係入唔到去  
10 嗰個大廈裏面，所以我哋就用咗好多人手去撲滅個火警，撇住個火警，同埋移走一  
11 啲嘅竹枝，令到佢哋可以嘗試進入嗰個大廈範圍裏面。

12 歐陽伯權博士：好，唔該你。

13 陳健波議員：我想問一個相關問題，即係好多市民見到當日嘅電視畫面都好焦急嘅，即係點  
14 解唔會多啲水喉材射咁，呢個就真係大家感覺都係咁，而且係一個比較長嘅時間，  
15 你可唔可以解答下市民嘅疑慮呢？

16 張樂恒先生：其實我哋係就住現場嗰個情況已經調派咗我哋認為係足夠，甚至多過足夠嘅水  
17 柱--嘅滅火喉去做灌救。當然你話開多十條喉得唔得？咁會唔會有一個實質嘅效用  
18 我就唔敢講，但係就住當時嘅情況，我哋認為現場嗰個滅火喉嘅數量係足夠。

19 陳健波議員：我想再問多個問題，因為你係局長，亦都係嚟支援都係比較--或者唔係當區，  
20 咁就頭先你講咗個好重要嘅點，就係話今次火災嘅擴散速度嗰啲係從來都有見過  
21 嘅，咁我想了解，可唔可以咁講呢？因為你哋嘅做法一般都係上樓，因為你講一向  
22 救火災個方式就係喺樓入面發生，燒番出去，而家你喺出面燒入嚟，基本上都有乜  
23 見過咁大規模嘅方法，可唔可以講話無論係喺個救火策略、方法，你哋嗰個培訓其  
24 實都唔係應付呢一種嘅火災，可唔可以話你哋係--即係當然事後你哋有好多嘢可以  
25 做，但係我都想問你哋係唔係都係覺得根本係你哋嘅能力或者冇遇過會有有一啲咁  
26 大規模嘅火災？

27 張樂恒先生：我會咁樣講，喺我哋嘅滅火策略或者喺指引上面，其實我哋預期嘅情況係我哋  
28 嗰個耐火間隔，喺個設計耐火間隔上面係一定要有佢哋嘅耐火能力去控制個火勢蔓  
29 延，以至到我哋到場嘅時候，處理個火警嘅時候唔會係好似今次災難式嘅咁大規  
30 模。但係正正係今次嘅事件睇嚟嗰個耐火嘅能力似乎係做唔到佢應有嘅情況，又或  
31 者有其他原因令到佢嗰個火勢蔓個延速度係咁快、咁大。

32 陳健波議員：我再想問多個問題，就係我哋聽到消防處就係話，如果火災儘量就唔好搭靚，  
33 因為搭靚就會停，但係我亦都見到好多人靠搭靚成功逃生嘅，留喺屋企反而就係遇  
34 害，或者喺樓梯都好多人係遇害，其實你哋有冇重新檢討話究竟消防界市民嗰個意  
35 見應該係點，即係你好難話你隨機應變，唔會嘍嘛，咁究竟留喺屋企，定又要搭靚  
36 定係唔好搭靚，即係究竟可唔可以講下市叫應該點樣處理呢啲問題？

1 張樂恒先生：其實我哋一般畀市民嘅建議都係咁樣，就係如果可以逃走嘅話，最緊要係留意  
2 有冇濃煙，如果有濃煙嘅話，即係佢由單位離開，去到就近嘅樓梯去離開，如果見  
3 到有濃煙嘅話，就要返番入屋企裏面，然後就用濕毛巾去封番住啲罅隙，避免濃  
4 煙係入去個單位裏面，然後儘快打電話畀我哋去求救，即係同我哋講個位置嘅邊  
5 度。而事實上今次呢個事故嚟講，都有一定收量嘅市民係經過呢個方法，喺個火警  
6 較後期嘅時間我哋能夠成功拯救佢哋。

7 陳健波議員：搭粒個問題呢，究竟應該搭粒定係唔搭粒？

8 張樂恒先生：一般嚟講，我哋係唔建議佢哋搭粒嘅。

9 陳健波議員：另外上天台呢，因為而家你好多問題就係話大家都知道呢者雲梯最多即係射到  
10 15 樓就以下啲，而家香港咁多高樓大廈，上面啲人點樣算呢？佢係唔係應該走去  
11 防火層定走上天台，定係點？因為我見到你喺天台又救到，有啲喺天台又救唔到，  
12 咁市民應該點樣做呢？

13 張樂恒先生：我嘅建議都係總之見到有濃煙，就最緊要馬上返番入屋企裏面，然後打電畀  
14 我哋去做一個求救。

15 陳健波議員：即係經過呢件事，你都係覺得咁係比較好嘅。

16 陸啟康法官：我亦都問一問，不如就解釋下呢張相，呢張相可唔可以畀個 (English  
17 Spoken) 我？

18 李澍桓大律師：呢個係 B10 文件冊 5556 頁。主席，你會見到其實喺頂嗰度，呢個就係喺三  
19 級火嘅時候，嗰個雲梯車嘅情況。如果我哋剛才睇下一張 5557，呢個升級咗做四  
20 級火之後嗰個比較，所以喺三級火嘅時候...

21 陸啟康法官：B10，係咪？

22 李澍桓大律師：B10 文件冊，B10。

23 陸啟康法官：等我開咗先。B10。

24 李澍桓大律師：5556 同埋 5557。如果再落去 5558，嗰個就係升格做五級火之後初期嗰個  
25 情況嚟嘅。

26 陸啟康法官：不如解釋，我哋見到四同五其實都好多條喉、好多部車嘅，不如講下三，好唔  
27 好？即係三級火嗰陣時，其實喺嗰個時候係唔係足夠嘅呢？你可唔可以睇下呢張  
28 圖？

29 張樂恒先生：喺今刻嘅時候，我認為係足夠嘅。

30 陸啟康法官：你可唔可以解釋下呢？

31 張樂恒先生：咁其實就當刻就宏昌閣其實佢就率先起火，亦都係最大火嗰度，可以見到喺元  
32 洲仔里後面嗰度有兩條喉開咗出嚟，其實就係頭先許生一開始最先頭部署嗰兩條  
33 喉，就係 (English Spoken) 嗰度兩條喉，冇錯。然後就去到前面有火嘅時  
34 候--唔好意思，就另外再部署三條喉，喺前面嗰度，其實我想講一講，呢啲喉其實  
35 唔係戩直直咁樣企喺度，佢係周圍射嘅，即係會係就住佢現場個情況見到個火源，  
36 就去撲滅個火警咁樣，所以其實嗰個廣闊嘅程度係會比較大少少，總之就係做一個

1 滅火嘅工作喺前面見到。至於之後，咁至於宏建閣同埋宏新閣嗰兩條喉其實就係我  
2 叫佢哋開嘅，因為我見到後面嗰度著咗火，所以之後後期我就指揮另外一啲同事就  
3 開另外兩條喉，所以當時著咗火--當然仲有紅色嗰個鋼梯車，咁佢亦都係出咗水去  
4 撲滅緊一啲相對高層嘅火警嘅嗰陣時。

5 陸啟康法官：或者再問一問，其實係唔係即係有一個命令係落話「我而家要全部疏散」，即  
6 係有一個咁嘅命令落嘅，係咪？

7 張樂恒先生：當刻冇嘅。

8 陸啟康法官：即係成個事件都有話有一個命令「我而家要所有人即係疏散」，就有嘅，係  
9 咪？

10 張樂恒先生：喺我指揮嘅期間沒有。但我想補充一句，就係我哋見到--就係我確信當刻好多  
11 市民其實已經過我哋嘅警笛聲係得悉火警事故，然後我亦都親眼目睹佢哋係走落  
12 嚟逃生咁樣，咁所以我確信佢哋其實已經係疏散緊或者疏散咗嘅。

13 李澍桓大律師：主席，可以先睇下其他涉事方有冇問題，我有一個議題會之後澄清嘅。

14 陸啟康法官：係，好，唔該。

15 何卓衡大律師：主席，你好。我有一條問題想問張先生。

16 張先生，我係代表物管公司置邦嘅。咁頭先李大律師問到你一個問題，就係話  
17 嘅你到場嘅時候，有冇物管公司人員同你哋接觸或者你要求接觸佢哋，咁你嘅就答  
18 案就話冇見過佢哋，我想同你釐清一樣嘢，你嘅答案係話你想搵管理公司搵唔到，  
19 定係你有特別搵佢哋，所以冇接觸佢哋呢？

20 張樂恒先生：我所講嘅意係--或者以我嚟講，我自身冇物管公司接觸過我，而我亦都有去搵  
21 嗰啲物管公司。

22 何卓衡大律師：明白。所以你嘅答案其實就係話唔係話你到場，你想搵物管公司搵唔到佢  
23 哋，呢個說法係唔正確嘅？

24 張樂恒先生：唔係咁嘅意思。

25 何卓衡大律師：明白。咁呢次聽證會裏面，我哋聽到啲證據，就話物管公司工程部，特別係  
26 有一位工程主任林文欣先生有協助警方去睇宏福苑嘅平面圖，同埋協助警方理解宏  
27 福苑個屋苑設計。咁我個問題想問你，就係你點解冇特別諗過去搵物管公司嘅呢，  
28 情況係唔係話你係從救火嘅角度而言，係冇特別需要去聯絡呢個物管公司嘅呢？

29 張樂恒先生：喺我當時嚟講，我覺得我係未有一個好迫切需要要聯絡物管公司，因為嗰下其  
30 實都係個火警好嚴重，我需要集中我嘅精力去處理個火警，而當時我見到個火勢，  
31 其實我已經得到咗我需要知道嘅資訊。

32 李澍桓大律師：Okay。

33 陸啟康法官：有冇其他涉事方？跟住孫大律師有冇？都有。請你覆問。

34 李澍桓大律師：剛才你有提到有個所謂搜救隊（English Spoken），即係你用應該係  
35 SAR，係咪？

36 張樂恒先生：正確，我哋叫 SAR。

1 李澍桓大律師：呢個我諗佢個工作同做疏散就應該唔同嘅，因為呢個搜救隊以我嘅理解，佢  
2 就應該係嘗試進入火場去唔同嘅單位，尤其是即係接到報告話要上去嘗試做拯救嘅  
3 時候，佢哋嘅工作主要就係進入火場去個單位度或者報稱嘅地方度嘗試去將啲居民  
4 拯救出嚟嘅，係咪？

5 張樂恒先生：我唔會將件事分得咁開，其實都係係救人，主要係救人。因為其實好似頭先我  
6 所講，佢搜救隊佢由各個唔同嘅成員組成，咁佢有唔同嘅職務。頭先所講就係第一  
7 樣嘢，就係同樣重要嘅兩樣嘢，冇分先後。其中一樣嘢就係要上去個天台度打開  
8 嗰個防煙門，同埋喺最頂樓嗰兩層嗰度做一個快速嘅搜索，睇下有冇人暈低，嗰啲  
9 並唔係收到求助個案我哋先去做。咁亦都同時間如果我哋收到有求助個案嘅話，我  
10 哋都會派人員上去協助，去拯救佢哋，所以我相信唔需要將嗰件事分得咁開。

11 李澍桓大律師：但係我意思即係佢唔係喺地下度嘗試話嗌咪叫人去疏散，維持秩序嗰啲，佢  
12 搜救隊我相信唔係一個咁樣嘅角色嚟嘅？

13 張樂恒先生：唔係特登專責去做呢樣嘢，但係我...

14 李澍桓大律師：因為佢正如我頭先所講，就係佢主要係進入火場入面做救援？

15 張樂恒先生：但係我哋亦都可以透過--即係隨住嗰個事情嘅發展去調派嗰啲同事去做唔同嘅  
16 工作，去幫助市民嘅。

17 李澍桓大律師：有一個議題我唔記得咗，頭先同你跟進嘅，就係你話其實有做過一啲建議畀  
18 過你跟住嘅上司林浩俊先生，就住升格去四級火嗰個問題嘅，你可唔可以講到畀我  
19 哋知你當其時喺邊個時間同埋做咗啲乜嘢嘅建議？

20 張樂恒先生：我大概係喺 15:32 左右，就係喺個迴旋處左右嘅地方嗰度見到佢嘅，就亦都  
21 同佢交代咗其實而家我見到我所知嘅情況係點，包括就係五棟樓已經著咗火，尤其是  
22 宏建閣後面嗰個火勢當時都相當猛烈嘅，咁亦都現場資源係點樣，面對嘅困難係  
23 點樣，亦都有收到一個 (English Spoken) 嘅訊息係去拯救緊我哋嘅同事咁  
24 樣。

25 李澍桓大律師：所以我嘅講法就係你喺就住 15:32 你見到--因為我哋知道林先生 15:29  
26 到場，跟住你就同佢做個匯報，係咪？

27 張樂恒先生：正確。

28 李澍桓大律師：你匯報嘅過程入面除咗個 (English Spoken) 嗰個情況，你係唔係就係  
29 有向佢做一啲建議應該要升格做四級火，定純粹係就住個事實上面而家去到個火警  
30 咩嘢情況就做一個事實嘅匯報？

31 張樂恒先生：事實上嘅匯報。

32 李澍桓大律師：咁有冇你做到一個建議話「阿 Sir，我覺得應該要升格做四級火」？

33 張樂恒先生：呢個我唔敢肯定。

34 李澍桓大律師：就住嗰個 (English Spoken) 嘅情況，你剛剛提到--純粹亦都跟進埋，  
35 就係應該就係你到場做咗現場指揮嘅時候，嗰個拯救嘅工作你就交咗畀許隊長，即  
36 係剛才作供口嗰位同事繼續去做拯救嘅工作，係咪？

1 張樂恒先生：正確。

2 李澍桓大律師：我相信你就有直接去參與嗰個拯救何偉豪嗰陣時嗰個情況嘅，係咪？

3 張樂恒先生：我有要求佢有進度嘅，就儘快同我匯報。

4 李澍桓大律師：即係你就做監察、監督，但係就有自己親自去畀指示要點樣去做或者採取啲  
5 咩嘢行動？

6 張樂恒先生：正確。

7 李澍桓大律師：主席，我有其他問題。

8 陸啟康法官：其他有冇跟進？因為佢都有啲新嘅問題，冇涉事方想跟進？冇。

9 其實我都回應番，其實關於用呢個直升機撲滅呢個大廈，其實喺呢個嘉利大廈  
10 大火嗰陣時都有研究過，亦都係有對於用直升機嚟救呢個大廈嘅大火係都有一啲保  
11 留嘅，所以呢個即係我亦都睇過嗰個報告，都有講過呢一樣嘢。

12 另外，就我頭先同你同事講嘅嘢我唔再重複，我亦都係覺得你哋都即係盡咗  
13 力，即係我哋相信前線同事亦都盡咗力，亦都係辛苦晒。咁你今日作供完畢，唔該  
14 你。

15 張樂恒先生：多謝主席。

16

17 12 時 51 分消防處大埔消防局局長證人張樂恒先生作供完畢

18

19 陸啟康法官：我哋仲有兩位，係咪？

20 李澍桓大律師：係。

21 陸啟康法官：而家想係...

22 李澍桓大律師：主席，兩位都其實唔長，不過我建議--我有信心其實今日下午一定可以完到  
23 兩位證人，我估會唔會可能一個理想啲嘅，而家早少少午飯。

24 陸啟康法官：咁 2 點十五分我哋再返嚟，好唔好？2 點 15 分。

25

26 12 時 52 分聆訊押後

27 14 時 15 分聆訊恢復

28

29 14 時 15 分消防處分區副指揮官（新界東）證人林浩俊先生開始作供

30

31 陸啟康法官：係，李大律師。

32 李澍桓大律師：係，主席，下一位證人係新界區副指揮官林浩俊先生。係，林先生，喺你面  
33 前有一個聲明詞嘅，麻煩你先企起身讀出嗰個聲明。

34 林浩俊先生：本人林浩俊聲明，本人所作的證供，盡本人所知、所悉及所信，均屬真實。

35 李澍桓大律師：係，請坐，林生。就住宏福苑今次呢一個調查呢，我知道你係向委員會提供  
36 咗一份嘅書面證供，係咪？

- 1 林浩俊先生：係。
- 2 李澍桓大律師：我相信喺個證供嘅內容都係你所相信同埋所知係屬實嘅嘢講出嚟㗎喇，係
- 3 咪呀？
- 4 林浩俊先生：係。
- 5 李澍桓大律師：唔。講你少少嘅背景，就係你喺 2005 年加入消防處嘅？
- 6 林浩俊先生：係。
- 7 李澍桓大律師：然之後喺 2023 年就晉升到而家呢一個位置，就係新界東嘅分區副指揮官，
- 8 係咪？
- 9 林浩俊先生：2023 年升到去呢個職級，2025 年 11 月去調任新界東區分區指揮官。
- 10 李澍桓大律師：係，咁喺大火嘅時間你就係都係屬於新界東區分區嘅副指揮官，係咪？
- 11 林浩俊先生：係，正確。
- 12 李澍桓大律師：我哋從個記錄上面，我哋睇都係睇番 B10/5105 頁，咁我哋就見到你應該接
- 13 報要求你到場之後，你就喺 15:29 呢個時間到達咗宏福苑，係咪？
- 14 林浩俊先生：係。
- 15 李澍桓大律師：我哋亦都知道喺隨後嘅時間，你就係--你應該係當期時就係喺場最高職級嘅
- 16 一個消防處人員，係咪？
- 17 林浩俊先生：係。
- 18 李澍桓大律師：所以你亦都喺隨後就接過咗現場指揮官 (English Spoken) 嘅呢一個工
- 19 作，係咪？
- 20 林浩俊先生：正確。
- 21 李澍桓大律師：從客觀上，我哋都睇到 15:34 嘅時候，喺 5109 頁我哋見到你做咗一個
- 22 匯報喇，就住現場嘅情況，我哋一陣間會睇個內容嘅。另外，你亦都做咗一個決
- 23 定，就係將當時嘅三級火升級做四級火，係咪？
- 24 林浩俊先生：係。
- 25 李澍桓大律師：我哋睇一睇你喺 15:34，即係而家我哋見到你所作出個匯報嘅個信息入
- 26 面，其中你有報告番畀控制中心知，就應該當其時嗰幾座大廈嗰個火勢嘅一啲情
- 27 況，係咪？
- 28 林浩俊先生：係。
- 29 李澍桓大律師：然之後我見到有一句你就係話，英文呢度寫“(English Spoken) 許健
- 30 安(English Spoken)”，你睇到呢個係你當其時嘅信息，係咪？
- 31 林浩俊先生：係。
- 32 李澍桓大律師：我想就住呢個--我哋當然知道呢個就係關於嘗試去拯救何偉豪先生嗰個事件
- 33 嘅，係咪？
- 34 林浩俊先生：正確。
- 35 李澍桓大律師：當期時你收到向你匯報嘅，就住嗰個救援嘅情況，可唔可以講多少少畀我哋
- 36 知，有啲咩嘢資訊係畀到你？

- 1 林浩俊先生：好。當我去到現場大概係 15:32 嘅時間，高級消防隊長許健安就向我匯報番  
2 關於偉豪“Mayday”嘅呢一個消息，佢亦都簡單咁話咗畀我知佢做咗啲乜嘢去進  
3 行一個--嘗試去做一個試拯救嘅工作。
- 4 李澍桓大律師：係，喺呢一個匯報入面，以你當時得到嘅信息，其實搵到何偉豪先生未㗎？  
5 林浩俊先生：喺嗰個--喺當時嘅情景係未知道邊一位同事去發出呢一個“Mayday”信息，  
6 亦都未知道佢確實嗰個位置嘅？
- 7 李澍桓大律師：即係連係邊一位同事你哋都未知嘅？個身份。  
8 林浩俊先生：喺 15:34 呢個時間未知道嘅。
- 9 李澍桓大律師：係，即係當時都淨係知道有其中一位同事曾經發出嗰個“Mayday”求救嘅  
10 訊息，但唔就知呢個係邊個同事，係咪？
- 11 林浩俊先生：正確。
- 12 李澍桓大律師：另外，呢個信息之後有一句就係“(English Spoken)”，咁跟住有一  
13 啲進一步嘅資料，我想問你嘅就係呢個“ICS”其實係乜嘢嚟㗎？
- 14 林浩俊先生：ICS 係一個簡稱嚟嘅，佢個全名就係“(English Spoken)”，其實就係  
15 嗰個事故現場指揮系統嘅一個簡稱。
- 16 李澍桓大律師：即係其實呢個係由高至指揮官，即係現場嘅指揮官到前線救火嘅同事係咪都  
17 靠呢個系統嚟做所謂聯絡或者畀指示、接收指示㗎？
- 18 林浩俊先生：會靠呢一個系統去大概咁去安排資源嘅分配，但係就唔係做一個溝通嘅模式  
19 嘅。
- 20 李澍桓大律師：係，另外我哋有見到就係從你哋消防處提供嘅一啲文件，我哋知道有一樣嘢  
21 叫做“(English Spoken)”，呢個就通常係咪--首先，呢一個咁樣嘅架構係  
22 咪喺三級或者以上嘅火警就會出現？
- 23 林浩俊先生：正確。
- 24 李澍桓大律師：咁實際上其實呢一個係--呢個所謂(English Spoken)同我哋剛剛睇到  
25 呢個 ICS 又有冇啲咩嘢關係，係咪同一樣嘢？
- 26 林浩俊先生：同一樣嘢嚟嘅。
- 27 李澍桓大律師：係，你去到現場嘅時候，其實我相信係咪應該都已經有過二百個前線即係消  
28 防員嘅同事到咗現場㗎嘞？
- 29 林浩俊先生：我當刻唔肯定有呢個數，但係後期我再睇番啲資料應該未去到呢一個數嘅，如  
30 果我到場 15:29 嘅時間。
- 31 李澍桓大律師：如果以你記得，知唔知你大概你要統籌嘅人數係幾多？
- 32 林浩俊先生：如果就住一單三級火警統籌嘅人數大概七八十人咁樣，但係我知道現場嗰個人  
33 手安排已經係超過呢一個人數㗎嘞。
- 34 李澍桓大律師：唔。你就住喺現場作為最高嘅指揮，要了解情況喇，亦都要相應地可能給予  
35 唔同同事唔同嘅指示喇，我想了解多少少，因為似乎我聽嚟聽去就係得一個你哋本  
36 身用緊嘅通訊系統咁樣去通訊，喺呢一個咁樣溝通或者統籌上面，其實對於你嚟

1 講，當時有冇真係做成一啲困難去給予指示或者接收信息？

2 林浩俊先生：好，我解釋一下嗰個通信，其實我哋一個 RT 我哋叫做，其實一通話器，入面  
3 係可以去調校唔同嘅頻道。我哋火場有一條頻道，喺火場同我哋調派中心亦都有另  
4 一條頻道，其實我哋係可以通過呢兩條頻道去分別同唔同嘅對象去溝通嘅，所以唔  
5 存有一啲話好難去克服嘅一啲困難嘅。

6 李澍桓大律師：你到場嘅時應該未有嗰個所謂流動指揮車，係咪？

7 林浩俊先生：未到。

8 李澍桓大律師：唔。嗰個就應該係--我哋好似有陣時電影入面見到即係一架車，入面有一個  
9 指揮嘅總部喺度咁樣囉，係咪呀？

10 林浩俊先生：正確。

11 李澍桓大律師：唔。就住剛才關於即係嘗試呢個“Mayday” message 嘅呢一個拯救嘅行  
12 動，你係大概到幾時先知道原來出事嗰位同事係何偉豪㗎？

13 林浩俊先生：去到大概係 15:55 呢個時間喇。

14 李澍桓大律師：係。

15 林浩俊先生：去到呢個時間，咁我根據番嗰個證人口供都提過，就係喺嗰個時間我發現到有  
16 同事喺宏泰嘅正門出口就去嘗試拯救另一位同事，咁喺嗰個時間就知道佢係阿偉豪  
17 㗎。

18 李澍桓大律師：都係一啲唔開心嘅情節喇，我相信你當時見到嘅就係有同事拯救緊一個就當  
19 其時似乎係馴咗喺嗰燒著嘅竹棚上面，而似乎係不省人事嘅一個同事，係咪？

20 林浩俊先生：係。

21 李澍桓大律師：唔。係咪喺呢一個時間，其實你哋先至叫做真係知道原來呢位同事就係何偉  
22 豪喇，同埋即係叫做喺嗰度搵到佢，先至知道佢嗰個即係位置？

23 林浩俊先生：我本人係。

24 李澍桓大律師：有冇向你匯報過話其實我哋已經知道呢一位同事喺邊一個大廈、邊一層樓，  
25 但係我哋冇辦法上到去，你有冇收過一啲咁樣嘅信息或者匯報？

26 林浩俊先生：有嘅，呢啲 message 初頭都係知道佢喺 30 樓嘅。

27 李澍桓大律師：係，但係唔知邊座吖嘛？

28 林浩俊先生：我聽唔到邊座。

29 李澍桓大律師：係，因為我哋有聽過你另外一啲同事之前嚟作供，佢哋都講，其實佢哋唔知  
30 道佢實際喺邊座大廈入面。所以我想純粹釐清楚，就係你應該都係喺 15:55 呢個  
31 時間呢，即係第一次發現阿偉豪嘅時候，你亦都係第一次知道佢原來就喺嗰度即係  
32 受傷，係咪？

33 林浩俊先生：係。

34 李澍桓大律師：我想問多你少少關於升級做四級火嘅呢一個決定，因為我哋知道你到場嘅時  
35 候，當然要同事向你匯報個情況，跟住喺大概十分鐘嘅喇，係咪？應該就係你去做  
36 呢一個咁樣嘅決定，升格做四級火，當時時你考慮啲乜嘢嘅原因或者有啲乜嘢因

1 素，令到你要決定將佢升級㗎？

2 林浩俊先生：我可以形容一下當時情況嘛？

3 李澍桓大律師：得，當然。

4 林浩俊先生：我大概係 15:29 去到現場，個位置其實就係喺宏福苑入面嘅大埔浸信會公立  
5 學校嗰度，眼前見到係一個史無前例地惡劣嘅環境㗎嘍。當中有五棟高層嘅住宅樓  
6 宇係著咗火，當中嘅三棟係有火點喺個外牆棚架，有一啲已經係發展成一啲一筍筍  
7 嘅火，已經唔係火點嘞。另外，有兩棟係比較嚴重嘅，係完全畀濃煙咁樣去包圍  
8 嘅。咁我其時就衝向呢個宏昌、宏泰嗰個方向，去到大概迴旋處嗰個位置，就感受到  
9 其實不斷地有好多嘅一啲雜物跌落㗎嘍，有好多棚網飄落㗎嘍，有好多竹枝插落  
10 㗎嘍。而呢一...

11 李澍桓大律師：喺呢度停一停你，就住棚網飄嗰個情況，你當時嘅觀察佢係淨係飄到落地  
12 定還是有冇留意到其實佢已經飄咗去第二個大廈，將啲火勢蔓延，你自己有冇見到  
13 㗎？

14 林浩俊先生：冇去專登留意，但係如果以推斷嘅話就係起火最大嗰個樓宇，而我喺頭先學校  
15 嘅位置見到宏建、宏新都已經著咗火，咁我推斷到佢係因為一啲物件令到呢個火勢  
16 蔓延去一啲大廈度嘅。

17 李澍桓大律師：唔，我相信其中當日救援嘅一個挑戰，就係我哋知道嗰個火警警報系統其實  
18 係失效嘅，或者大部分嘅大廈都係失效嘅。去到現場，你接手咗，就住嗰個疏散嘅  
19 工作，首先第一，匯報畀你當其時嗰個情況，你可唔可以講一次，講畀我哋知當時  
20 嗰個人群疏散嘅工作係點樣？

21 林浩俊先生：首先就係張樂恒喇，佢就去報告番畀我聽做咗啲乜嘢、發生咗啲乜嘢。佢都有  
22 提及過其實喺唔同樓宇嘅地下都有一啲居民係疏散緊出嚟嘅，係，咁呢個就係我獲  
23 得到嘅信息。

24 李澍桓大律師：你就住呢一方面嘅工作，有冇自己作為現場指揮官再畀任何進一步指示？

25 林浩俊先生：其實事實上當日，我頭先都講過，我去咗昌、泰嗰邊，就去管理嗰個火源嘅撲  
26 滅，或者係處理偉豪嘅“Mayday”嘅一個拯救喇，我同我嘅同事亦都分工，佢就  
27 去處理建、新、道、仁嗰邊嘅一啲疏散工作。而事實上消防同埋警察一直都有一個  
28 合作嘅機制，喺一個災場嗰度，消防會去做一啲滅火救援工作，警察就會做一個疏  
29 散或者（English Spoken）嗰個地方嘅工作，而喺當日亦都係有呢一個咁嘅安  
30 排。

31 李澍桓大律師：就住剛才即係你話解釋點解將佢升做四級火喇，你就話見佢都有啲雜物跌落  
32 嚟燒得好強烈呀咁，有冇其他嘅原因再令到你--尤其是喺人手上面，你當其時有冇  
33 考慮過係咪其中升做四級火嘅一個原因？

34 林浩俊先生：我答咗先。火勢猛烈，佢蔓延得快喇，佢嗰個燒嘅範圍好大喇，另外，我亦都  
35 收到好多求助個案個數字不斷咁上升，呢個係個原因，咁就係正正因為呢啲原因，  
36 所以我考慮過我係需要多啲資源同埋需要一個高啲層階嘅事故現場指揮系統去處理

1 呢一個事故，所以我就將個火警級別升做四級。

2 李澍桓大律師：唔，資源我諗我就明喇，即係多啲可能唔同類型嘅救援車喇、多啲消防員嚟  
3 幫手喇，你話要一個「更高層階嘅一個指揮系統」，嗰個係其實講緊啲乜嘢嘍？

4 林浩俊先生：即係 ICS 呢個 system 呢，其實就係話佢係點樣分配現場嘅資源去做一啲滅  
5 火救援嘅工作。

6 李澍桓大律師：係。

7 林浩俊先生：如果將一個火警升級嘅話呢，咁嗰個現場總指揮嗰個職位就會比較高，現場嚟  
8 到嘅資源多咗之後呢，就可以分開唔同 sector 去管理嗰個現場嘅資源配置。

9 李澍桓大律師：唔，即係變咗你當其時--睇下我有冇理解錯，即係你自己覺得可能嗰個火勢  
10 呀各樣，種種你剛才講嘅原因呢，可能你都認為自己未必係足夠喺現場做一個指  
11 揮，係咪咁嘅意思呀？

12 林浩俊先生：同意。

13 李澍桓大律師：所以你希望有更高階嘅上司嚟到現場去坐鎮，去做指揮，係咪咁樣理解？

14 林浩俊先生：同意。

15 李澍桓大律師：唔。正如我剛才所講，其中救援一個或者疏散一個困難就係因為個火警警報  
16 系統喇，以你所知，即係亦都做到都頗高嘅職位嘞，如果去到現場係好似宏福苑  
17 咁，個火警警報系統係失靈嘅，咩原因都好。有冇以你所知喺制訂嘅防火、救火嘅  
18 策略、指引上面去畀一啲所謂指示你哋應該要點樣處理，就住疏散嗰方面，譬如用  
19 啲乜嘢替補嘅方法，有冇呢啲咁嘅指引嘍？

20 林浩俊先生：冇指引，但係相關嘅工--我想補充。

21 李澍桓大律師：係。

22 林浩俊先生：相關嘅工具呀，或者係一啲行動要注意嘅嘢，其實我哋喺不斷嘅操練嗰度我哋  
23 都會理解到、知道嘅，但係如果要係一個好似 order 咁嘅形式，所話按部就班咁  
24 樣做呢，就我理解冇。

25 李澍桓大律師：係，唔好講即係 order，譬如你剛才講到話過往都可能有啲訓練、有啲指示  
26 或者指引畀咗你哋，咁就住好似宏福苑咁，譬如可能八座入面有六座嘅火警警報系  
27 統都失靈，牽涉嘅每一座居民都有一定嘅人數嘅。咁從你所認識，從訓練又好，過  
28 往嘅一啲訓示又好，你當時覺得可以做嘅係乜嘢嘅替代方案可以去彌補呢個火警警  
29 報系統失靈嘅呢個情況呢？

30 林浩俊先生：當時去到現場喇，咁就都係根據番一貫我哋同警察嘅合作模式喇，咁就係佢哋  
31 去--其實我哋都有喺現場，即係建、新、道、仁對出個空地嗰度將啲居民帶走嘅，  
32 但係用乜嘢嘅協助呢？我頭先都提起就係話消防車上面嗰個揸燈、警車上面嘅一個  
33 擴播系統喇咁樣，咁就會用番現有嘅資源去做一個疏散。

34 李澍桓大律師：唔，我想同你探討多少少，就係因為我其實同許隊長都有問過嘅呢，就係話  
35 其實如果當其時個消防車唔係淨係著燈，而係加番個響聲落去，即係有嗰個警報，  
36 會唔會有幫助？定還是你覺得會有反效果呢？

- 1 林浩俊先生：其實當時我哋消防車由消防局去到現場，其實一路都係響住（English  
2 Spoken）嘅，去到現場都唔係話即刻熄嘅咁樣。
- 3 李澍桓大律師：係。
- 4 林浩俊先生：其實都係有一個 alarm 嘅作用嘅。
- 5 李澍桓大律師：係。
- 6 林浩俊先生：只不過去到現場我哋配合埋警察嗰個擴播系統，可能將嗰個消防車上面嘅  
7 （English Spoken）去調低會比較適合啲。
- 8 李澍桓大律師：明白。
- 9 陸啟康法官：或者當日有冇--你啱啱去嗰陣時，在場嗰啲消防車有冇繼續響住嗰個警號嘍？
- 10 林浩俊先生：係，主席閣下，有部分冇、有部分冇。係嘞，如果喺宏福--廣宏街嗰啲，可能  
11 啱啱到現場佢都仲係著緊嘅，但係入到去宏福苑嗰個 EVA，即係迴旋處，嗰啲就已  
12 經--就熄咗嘅。
- 13 陸啟康法官：所以可唔可以咁講，即係不同時間會有唔同嘅嘢，咁所以不停都會有啲聲係響  
14 住嘍？
- 15 林浩俊先生：係，同意。
- 16 李澍桓大律師：我哋從你之前嚟作供嘅兩位同事都有聽到，即係佢哋都有交代有面對唔同嘅  
17 一啲挑戰，當日喺宏福苑，包括因為有一啲雜物嘅阻礙、跌落嚟嘅竹喇各樣嘢，你  
18 亦都係曾經喺嗰度亦都做過現場指揮喇，我亦都仍然想問下你，喺你當日雖然話唔  
19 係好長嘅指揮嘅時間，但係我相信你之後都有繼續留低幫手協助做救援嘅工作，係  
20 咪？
- 21 林浩俊先生：係。
- 22 李澍桓大律師：除咗我頭先講嘅嗰啲情況，你有冇一啲其他你自己經歷到嘅一啲困難，你想  
23 同我哋係分享，等我哋可以去考慮係咪需要做改善或者做檢討？
- 24 林浩俊先生：當時嘅環境已經係一個史無前例嘅困難囉，係嘞。
- 25 李澍桓大律師：其實統籌，我相信接近，即係就算你講八十人，其實雖然話你哋可能都一向  
26 有訓練喇，但係我相信其實都唔係一個容易嘅事嘍，係咪呀？
- 27 林浩俊先生：就住當時嘅情況，唔係一件容易嘅事嘍，但係我哋每一個人員或者係車間，  
28 都有一個對住自己工作嘅理解嘅，即係佢會「自動波」，好多嘢都會做得到嘅。
- 29 李澍桓大律師：就住你哋其中一樣嘢，我知道就係會不斷收到一啲求助嘅電話喇，即係可能  
30 999 或者跟住接駁到去消防局嗰個控制中心。就住呢一啲咁樣嘅求助嘅個案呢，你  
31 哋有冇當其時一個制訂嘅政策係應該要點樣處理，或者嗰個緩急先後係點樣做法？
- 32 林浩俊先生：我哋聽過呢啲求助嘅電話喇，有責任盡力去將佢哋屋企人救番出嚟，而喺我  
33 到場嘅時間，我收到嘅資訊就係全部嘅求助個案都係喺宏昌閣嘅。
- 34 李澍桓大律師：係。
- 35 林浩俊先生：所以當時就我指揮現場嘅消防人員就係儘快去打通宏昌閣正門畀著火嘅雜物封  
36 閉咗嘅入口，係嘞，製造一個生口，畀宏昌閣嘅居民走出嚟，亦都畀我消防人員衝

1 人去。

2 李澍桓大律師：唔，咁但係我相信，因為我哋應該有聽到證供，亦都係應該要到去四點幾嘅  
3 時候先至可以有第一批人可以入去到宏昌閣做救援，係咪呀？

4 林浩俊先生：時間嗰度，我唔清楚。

5 李澍桓大律師：唔緊要。主席，我有其他嘅問題。

6 陸啟康法官：各個涉事方，咁政府孫大律師。

7 孫靖乾資深大律師：係，主席，我有一個問題想問番林先生。係，林先生，頭先你就--李大  
8 律師問到你係關於即係話如果現場係假如要疏散一啲嘅居民，即係有冇一個嘅指  
9 引，咁你就話有一個--即係叫做好似一個 order 嘅形式嘅指引，但係你話亦都有一  
10 啲嘅即係訓練或者譬如話你平時嘅經驗等等，可唔可以同我哋即係分享一下，就  
11 係話即係關於譬如話嗰個訓練或者經驗上係會有啲乜嘢嘅情況，同埋即係如果譬如  
12 話真係要做一個所謂嘅疏散或者 (English Spoken)，呢個係會點--有啲咩嘢  
13 因素你會決定，同埋啲有啲咩嘢情況下會認為適合或者唔適合，係咪全部人定係部  
14 分人，定係點呢？

15 林浩俊先生：好，其實呢個疏散因為牽涉到嗰個屋苑嘅居民呀咁樣，咁所以平時嘅訓練其實  
16 係融合埋一啲 (English Spoken)，即係嗰個樓宇嘅居民一齊去做，咁先至做  
17 到嘅。咁我哋會留意啲咩嘢呢？留意可能係佢樓梯嘅數目呀，或者樓梯嘅--通向唔  
18 同地方嗰個鋪排，係嘞，咁就會按呢一啲唔同嘅情況去做一個疏散嘅演習。

19 孫靖乾資深大律師：咁我亦都想問一問你，就係頭先亦都有啲嘅同事有講過，就話其實譬如  
20 如果有啲居民佢係即係被困喺宏福苑，當時係好大火，咁佢哋會唔會係要選擇去疏  
21 散嘅時候，咁都要睇下情況，即係睇下有冇一啲嘅譬如會唔會有一個好濃嘅煙等  
22 等，呢方面你可唔可以都同我哋分享下，即係譬如如果一個居民，佢應該或者唔應  
23 該疏散，其實會考慮係啲咩嘢因素？或者你哋即係消防處嘅同事又會考慮啲咩嘢因  
24 素？

25 林浩俊先生：如果就住居民自身嘅，就係睇番佢自己嗰個身體狀況可唔可以逃生先，呢個第  
26 一個。第二就係講番嗰個現場情況，好似今朝同事所講，或者我哋一貫都認知，就  
27 係如果開門見到係有濃煙嘅，其實係應該立刻門番道門先，喺一般情況底下，即係  
28 唔...

29 孫靖乾資深大律師：我想問如果你話見到有濃煙嘅時候，咁你哋都會建議可能係要即係門番  
30 門，即係呢個可唔可以再--你會唔會可以再解釋到多少少，即係補充下，咁其實裏  
31 面嗰個考慮係啲咩嘢？即係譬如要疏散，佢去到嗰個樓梯口，咁佢見到即係濃煙密  
32 佈，個情況好惡劣，咁其實要考慮嘅，或者叫佢哋返番去，最主要嗰個原因，我諗  
33 好多人都可能會有呢個疑問，咁你哋會唔會可以再補充多少少去解釋下？

34 林浩俊先生：好。見到濃煙，因為居民都唔能夠去評估究竟嗰一啲煙係由下層定係上層產生  
35 嘅，所以如果佢貿貿然去做一個逃走嘅話，咁可能會承受嗰個風險仲高，所以喺一  
36 般情況底下，佢返番入屋，門埋道門，用番啲濕毛巾去封咗嗰啲門隙，會係一個比

1 較合適嘅做法嚟嘅。

2 孫靖乾資深大律師：好，唔該晒林先生。

3 李澍桓大律師：主席，一個純粹係就住剛才孫大律師嗰個問題。

4 我相信剛才孫大律師問你嘅，講緊嘅就係咪應該我哋了解所謂叫做 (English  
5 Spoken) 嘅嗰個情況。當然剛才問到就係話，即係如果個大廈已經著咗火，有濃  
6 煙，咁你都講咗，即係其實好視乎個情況係咪應該繼續留喺個單位，定還是嘗試逃  
7 生會係有作用。所以我想反過嚟問你，就係因為我哋知道尤其是喺火警嘅初期，有  
8 啲大廈就算有火都未係好嚴重，咁我哋亦都知道有一座大廈其實係完全冇燒到，咁  
9 我想問你喺嗰啲情況嘅時候，喺你嘅專業角度，你認為佢哋應該係所謂叫做  
10 (English Spoken)，即係留喺個原址等待救援，定還是應該離開嗰個大廈？

11 林浩俊先生：如果喺一般情況，都係應該留番喺個大廈。但係如果而家喺呢一個情況睇番，  
12 可能道、仁嗰啲可以早少少去逃生。而事實上其實大部分嘅居民都做出咗一個逃生  
13 嘅，即係好似建、新、道、仁嗰個。

14 李澍桓大律師：但係正正就係我嘅意思就話，如果譬如係真係--尤其是個火勢未波及到去嗰  
15 個大廈，或者未去到好嚴重嘅時候，你嘅講法係咪即係都認為佢唔好離開個大廈，  
16 好過離開個大廈？

17 陸啟康法官：其實可唔可以咁講？其實即係英國個大火就有個 (English Spoken) 嘅  
18 (English Spoken)，叫人留喺度，咁呢個都即係發覺未必一定係可行嘅。所  
19 所以我見消防處都唔係話一定要咁樣樣嘅，所以就要教人走嗰陣時就有逃生三寶要拎  
20 住咁樣。其實即係好視乎個火勢，其實如果聽到個鐘，市民就應該一定就擺逃生三  
21 寶離開，如果佢離開嗰陣時佢遇到危險，即係包括濃煙或者咩嘢，咁佢就應該返番  
22 去自己屋企嗰度等救援，係咪其實應該係咁樣樣？

23 林浩俊先生：同意，主席。

24 陸啟康法官：即係其實都會好視乎個環境嘅，總之...

25 林浩俊先生：同意。

26 陸啟康法官：...聽到火警鐘就要即走，擺三寶，走，如果出面係好多濃煙就返番屋企？

27 林浩俊先生：係，同意。

28 李澍桓大律師：冇其他問題，主席。

29 陸啟康法官：另外，我想問另外一個問題，我唔知係咪應該問你。因為我哋去現場睇嗰陣  
30 時，我哋都有同事同我哋解釋，就話其實救火嗰陣時候，如果知道有人喺入面嘅  
31 話，你就要小心，因為你嗰個水，嗰個火場嗰個溫度好高嘅時候，你射啲水入去，  
32 啲水就會變成蒸氣，就會危害入面啲人嘅危險，因為可能會蒸熟呢一個人添。咁我  
33 睇過有一啲嘅即係消防嘅手冊都有講過呢一樣嘢，咁我想問喺今次呢件事入面，你  
34 哋會唔會有--因為係呢一樣擔心因為嗰個樓宇入面有人，而係因為你有呢個顧慮，  
35 令到你哋嗰啲救火嘅時候有啲嘅需要調整嘅地方？

36 林浩俊先生：同意，主席。

- 1 陸啟康法官：其實今次你哋係咪真係--因為你知道好多人喺入面㗎嘛，咁你哋個灑水個策略  
2 係點樣樣？
- 3 林浩俊先生：係，主席，我哋個灑水或者滅火個策略就係由低至頂，係，由底至頂，每  
4 一層如果我哋能夠係去打通咗條通道嘅，而又可以係確認到佢唔會翻燒嘅，即係封  
5 咗個後門--個退路嘅，咁我哋就會再向上推進，呢個就係我哋今次嘅滅火策略㗎  
6 嘅。
- 7 陸啟康法官：所以係先救低層火？
- 8 林浩俊先生：係。
- 9 陸啟康法官：即係等你可以有一個即係所謂生口？
- 10 林浩俊先生：有一個生口畀同事繼續向上進攻，而係如果喺過程中搵到有被困嘅居民，我都  
11 要確保到嗰個退路係能夠容許到佢去逃走。
- 12 陸啟康法官：因為呢個其實都係你哋嘅指引㗎嘛，我見其實因為好似喺嗰個嘉利大火一  
13 樣，都係你要上去，你唔可以上咗去跟住救人落唔番㗎，即係嗰條路封咗，其實就  
14 冇用㗎嘛。
- 15 林浩俊先生：係，同意，主席。
- 16 陸啟康法官：所以你哋就不停要將嗰個生口或者嗰個我哋叫係一個 (English Spoken)  
17 係要 keep 住係冇火先至係得㗎嘛？
- 18 林浩俊先生：同意，主席。
- 19 陸啟康法官：但係我想問，今次其實如果你喺出面救火嘅時候，你射水，其實都可以咁樣  
20 射，滅嗰個火嘅，係咪？即係唔會話因為驚有人喺入面，然後跟住你--會唔會有影  
21 響，其實？
- 22 林浩俊先生：我嘗試...
- 23 陸啟康法官：即係我見你哋喺大廈出面你哋好多水喉射上去嘅，咁其實你哋都係係咁射嘅  
24 啫，即係唔會話因為驚有人喺入面，而會有咩嘢調整咁樣樣？
- 25 林浩俊先生：主席，我嘗試下回答，我未必係專家。
- 26 李澍桓大律師：主席。
- 27 陸啟康法官：係。
- 28 李澍桓大律師：唔好意思，其實就住救火嘅策略，我哋知道會有另一位再高級啲嘅消防處嘅  
29 證人會處理。
- 30 陸啟康法官：佢會處理？
- 31 李澍桓大律師：㗎。
- 32 陸啟康法官：所以我都問--咁不如我留番問佢，好唔好？唔該你。
- 33 林浩俊先生：好，唔該主席。
- 34 陸啟康法官：咁冇其他問題嘅話，我都係重複番頭先我同你同事講嘅說話，好多謝你今日上  
35 嚟畀證供，唔該晒，林生。
- 36 林浩俊先生：好，唔該。

- 1
- 2 14 時 50 分消防處分區副指揮官（新界東）證人林浩俊先生作供完畢
- 3
- 4 14 時 51 分時任消防處副消防總長（新界北）證人黃景文先生開始作供
- 5
- 6 李澍桓大律師：主席，今日最後一位證人係前副消防處總長黃景文先生。
- 7 係，黃先生，喺你面前有一個聲明嘅詞嘅，請你先企起身讀出嗰個聲明。
- 8 黃景文先生：好。本人黃景文聲明，本人所作嘅證供，盡本人所知、所悉及所信，均屬真
- 9 實。
- 10 李澍桓大律師：係，請坐，黃先生。黃先生，我知道你而家就應該係由今年 1 月起就--而家
- 11 進行緊個退休前嘅休假，係咪？
- 12 黃景文先生：係，冇錯。
- 13 李澍桓大律師：但係其實我哋知道你喺尤其是宏福苑大火嗰個時間，你嗰個職位就應該係香
- 14 港嘅副消防總長，係咪？
- 15 黃景文先生：係，冇錯。
- 16 李澍桓大律師：咁我哋都知道你喺大火當日，其實係去到大概三點零鐘嘅時候，你係到咗現
- 17 場，亦都曾經做過現場嘅所謂（English Spoken），現場指揮嘅，係咪？
- 18 黃景文先生：正確。
- 19 李澍桓大律師：就住今次委員會嘅呢個調查，我哋亦都知道你係向我哋提供咗一份書面嘅證
- 20 供嘅，呢個你記得？
- 21 黃景文先生：記得。
- 22 李澍桓大律師：係，咁我相信證供嘅內容都係根據你所知、所信，係真實而講出嚟嘅，係
- 23 咪？
- 24 黃景文先生：係，正確。
- 25 李澍桓大律師：咁我想問番你少少關於當日嗰個你在場，包括指揮、包括救援嘅一啲事情，
- 26 我哋知道你就係 15:11 呢個時間，就應該係消防嘅控制中心就畀指示你，要求你
- 27 到場，係咪？
- 28 黃景文先生：佢唔係指示我到場，其實我嗰陣時 15:11 係三級火警。
- 29 李澍桓大律師：係。
- 30 黃景文先生：其實如果喺嗰個調派方面，我係不需要到場嘅。
- 31 李澍桓大律師：係。
- 32 黃景文先生：但係我個慣性就係，我就係--因為我嗰區，我負責嗰區，咁我就自己主動去話
- 33 畀控制中心知我去現場。咁其實呢個係慣性嘅，因為我逢嘅三級火警，我自己都會
- 34 儘快去到现场嘅，因為咁樣如果真係有事發生，即係升級，升四級火警，我可以
- 35 （English Spoken）住，因為四級火警先係我（English Spoken）。
- 36 李澍桓大律師：係，我相信就係你大概 15:34 嘅時間到咗現場？

- 1 黃景文先生：係，冇錯。
- 2 李澍桓大律師：跟住喺聽過一啲在場向你嘅匯報之後，你就係 15:50 嘅呢個時間就接手做
- 3 咗現場嘅指揮，係咪？
- 4 黃景文先生：係，四級火警嘅指揮。
- 5 李澍桓大律師：咁我亦都相信當其時你就係在場最高職位嘅一個消防嘅...
- 6 黃景文先生：正確。
- 7 李澍桓大律師：...代表。我哋知道就跟住去到係咪應該 16:18 嘅時候，跟住就由於再升
- 8 級，所以--定係因為其他原因，所以有第二啲更高...
- 9 黃景文先生：唔係再升級，仍然都係四級火警。
- 10 李澍桓大律師：係。
- 11 黃景文先生：咁只係因為四級火警--我要解釋番先，咁四級火警就係副消防總長同埋消防總
- 12 長佢是但一個去負責嘅。
- 13 李澍桓大律師：係。
- 14 黃景文先生：咁四級火警我係可以負責，但係就鄧 Sir，鄧明華（譯音）先生就佢到咗場，
- 15 咁佢話佢（English Spoken）。
- 16 李澍桓大律師：係。
- 17 黃景文先生：即係佢做指揮官，咁就我將個呢個責任就佢（English Spoken）番，係
- 18 嘞，咁而佢當時就委派咗我，我就做呢個（English Spoken）。
- 19 李澍桓大律師：係。
- 20 黃景文先生：去負責整個救援嘅行動。
- 21 李澍桓大律師：我想問少少就係關於首先呢一個所謂（English Spoken），一陣間我會
- 22 再問你救援嘅工作。呢個救援係咪我哋所知嘅所謂（English Spoken）定係一
- 23 般即係所有嘅救援？
- 24 黃景文先生：（English Spoken）
- 25 李澍桓大律師：即係入火場入面？
- 26 黃景文先生：嘎，因為我哋嘅術語就係（English Spoken），SAR，或者我哋叫 S-A-
- 27 R，SAR。
- 28 李澍桓大律師：所以你就係當時就係負責咗呢個 SAR 嘅呢個行動？
- 29 黃景文先生：係，（English Spoken），係嘞，咁我個（English Spoken）個名就
- 30 係（English Spoken）。
- 31 李澍桓大律師：咁就住呢個救援嘅行動，我相信你就係即係除咗鄧 Sir 之外，你就係最高級
- 32 發司號令畀指示？
- 33 黃景文先生：係嘞，咁其實呢個就係一個（English Spoken），我哋叫（English
- 34 Spoken），現場指揮系統。咁鄧 Sir 就係最高級嘅，即係如果有 IC，我哋叫 IC
- 35 係最高級，咁下低佢會分第二個（English Spoken）就會分唔同嘅（English
- 36 Spoken），咁我就負責（English Spoken）嘅，亦都有其他同事就負責

1 (English Spoken)。

2 李澍桓大律師：呢個係咪就係我哋都有聽過嘅所謂叫做三個層面，(English Spoken)  
3 嗰個(English Spoken)？

4 黃景文先生：現場指揮系統，三個或者四個，可以，睇下你點樣數法，佢(English  
5 Spoken)係唔同嘅。

6 李澍桓大律師：我哋講番鄧 Sir 到之前先，因為我哋知道你喺到達咗現場，聽咗匯報之後，  
7 似乎根據你嘅證人口供，你都講你亦都向控制中心就住現場嘅情況做咗一個報告  
8 嘅，咁你觀察完，做咗一個報告，咁如果我哋不如直接睇第 8 段你嗰個證人口供，  
9 就應該係 WS2/74/1005，咁呢個就係你嘅證人口供，如果第 8 段，咁我哋見到就  
10 話你 15:39 嘅時候，你就觀察到已經有六座嘅大廈著咗火，咁就...

11 黃景文先生：係，冇錯。

12 李澍桓大律師：...亦都講出咗其實係邊六座大廈。

13 黃景文先生：係，正確。

14 李澍桓大律師：咁而你用嘅字眼都基本上尤其是宏昌、宏泰，你就用咗(English  
15 Spoken)，即係我相信個意思就係，第一，就已經係個火燒得好猛烈。

16 黃景文先生：燒得好猛烈。

17 李澍桓大律師：同埋我亦都見到你係多過外面即係嘅(English Spoken)都已經係起火  
18 燒著咗嘞。

19 黃景文先生：正確。

20 李澍桓大律師：咁你亦都有喺呢個信息入面，亦都有同時間講到，就話個火亦都啱啱開始就  
21 蔓延到去宏道嗰個大廈嘞，係咪？

22 黃景文先生：係，正確。

23 李澍桓大律師：當然我哋知道如果升格做五級火，我哋知道係由一位叫做陳 Sir，就佢係之  
24 後去到 18:22 嘅時間先至將佢再升級，由四級變做五級火嘅？

25 黃景文先生：正確。

26 李澍桓大律師：咁首先我想當然問嘅第一樣嘢，因為你到場，到你將個指揮交界鄧 Sir 之  
27 前，你考慮過啲乜嘢因素，然後決定當其時唔將個火升做五級火？

28 黃景文先生：其實我就--我哋分唔同嘅火警，一級、二級，即係一級同二級係一齊嘅，不過  
29 二級即係叫即係(English Spoken)，我哋叫，跟住升級其實就三級，跟住就  
30 四級、五級，咁其實喺個過程入面，我哋其實係有一個過渡。其實大家都話，即係  
31 消防車嚟到嘅，咁就多啲好，但係其實係有個--即係好似個潮水咁樣，係要有個過  
32 渡，唔可以一次過嚟晒，嚟晒有咩嘢唔好嘅地方，就係你根本就控制唔到，突然間  
33 嚟咗一大班人或者一大班車，佢根本就唔知你想做咩嘢。所以係一個過渡，我哋要  
34 慢慢點解一級一級咁樣升級，係。咁我--升級個時間，我自己其實係(English  
35 Spoken)即係成個過程係半個鐘左右。

36 李澍桓大律師：係。

1 黃景文先生：其實我都要自己去部署點樣做法，咁先會再考慮點樣升級，五級，我連四級我  
2 都未預備好，我點樣升五級？因為我真係一定要有個過程，一個潮水，好似潮水咁  
3 樣，唔可能--即係譬如呢間房咁多人入嚟，唔可以一次過入晒嚟。

4 李澍桓大律師：我諗先前嗰位同事作供嘅時候，我諗主席都有問過其中一個問題，即係好多  
5 車就算真係同時去到，可能個現場亦都未必可以即係擺到、容納到咁多架車同時  
6 間喺嗰個現場，係咪？

7 黃景文先生：係，冇錯。

8 李澍桓大律師：喺當其時我相信你亦都有留意到，其中面對嘅一個困難，似乎就係嗰個火警  
9 警報系統嘅問題，因為我諗我哋都有足夠嘅證供資料，就當其時嗰個警鐘其實起碼  
10 有六座大廈入面係失靈嘅，喺對於你到現場接手做指揮，尤其是疏散嗰個情況上  
11 面，有冇遇到啲咩嘢困難？

12 黃景文先生：嗰陣時我去到差唔多係 15:35。

13 李澍桓大律師：唔。

14 黃景文先生：跟住其實我哋嘅同事，就因為我哋有位同事 (English Spoken) 嗰個陳浩  
15 德，高級消防區長，咁佢係就係東區指揮官，咁大埔就係佢負責嘅，大埔區。咁佢  
16 都同我講，即係話番畀我知，其實佢哋有同警察嗰邊做疏散。咁另外，其實我去到  
17 嗰陣時間，其實即係我個印象就已經係成躉大廈燒，即係已經燒晒，有兩--有幾躉  
18 已經由底燒上去，其實你問我，如果嗰陣時去疏散，如果由自行疏散會有困難嘅，  
19 由個居民自己自行疏散。

20 其實我要分番開，其實大家疏散其實有兩個定義，即係我自己即係嘅睇法就  
21 係，第一就係自行疏散，就係即係聽火警鐘，跟住就個居民自己去決定離唔離開火  
22 場。因為即係我哋都有個守--即係有個指示，其實你就係你疏唔疏散，你走唔走，  
23 帶逃生三寶，你出門口打開道門，睇下條走廊有冇煙，有煙嘅就去最近嘅樓梯，打  
24 開個防煙門，又睇下有冇煙，跟住落去，如果冇煙就落去，落去嗰個樓梯，如果見  
25 到有煙，可能你要返番--選擇決定返番自己個單位，抑或去一個比較近啲嘅安全嘅  
26 單位。咁呢個係真係佢要有好多自己嘅決定，咁我哋--當然，我哋從來都有話建議  
27 啲市民向天上--天棚走嘅，因為始終唔係離開個大廈。

28 李澍桓大律師：係。

29 黃景文先生：所以呢個自行疏散，居民--即係或者市民係要有好多嘅決定。咁呢個係一種疏  
30 散嘅方法。另一種疏散嘅方法就係消防員真係帶佢離開，帶佢離開個現場，就我哋  
31 親身。咁你話至於第一種方法，由居民自行自己離開嗰個佢個大廈，如果我睇頭幾  
32 座大廈真係有可能，佢會更加危險。

33 李澍桓大律師：係，個原因係因為咩嘢原因？

34 黃景文先生：因為佢自己點樣--即係因為我諗佢--其實佢出到門口，佢打--即係自己打開  
35 嗰個走廊已經係漆黑一片嘅，有濃煙嘅，可能佢自己返番自己嘅單位--即係喺番自  
36 己單位，我哋都教嘅，用嗰啲膠紙封番佢嗰啲罅，跟住就去一個--即係有一間房，

1 即係自己可能有睡房，咁去一間即係見到即係天嘅，即係有馬路嘅，咁等我哋去呼  
2 救，可能毛巾呀，昇啲照明系統咁樣。

3 李澍桓大律師：即係簡單啲嚟講就係都要因應當時個情況？

4 黃景文先生：係，真係因應，有好多決定佢哋自己決定，但係如果你--即係如果早時間，即  
5 係時間早嘅，咁自行疏散都仲可以，但係如果你話遲嘅，就真係--即係如果去到好  
6 似呢個宏福苑頭嗰幾座大廈，即係咁快，尤其頭嗰兩座，宏泰、宏昌，基本上佢逃  
7 生嘅時間係好短暫，...（聽不清）

8 李澍桓大律師：所以可唔可以咁講...

9 黃景文先生：...係需要消防員去幫助。

10 李澍桓大律師：所以可唔可以咁講，即係尤其是我哋知道個火就逐步唔同時間去發展，咁正  
11 如你都所講，即係開頭可能有一兩座燒得比較激烈，有其餘幾座可能未有咁大火，  
12 甚至乎可能由頭到尾都有火嘅時候，而如果嗰個消防警報系統係運作正常嘅，咁居  
13 民進行自行疏散嗰個危險性可能就相對地低啲？

14 黃景文先生：同意。

15 李澍桓大律師：咁亦都有機會即係佢哋能夠安全離開嗰個火場嘅，即係之後我哋知道變咗火  
16 場，但係未燒到去嘅時候，即係喺今次呢個事件上面，似乎的而且確如果個火警警  
17 報系統係運作正常嘅話，對於某啲大廈嘅居民其實係有一定嘅幫助嘅？

18 黃景文先生：火警系統一定有幫助，有佢嘅功效。

19 李澍桓大律師：我相信亦都點解即係消防處一路都對於整個消防裝置基本上都會緊張，要有  
20 一個...

21 黃景文先生：因為呢個係真係佢有佢嘅功用--功效喺度。

22 李澍桓大律師：我想講跟住你頭先提及過，即係喺 16:23，你接手做，跟住所謂叫做  
23 (English Spoken) 嘅嗰個救援嘅工作。

24 黃景文先生：係。

25 李澍桓大律師：純粹畀一啲數字你，因為呢個係我哋喺消防處提供嘅一啲紀錄上面睇到嘅，  
26 咁我想嘗試講完呢啲資料畀你知之後，再睇下、了解下嗰個原因啱唔啱？就住喺  
27 16:23，即係火燭仲係 11 月 26 號燒緊當日，我哋知道去到 16:23 嘅時候，其實  
28 有六十五個求助個案嗰喇已經起碼，其中有三十八個就喺宏昌，二十三個就喺宏  
29 泰，咁另外嗰啲座數就有四個嘅。咁呢個係第一個我哋得到嘅資料嚟嘅。咁第二個  
30 資料我哋得到，就係去到應該係 11 月 27 號，咁我相信黃 Sir 你就係喺大概 9 點  
31 35 分落更，係咪？

32 黃景文先生：係，冇錯。

33 李澍桓大律師：咁我哋知道去到嗰個時間左右，其實已經總共收到三百一十個求助嘅個案  
34 嘅。咁第三個資料，我哋知道嘅就係其實喺當日，即係你接手做咗 (English  
35 Spoken) 嗰個時間入面，去到大概如果講晚上 10 點鐘，22:00 左右，我哋知道  
36 喺呢大概五、六個鐘頭入面，就你哋嘅同事只能夠處理到十三個嘅求助個案。咁再

1 之後去到 10 點鐘直到第二日凌晨大概 4 點鐘嘅，就再處理咗三十三個嘅求助個  
2 案。咁去到最尾 4 點鐘到你落更九點半嘅時候，就處理咗八十三個嘅求助個案。呢  
3 個我唔係一個批評，但係我想了解下個原因，因為我想理解嘅就係咪因為去到 11  
4 月 27，尤其是凌晨嘅時候，個火勢已經逐步受到控制，或者係減弱咗，所以嗰個求  
5 助個案可以處理得更多，同埋成功--可能有好多個案都成功救到啲人出嚟？

6 黃景文先生：係，冇錯。咁其實我哋救援就有四個因素，即係點樣救援法。其實我哋證供嗰  
7 度都有寫嘅。

8 李澍桓大律師：係。

9 黃景文先生：第一個就係嗰個滅火嘅進度，咁第二個就係救--我哋要安全--即係比較安全咁  
10 去進入，咁亦都要預備陣間可唔可以安全帶個受困--即係被救人士離開現場。跟住  
11 就係第三點，就係究竟嗰個現場安唔安全，嗰個結構。咁第四個，究竟佢嗰個現場-  
12 --即係嗰個待救人士佢畀嘅資訊清唔清晰。咁初期我哋真係個火係--即係真係--尤  
13 其是早啲--即係頭啲十個鐘、十零個鐘，去到凌晨都係大嘅，係好困難入去火場。

14 李澍桓大律師：所以...

15 黃景文先生：所以呢度係...

16 李澍桓大律師：你講先。

17 黃景文先生：所以呢個係令我哋救援方面遇到好大嘅挑戰。

18 李澍桓大律師：呢個會唔會就算你即係剛才都有講就係即係就算我再多啲人嚟，個現場都未  
19 必容許同事可以入到去真係做呢啲救援工作？

20 黃景文先生：正確。

21 李澍桓大律師：當然我哋知道即係求助嘅電話係嚟自即係有唔同座數嘅居民。譬如以宏志為  
22 例，我哋知道就快嘅個案可能就係大概唔使一個鐘頭，五十分鐘嘅就處理到，但係  
23 有啲就要等九個鐘，咁其他大廈有啲都有相類似嘅情況嘅。當日在場，尤其你作為  
24 (English Spoken)，當你收到唔同座數嘅個案要求求助，你有冇一啲乜嘢嘅  
25 根據或者一啲考慮嘅因素去決定處理邊一座大廈邊一個求助個案先？

26 黃景文先生：首先，我講番宏志，頭先你舉個例子，其實就佢喺宏盛隔離，旁邊，咁呢度就  
27 係點解唔燒著，其實就係宏盛--即係我當時 set up 咗一個 (English  
28 Spoken) (前線指揮中心)，其實一般嚟講就會喺架車度嘅，我哋叫 MCU  
29 (English Spoken)，我就喺個露天嗰度，喺宏志對出嗰度，即係嗰度比較安  
30 全啲同埋我可以直接即係睇到個現場。我睇到宏志有機會宏盛就炳著佢，咁宏盛即  
31 係負責嘅同事就睇住，咁淋水喺宏盛咁樣。之後，我哋都有做一個即係 (English  
32 Spoken)，喺四點半，可能呢度資料冇寫到。所以宏志點解可以唯一一座唔燒  
33 著，其實就係宏盛嘅同事去幫手。咁成個過程入面，其實我嘅下低，其實我就有  
34 (English Spoken)，喺 ICS，頭先我所講嘅現場指揮系統。其實我下低我有  
35 唔同嘅 (English Spoken)，即係每一座。即係當然初初就有咁多 (English  
36 Spoken)，因為我哋就希望最好每一座有，即係最終我哋都做到。

- 1 李澍桓大律師：佢哋工作係做咩嘢？
- 2 黃景文先生：佢哋 (English Spoken) 係或者以上嘅，當然後靚有啲有咁大火，可能降  
3 格到係 ADO，即係助理消防區長去負責。
- 4 李澍桓大律師：係。
- 5 黃景文先生：佢哋負責咩嘢，就係即係其實好簡單，就係將個延長去分 zone，即係每一座  
6 就係一個人負責。譬如可能有一個同事係負責一座大廈宏志嘅，或者宏昌嘅，呢一  
7 座大廈係 (English Spoken)，另一個同事就負責 (English Spoken)  
8 嘅，咁 (English Spoken) 嗰個就係我負責，即係 under 我，(English  
9 Spoken) 咗畀我嘅。咁每一座大廈就有一個 (English Spoken)。
- 10 李澍桓大律師：所以就係你跟喺話佢個...
- 11 黃景文先生：我就同佢當然會緊密聯繫。我哋收到一啲求助個案，我即係可能會直接畀佢  
12 (English Spoken) 或者經我畀佢，咁由佢去決定番究竟點樣上法，即係有唔  
13 同嘅方法，其實喺救援方面。但係都要睇番嗰個 (English Spoken) (滅火)  
14 嘅進度究竟係點樣。
- 15 李澍桓大律師：我純粹想了解一下，就係譬如話宏志佢最有受影響嘅嗰個情況。當其時你哋  
16 嗰個策略會係佢哋既然有受影響，儘早去做咗救援先，定係倒番轉，既然佢哋有受  
17 影響，就可能可以擺遲少少，救咗第二啲可能比較緊急啲嘅個案先，有冇一個咁樣  
18 嘅考慮？
- 19 黃景文先生：如果你問我，其實講真，即係你係唔係想講優先？其實... (聽不清)
- 20 李澍桓大律師：係，先後次序有冇一個？
- 21 黃景文先生：即係宏志其實我哋唔係擺好多人，即係其他我梗係擺多啲人，咁宏志亦都唔係  
22 咁--有咩嘢影響嘅，我咪擺少啲人。
- 23 李澍桓大律師：係，明白。
- 24 陸啟康法官：我想問你哋到場咗幾耐或者幾點鐘係開始會有一個 (English Spoken)，  
25 係每一座有一個 (English Spoken) 負責？
- 26 黃景文先生：我 16:35 嗰陣時就有一個 ADO 叫做周志豪 (譯音)，跟住慢慢開枝散葉逐個  
27 逐個嚟，如果嚟到我--因為我手頭上有資料，我應該有交到畀你，有冇？應該我諗  
28 係五點零六點，係咪？因為我手頭上--真係唔好意思，手頭上我有資料。但係如果  
29 我印象記得都快嘅，五點幾六點--應該六點零。
- 30 李澍桓大律師：你等等，我哋睇番嗰個。
- 31 陸啟康法官：有冇？
- 32 黃景文先生：即係做到一座一個 (English Spoken)。
- 33 李澍桓大律師：因為我相信 ICS 嗰個情況我哋剛才都有聽過，就係當--你講緊係唔係  
34 16:35？而家我哋睇到，你前面個...
- 35 黃景文先生：16:35 係我接個時間，我開始做 (English Spoken)。
- 36 陸啟康法官：所以其實每一個 (English Spoken) 放一個 building，即係慢慢一路

1 set up 咁樣樣？

2 黃景文先生：係，冇錯。

3 陸啟康法官：即係嗰陣時開始就已經有個決定，16:35 嗰陣時就決定每一座應該會有一個人  
4 (English Spoken)？

5 黃景文先生：係，嗰度都有 (English Spoken)，16:35，可唔可以上少少？呢度，我  
6 哋 16:35 副處長都佢個決定。即係所謂 (English Spoken) 就係我哋嘅  
7 (English Spoken) 或者以上，即係 SDO，即係 (English Spoken)。

8 李澍桓大律師：即係你而家講緊 16:35 就係 (English Spoken) 嗰個訊息？

9 黃景文先生：係。

10 李澍桓大律師：因為我知道 ICS，剛才我哋知道一升格咗做四級火，剛才林先生都有講，因  
11 為佢覺得應該要更高職位嘅人落嚟主持大局，所以佢就升格做四級火，然後可以  
12 啟動 ICS 嘅呢個系統，係咪？

13 黃景文先生：其實 ICS 一開始就已經有，只係唔同嘅 (English Spoken)。

14 李澍桓大律師：唔同嘅層次。就住剛才我哋講到話求助嘅個案，有另一樣嘢嘢我想睇下你可  
15 唔可以幫到我哋，就係因為當我哋團隊去分析嗰啲求助個案嘅時候，我哋發覺好似  
16 有幾個渠道，當然最明顯第一個就係用嗰個所謂叫做打 999 嘅情況。咁我哋見到其  
17 中似乎有啲個案就係用傳真嘅，你有冇當時收到嘅訊息係--即係我純粹睇下你知唔  
18 知道嗰個傳真嘅求助嚟自邊度，睇下你有冇？

19 黃景文先生：因為控制中心，我哋嘅指揮室話番畀我聽只係一個--即係佢唔會講用咩嘢管  
20 道，佢只係講話呢個單位嗰啲即係求助嘅資料，呢個我哋淨係有啲咁嘅資料。

21 李澍桓大律師：另外，就係如果當其當其時喎...

22 黃景文先生：即係前線，我前線係有咁嘅資料。

23 李澍桓大律師：如果當其時亦都有一啲寫住係 (English Spoken) 畀嘅一啲指示，我相  
24 信就應該係當其時嗰個 (English Spoken) 收到有啲要求助或者有啲訊息畀咗  
25 佢，所以佢就發個指示，係咪？

26 黃景文先生：係，冇錯。

27 李澍桓大律師：最後一個環節，我問一問你關於嗰個搜救隊嘅指引嘅。如果你認為要睇番文  
28 件就睇番，如果唔係嘅，睇下我嘅理解啱唔啱，即係一般嗰個搜救嘅程序，就係希  
29 望分兩隊，一隊 A1 隊就先去天台進行通風，跟住有個 B1 隊就係去求救嘅單位進行  
30 搜救，呢個簡單嚟講就係嗰個嘅救援一啲指引，係咪？可唔可以咁講？

31 黃景文先生：呢個指引其實係即係一般嘅火警。

32 李澍桓大律師：係。

33 黃景文先生：我哋第一階段，即係最初嘅階段，我哋就一定係去肇事單位嘅，即係頭先 A1、  
34 B1，個 A1 就去個天台，其實應該係個次序一定去即係待救嘅單位，因為真係燒緊  
35 個單位先係... (聽不清)

36 李澍桓大律師：應該分兩隊人？

- 1 黃景文先生：跟住另一隊就會去天台，去天台個作用係咩嘢，就係開個天台，開個道門，  
2 因為啲煙有機沿住上去，同埋即係啲火有機會就上到去頂嘅，先上去頂，因為好似  
3 個蘑菇型咁樣。
- 4 李澍桓大律師：係。
- 5 黃景文先生：所以點解第一階段就係兩隊，就係咁解。咁仲有之後仲有啲階段個嗎。
- 6 李澍桓大律師：係。
- 7 黃景文先生：跟住滅火嘅下一層，跟住就係到最底嘅，就係即係...
- 8 李澍桓大律師：每一層。
- 9 黃景文先生：係，每一層我哋都要搜救，但係呢個就係一般嘅火警。
- 10 李澍桓大律師：我都係想問問你，因為我哋知道喺宏福苑今次呢個大火上面，都叫做係史無  
11 前例大規模嚴重嘅火災。
- 12 黃景文先生：同意。
- 13 李澍桓大律師：喺呢個救援工作上面，尤其是你作為 (English Spoken)，你就住呢個  
14 一般畀前線原本呢一個嘅指引，有冇做過一啲變更或者畀過進一步嘅指示佢哋應該  
15 點樣去處理？
- 16 黃景文先生：其實呢個指引，即係頭先所講嘅指引就係一般嘅火警。但係去到宏福苑，就係  
17 譬如好似宏昌、宏泰，開始根本就入--大家都知差唔多成座樓都係燒緊嘅單位，係  
18 唔可以用呢個方法。我哋只可以係跟住即係同滅火方面嘅同事係雙軌並行。即係我  
19 哋成日都話雙軌並行點解呢？你都救唔到火，我哋嘅人都上唔到去，我點救人。
- 20 李澍桓大律師：即係所以我相信當其時好多地方係唔係都仍然嘗試喺外圍先控制住，尤其是  
21 我哋知道某啲大廈都仍然入唔到去嘅時候，希望打通咗嗰個進入火場嗰個通道。
- 22 黃景文先生：你嘅意思係外牆...
- 23 李澍桓大律師：即係喺大廈外面，係嘞，外牆。
- 24 黃景文先生：外牆其實--即係我哋有分內部救火 (English Spoken) 或者 (English  
25 Spoken)，但係如果係高層樓宇，我哋最主要就係內部救火。
- 26 李澍桓大律師：係。
- 27 黃景文先生：外圍只係一種即係去做一個叫做 (English Spoken)，即係水塔咁樣做  
28 法。可以即係如果係射到嘅，咪可以 (English Spoken) 到。
- 29 李澍桓大律師：當你喺 16:23 接咗呢個做救援 (English Spoken) 嗰個工作嘅時間，喺  
30 16:23 呢個時間，以你所知，其實係唔係已經有救援人員可以入到譬如宏昌，定還  
31 是都仍然未可行？
- 32 黃景文先生：其實我哋係盡量入到去，其實初頭個形勢已經係好困難。
- 33 李澍桓大律師：係。
- 34 黃景文先生：我哋入到去即係有水，咁我哋一齊一齊咁樣即係上去，係困難嘅。
- 35 李澍桓大律師：黃 Sir，睇下我可唔可以聚焦問你，以你所記得宏昌真真正正可以有第一隊  
36 救援隊入到去入面做救援工作嘅，你有冇資料或者你記唔記得大概係邊一個時間，

1 講唔講到？

2 黃景文先生：之後我自己有留（English Spoken）嘅，即係喺你而家睇緊呢個  
3 （English Spoken），咁我如果睇到就係有嘅。

4 李澍桓大律師：如果睇番，你就係 16:23 接過呢個救援嘅工作嘅。

5 黃景文先生：係。

6 李澍桓大律師：如果我哋好快睇。

7 黃景文先生：因為呢個（English Spoken）就好似即係譬如我救一個人，喺邊度救我就  
8 要落番個（English Spoken），做番個紀錄嘅。頭先 16:23，16:26 已經  
9 有。

10 李澍桓大律師：16:26 我哋見到都仍然係宏昌有求助嘅個案，就通知咗搜救隊。

11 黃景文先生：係。

12 李澍桓大律師：呢個我純粹可唔可以透過你，因為你係（English Spoken），我哋有個  
13 畫面可以比較清晰少少知道究竟宏昌幾時第一時間可以進入到去火場入面。

14 黃景文先生：17:00，我第一個（English Spoken）係。

15 李澍桓大律師：即係而家我哋見到 17:00 呢一個嘅就係由黃 Sir 你，咁就係見到兩個男性  
16 同一個女性就係喺現場...

17 黃景文先生：呢個要補充番嘅，17:00 之前，因為我打（English Spoken），係同事救  
18 咗之後，佢再打有個（English Spoken）。

19 李澍桓大律師：但係我相信呢個（English Spoken）都唔會話相隔半個鐘、九個字先  
20 至...

21 黃景文先生：即係我（English Spoken）咗一六幾咁，十零分鐘開始。

22 李澍桓大律師：即係可能十零分鐘，佢將你處理咗傷者，然後就再向你做一個匯報，即係  
23 講緊都可能十分鐘、十五分鐘...

24 黃景文先生：係，冇錯。

25 李澍桓大律師：...最遲都會向你做呢個匯報，係咪？

26 黃景文先生：係，冇錯。

27 李澍桓大律師：喺今次嘅火災入面，我哋都知道喺規模上面，喺個傷亡人數亦都係史無前例  
28 嘅，亦都好（English Spoken）係就係有好多過咗身，包括你哋嘅同事。以你  
29 咁多年喺消防處嘅經驗，你覺得而家睇番喺裝備上面又高，策略上面又好，如果係  
30 做一個檢討希望將來做得更好嘅，策略上面又好，如果係做一個檢討，希望將來做  
31 得更好嘅話，有冇你認為係可以同我哋分享要改善嘅地方？

32 黃景文先生：其實我成日都覺得我哋裝備喺世界消防隊入面，即係唔夠膽話第一，但係肯定  
33 係前列嘅。喺裝備嗰方面，當然而家有啲新科技，有無人機、機器人，但係其實呢  
34 個都係好初階，無人機更加，即係大家成日話見到有啲--上網睇到有啲無人機射水  
35 咁樣，但係其實你睇番其實個高度唔係好高，好似一支水喉咁嘅啫。如果真係去救  
36 火，你諗下我哋即係嗰啲喉即係好粗，去到廿幾三十樓，根本上你一架無人機你睇

1 下會唔會夠力，而家嘅無人機冇咁夠力去扯一條咁大嘅水喉，仲要咁大壓力。

2 李澍桓大律師：係。

3 黃景文先生：而家即係大家睇到呢個係示範，暫時都係。咁科技一定要跟進嘅，一定要與時  
4 並進，因為每日都有新科技。另外，但係我就覺得即係防火方面係好重要，英文話  
5 (English Spoken)，一定係防火行先。

6 李澍桓大律師：主席，我有其他嘅問題。

7 陸啟康法官：各個涉事方有冇問題？孫大律師。

8 孫靖乾資深大律師：黃 Sir，有少少問題想同你澄清番。頭先就講緊嗰個搜疏隊，即係  
9 SAR，現場大概係幾時真係可以入到去宏昌閣即係進行搜救嘅工作？首先，就想你  
10 睇一睇就係 B10，咁係 5151 頁嘅。咁 5151 頁如果我哋去睇一睇喺呢度嗰個  
11 16:56，即係第二個 (English Spoken)，呢度我哋就會見到就有一個訊息，  
12 就係話係 from 一個 (English Spoken)，就係你，然後就係話即係有見到  
13 有個 (English Spoken)，我想問呢個會唔會我哋如果就咁推測，其實應該係  
14 即係當時嚟講有同事進入到宏昌閣？

15 黃景文先生：同意，因為頭先我都係，因為我--唔好意思，我都係 look 到頭先最耐嗰度  
16 17:00，其實原來仲有一段係仲早啲嘅，16:56，咁呢個一定係比頭先嗰個仲要  
17 早。

18 孫靖乾資深大律師：仲有一個，可能睇一睇埋就係呢個 5142，呢度就唔係講緊宏昌閣，但  
19 係我哋見到有講緊個宏泰嘅，因為頭先除咗問宏昌嘅時候，其實宏泰我哋知道應  
20 該即係火勢即係最為嚴重嘅。但係呢度講緊嘅就係地下，就喺四點半嘅時候，就你  
21 亦都有個訊息，就係話有一個男士就喺宏泰閣嘅地下嗰度係救出，你會唔會如果憑  
22 呢度記得如果喺宏泰閣嚟講，係大概會係咩嘢時間即係消防員係入到去宏泰閣，定  
23 係話即係可能你需要更多嘅訊息？

24 黃景文先生：宏泰閣呢度地下一定係可以更早嘅。

25 孫靖乾資深大律師：係。

26 黃景文先生：可以更早，即係我意思--即係大家可能理解唔同，即係上去嘅意思可以係地下  
27 以上層數。

28 孫靖乾資深大律師：係。

29 黃景文先生：即係地下其實喺我心目中即係唔當係入咗去。

30 孫靖乾資深大律師：係，明白。

31 黃景文先生：但係嚴格嚟講嘅，即係真係入咗去呢度。

32 孫靖乾資深大律師：另外就想問一問，頭先你有講到李大律師問你嘅時候，就話你去滅火嘅  
33 時候，就有講主要就話就係室內裏面滅火，亦都有講緊喺出面，你話喺出面最主要  
34 有就係用一個叫做 (English Spoken) (水塔) 嘅情況，頭先主席問過消防處  
35 同事--如果喺今次滅火遞降有冇考慮過水蒸氣嘅情況，你會唔會喺呢方面解釋下，  
36 其實嗰個水尤其喺室外如果你要噴水嘅時候有冇乜嘢考慮，水蒸氣方面有冇乜危

1 險，幫我哋分析下。

2 黃景文先生：其實鋼梯個水壓係會比我哋即係消防員揸個滅水喉係會大得多，個  
3 (English Spoken) 數係大好多，水力亦都大。其實喺外圍射佢係唔了解個情  
4 況嘅，因為個個控制就喺車底嗰度，地下即係車度控制，佢就睇唔到上面，即係佢  
5 雖然有即係攝錄，但係佢唔清楚上面個情況嘅。即係唔係喺內部救火就會清晰得  
6 多，因為真係喺現場睇到，入到去咁你射到。咁射水其實個水蒸氣即係就好似一個  
7 煮熟咗嘅鐵，你突然間淋水，啲水蒸氣喺度擴散，一千七百倍膨脹嘅情況可以去  
8 到，如果你係唔知嘅情況真係會灼傷個人。所以其實我哋消防處喺鋼梯個個指引都  
9 係，如果你真係要外部射水嘅，要同入面同事要溝通得到，因為要撤離，因為你由  
10 外圍射入去係有危險嘅，即係個個水蒸氣真係會灼傷個人，會嚴重燒傷，所以我哋  
11 大家即係外圍同入面嘅消防員係要配合。

12 孫靖乾資深大律師：好，唔該晒，黃 Sir, thank you。

13 陸啟康法官：仲有冇其他問？

14 李澍桓大律師：沒有覆問。

15 陸啟康法官：冇。我亦都係重複番頭先同一番說話，今日多謝你嚟畀證供。你係唔係有嘢想  
16 講？

17 黃景文先生：喺呢度我都即係同番宏福苑嘅居民都要講番幾句。咁困難好快會過去，其實社  
18 會嘅人士，即係大部分嘅，包括我自己同埋我屋企人，我哋都係支持宏福苑嘅居  
19 民，我係祝福佢哋，希望佢哋就儘快走出呢個陰霾，明天會更好。多謝晒。

20

21 15 時 32 分時任消防處副消防總長（新界北）證人黃景文先生作供完畢

22

23 陸啟康法官：好多謝你咁勵志嘅說話，多謝你黃生，多謝你嚟到畀口供。

24 杜淦堃資深大律師：主席，今日冇其他嘅證人，我哋星期三會繼續。

25 陸啟康法官：星期三朝頭早 10 點鐘繼續我哋嘅聆訊。

26

27 15 時 33 分聆訊押後

28 (聆訊將於 2026 年 4 月 15 日 10 時 00 分繼續)